




ՀԵՎԻՅԱ
ՏԵՏԵՐՈՆ
ՐՕՇՈՒՄԻՆ


Hêvîya Seseron

ROCOBÎYN



Hacî Ozkal





Hacî Ozkal

HÊVÎYA SESERON
ROCOBÎYN

J&J
00815

HÊVÎYA SESERON | ROCOBÎYN
Hacî Ozkal

Pergalsazî
Azad Zal

Tedeyînsazî & Zonsazî
Ali Ozgen

Ripelsazî & Risersazî
J&J

Çapê Yewin | Adari 2023

© Copyright Ajans J&J 2023
Sertifika No Ajans J&J-44569

ISBN
978-625-8305-11-1

Çapxone

Tuncay Mat | Ceylan Matbaa Davutpaşa caddesi Güven İş merkezi B Blok
No: 318-319 Topkapı Zeytinburnu | İstanbul
Tel: 0212 6131079 Sertifika No: 40933

© Heqê weşonî nîmite yo. Xayleyê şînasnayî ra teber qopya nêbeno, vîşî
nêbeno û vila nêbeno.

AJANS J&J

Kooperatifler Mh. Rizvan Ağa Cad. Öz Emek St. A Blok No: 33/1
21100 Yenışehir | DİYARBAKIR
Telefon: +90 412 228 36 06 | Mobile: +90 533 436 58 54
web: www.ajansjj.com | email: info@ajansjj.com | ajansjj@gmail.com
facebook: fb.me/jjyayinlari | instagram: ajans_jj | twitter: ajans_jj

Hacî Ozkal

HÊVÎYA SESERON
ROCOBÎYN

Hacı Ozkal; Serra 1957'i di dewa Pîrajmonî yê Pîronî di rapinciyawo. Wendecawo (Dibistono) verîn dewa xo di, wendecawo wertîn Pîron di û Lîseya Ticaretî zî Amedî di 1973'i di qedînaybî. Bahdî, Enstituya Vacêri/Perwerdeyê yê Îzmir'î, şaxê Franskî 1981'i di qedîneno. Rîze, Mereş/Bazarcix, Edene/Duzici û Dilok di mamosteyêya Franskî û Tirkîyî kerda. Vist û çêher serrî mamosteyêyi ra pey tepîşiya, di mengî (aşmî) û nê m zindonê Dilok'i di mend. Tira pey, teber ra mehkema bi û ceza werdi, hîrî serrî Tîpa D'ya Amedî di mend. Xebata xo na romiteyî (çand) û zonî sero vindertişê xo romit û rardiberêya Kurdî Derî di ca girewt. 2016'i di bi himserekê Kurdî Derî. Xebata xo na yê nuşteyon wêra di hîna aver berdi. Bi yewîna fasal reydir xebata xo na zonî sero vindert. Êro zî xebata xo na sey yew setê kirdkî hinkerda û erda çapî ver. Hima zî xebatonê xo nê Kirdkî romeno.

Mexilî:

- * Gramer û Raştnuştişê Kurdî/Kirdkî [Kirmanckî/Zazakî] (Cîgêrayiş) , J&J, 2017 – Amedî
- * Ferhengê Kirdkî – Kirmanckî Zazakî (Ferheng), J&J, 2019–Amedî
- * Vateyê Verînon-Kirdkî/Zazakî/Zazakî (Ferheng), Med-Der 2021–Amedî
- * FERHENGÊ KURDÎ - TIRKÎ Kirdkî|Kirmanckî|Dimilkî|Zazakî TÜRKÇE - KÜRTÇE SÖZLÜK Kirdca|Kirmanca|Dimilice|Zazaca (Ferheng), J&J 2023 – Amedî
- * FERHENGÊK (Kirdkî|Kurmanckî|Türkçe) FERHENGOK (Kurmanckî|Tirkî|Kirdkî) SÖZLÜK (Türkçe|Kurmanca|Kirdca) (Ferheng), J&J 2023 – Amedî
- * Ferhengê Qewl û Vateyê Verînon (Ferheng), J&J 2023 – Amedî
- * Giramer û Raştnuştişê Kirdkî (Zon), Çapê 2yîn J&J 2023 – Amedî
- * Rayerê Vaceyîşî Yê Mîyonê Rocî (Zon), J&J 2023 – Amedî
- * Dîrok û Romiteyê Pîrajmonî (Cîgêrayiş), Çapê 2yîn J&J, 2023 – Amedî
- * Rocobîyn (Roman) J&J, 2023 – Amedî

I

Rocobîyn; bi vate yewîna roc, roco kû rocê êroyenî rê, derd û kulê kurdonî rê, xem û dejê kurdonî rê, aqobetê nediyarî rê beno daru û xelasi. Tede dej, kul, ezît, zext, zor, zordarêyi, tahda, veyşonêyi, teyşonêyi, raçernayîş, kutîş û kîştîş çinî yo. Rocobîyn, xeyalê ayo rocî yo.

Welatîyê kurdî hilla ki xo di mendînî yan zî hilla ki tahdaya ki veynenî sero ki fikrîyaynî wirdî destê xo rakerdinî û Homadê xo ra yewîna roc, roco bîyn, roco kû tede tahda, zor û zordarêyi, merg û benasat kerdiş hewaniyawo û ayo roc tira waştinî. Şew û roc warîştîş û ronîştîşê xo di asar yew aqobet, mezgê xo di xeyal kerdinî. Hi bibi ki verarocikon ra, rayerê kar û gureyî ra, rarê cit û cuwenon ra, cayê hezn û şayêyi di, veyve û eza di Homadê xo ra tek yew dia waştinî. Aya diaya ki zî kerdinî waştinî ki bêmana serê xo bigîro, derî roco bîyn akewo. Roco bîyno kû welatê yîni tarî ra bixelesneno û heme cayê yêyî bi şewqê xo roşn keno. Diaya Rocê bîynî ya ki wazîyaynî hizurê kurdon û asonêya Kurdîstonî bi xo bi. Dinya di bi ino aqobet, ina dia waştîş bêxeyra kurd û kurdîstonî kêman yewîna millet û welat esto.

Çimkû welato kû ma wazenî tira behs bikerî hetê emperyalon ra, Ewropa û cirononê yêyî ra, birayê yîni yê olî ra bêqanûn, bêxûlq, bêwijdon, teyna bêarvis-tîşeya kurdon ra, bêsiyaset mendîşê kurdon ra bi zîhnîyetê havilveynayîşî nîzdî bîyî û welatê belingazon çêher leteyî kerdo. Letewo verîn bi pêomeyedê "Kas-rî Şîrîn"î 1639 di kurdîstonî ra qerefnawo û diyawo Êron. Serdeston û neyaronê kurdon Kurdîston lete kerdiş xo rê hi ason diyo kû seki merdim hîndîyi xo

rê felqe ya zî qelfe bikero. Hewa dîyini zî bi pêomeyede "Lozan"î 24'ê tîrmengi (temuzi) 1923'di lete kerd û letewo yew dîya Tirkîye û yê hîrînî û çeherînî zî dîyayî Iraq û Surê. Ayo letebeyîş ayo roc ino roc kurdî rê bi tahda, zext, kîştîş, merg, bermi, gunî rişayîş û welat ra raçereyîş bi. Ayo waxt ra Kurdon miyon di gunî herrekîyayî, qesbaya maron kujiliyayî, sîya û sot bîya, gedeyî bê pî mendî, bê way û bira mendî, bê kalik û pîrik mendî, bermi kê m nêbi, heme tewir ra dejî rê sîndur nêmendibi. Dewi dewi sero veşnîyayî, vengi bîyî, şarçe bi şarçeyî sero veng û varit kerdî, mîlyonon reydir dewijî metropolon ra raçernayî. Hi kerdibi ki welatê rocawonê Tirkîye û anatolîya miyonî di nifusê şarê kurdî yê tirkon ra zêdêr kerdibi. Barê yînî bes nêbi serbar zî derî sernaynî.

Hilla koçbeyîşî di, bi ningon rar romitinî bes nêbi, qestî ra raro şaş derî nişon nawitbi. Ayî raron ra hi wer û hi zî awi mişgule bî. Rarî hi ko û kerre bî, hi zî dol û newalinî bî. Tede cenîyê zaclonî, kal û pîrî nişiyaynî rar bioncî û hi zî beteleyîş, nêweşîyî yînî rê tengone viraştinî, hi zî xomê raronê newon bî. Galakerdişê nijadpereston zî dejê dejon bi, bi hinzaron reydir bedelo kû vîr û gomone çewî pey çinî bi dîyaynî. Miyon di cenîya zaclonî ra bigîri heyonî gede, kalî ra bigîri heyonî pîrî, nêweşî ra bigîri heyonî ewncînon, hi merdî ki bira çew nişîya derî yew goro bêwayer zî têbiçîyno. "Merdeyê bêgorî" ki vacîyeno înin semed vacîyaynî bira xebera kurdî pey çinî bî. Hewawo kû verînonê kurdon gede û turnonê xo dir bari kerdibi, çewî yew roco hewl û weş nêdîybi. Person ra bigîri heyonî Îskenderî, Moxolî, Bîzansî, Abbasîyon, Selçoqîyon, Osmanîyon û şerrê cîhan ê yewini timî dej, timî raçereyîş, timî raron ra merdiş, timî raştê gala neyaron omeyîş mendinî. Çerray sereyê yînî şerr ra ason û durî nêmendibi. Serehewanîyeyê kurdon ki zî sernîyayî ti bî veyni tahda û zexto kû kurdon sero

cîriyabi. Kom tewir ra mezg şîyeno îni kerdon sero te-
fekur bibo kû! Merdim ki dîrokî ra ewnîno raşt ra raşt
nênuşîyo zî merdim tira fahm keno kû kurd tewir bi
tewir ra tahnî û nuskî dîyayo, ezît pey bîyo, zilm û
zordarêyi di yew sîndur nêronîyawo. Zordarî Homay
xo vîrî kerdibi, kitabê omarkîni yew kîştî di ronaybî,
wijdon telîson kerdibi û xo neheqêya kurdon rê hêj û
hîgin kerdibi. Medon ra heyonî êro roc ne çew Kurdî
rê paştî vecîyawo û ne zî bêteşqeledelnawo. Hetê
teyna verdayişîya, tehnî û nuskî dayişîya çina komî
ra omewo derî teksîr nêkerdo, ina dehkerê di wazeno
wa emperyal bo, wazeno wa kapîtalîst bo û wazeno
wa oldar bo çewî kurdî rê nêdewernawo. Kom duyelî
ki waşt dabar û şîlikê xo aver bero, xo zengîne dinya
bikero, qada Rocwelatê Mîyonî seba şerrî xo rê vijîna-
ya. Hemini ino welatê awki û zengîneya neftî û xazî
semed sefer bi seferî sero viraşt, nêverdawo kû çew
xo araşt bikero, roc biveyno.

Hewawo kû ma heme pey zonî şerr ki vacîya
veyşonêyi, werwayêyi, tahda, zext, zor û zordarêyi,
kîştîş, merdiş, bonemendiş û raçarnayîş yeno mer-
dimî vîrî. Roco kû kapîtalîst modernîteyî waşt ki din-
ya ra vila bibo, roco kû welatê kurdon ki lete kerd
heyonî êro, rocê kurdon hewl êroyen o. Belingazon
caverdi sey merdimon cuwîyayîş, bi tahma awki û
non werdiş, bi tahma û keyfa nişîyayî ason ason xo
rê gede bîyerî û weye bikerî. Derî heme tihom tirş û
tahl omeynî, heme cuwîyeni jehr gêraya asaynî. Wîta
di derdê mi ne ki ez şerrî ki welat di cîriyayî yîni yew
bi yewî akero, sax bikero, tede çî cîriyawo şima rê
nîşon bido. Derdê mi çerxê vîst û vîstê yewin di çina
kurdon mîyon di cîriya û neyaron çina erdibi belin-
gazon sereyî ser di ez şima dir înin bari bikero. Çîyo
kû zî ez şima dir bari keno, hilla ki ma gedeyî bî û
verînonê ma aqobetê kal û pîronê xo ma dir bari kerd
û çîyo kû ma dîrokî di wend û toyinonî rê zî şadeyêyi

kerda, ez kû şima rê tira behs bikero. Roco bîyn; çina wo? Veyneyê rocê bîynî çina wo? Xem û xeyalo kû pey cuwîyaynî çina bi? Ma pîya Rocê bîyni temeşe bikerî!

Roco bîyn xeyalê bawkalonê kurdon bi. Xeyalî kû bê kîştîş, bê raçereyîş, bê bermi, bê merg, bê teyşonê-yî, bê zilm û zordarêyi yo. Roco bîyn, roco kû tede dej û kul çinî yo, roco kû tede ters û xewf hewanîna-yawo, roco kû tede bîh û bawerêyi, birarêyi, dostêyi, merdimêyi û aşt esto. Ayo roc bi xo yo. Yew hewn û miradê heme Kurdistonijon o. Her Kurd wazeno kû bi heme rengonê xo, şaristononê xo di bisetereyo, dabar û şîlikê xo bikero, gedonê xo bi miradê xo pîl bikero, desermon bikero û bi zerrîya weşi kar û guredê xo di bişixûlnîo. Xeyalo kû pê cuwîyaynî ne ki tede xedir virazîyo, yan zî yî xedir yewî bikerî. Ne ki adir keye, yan zî welatê yewî bikewo û biro xerepnayîş. Kurdistonojon waştîni ki heme ol, mezheb, netew, toynetewî têdir bi weşêyi şîlik bikerî. Yew tona asarîni yîni germin bikero û têdir erdê yîni sero biheweyno. Xeyalê bawkalonê yîni asar çiy bi ki waştîni hergû kes erdê xo sero şîlik pirûno, zon û romiteyê xo na bimono, kulfetê xo ya bicuwîyo.

Derdo û mereqê kal û pîronê yîni, erdo omarkîn, kevnar, verîn û erjeyeyî sero teyr û tebûr azad û bi keyf, ko bi koya bigêro, newal bi newal bifirro, dar bi dara binîşo, wîçiwîça xo bê ters û bê xewf dormereyî ser fiyno. Roco bîyn; roco kû terşê yabonî bê qûrmîqûrma bombon û tîfingon vecîyo teber, azadkî risqê xo dima mono, leyironê xo bi xûlqo weş, zerrîya asoni weye bikero, gird bikero, yîni rê marêyi û pîrê-ya torin û bêhimtayî bikero. Roco bîyn; ayo roco kû dar û ber, vaş û villî bê buya xazî şên bibî, abî û bi zergunêya xo dormereyî şa û bextewar bikerî. Roco bîyn; ayo roco kû zar û zêç bi mar û pîrî, bi dapîr û bawkalî, bi imbaz û ovaron kay bikerî û kuçon ra çengelek bikerî. Rengîneya xo ware û barxononê xo

ser fiynî, qîrriya yîni ya azadi dinya kerr û lal bikero.

Roco bîyn; ayo roco kû xoza xaza kîmyasalî nêwerda, xiraba nêbiya, dar û ber bi sewmê xazi ver wişk nêbiyo, awi bê tengone û bê laqi deron ra xûrmixûrmi bikera û bierzîya têsêr, biherrekîya ruyon û behron. Gonîyo kû tira havili veyneno, bi weşêyi herrekê deron û durxonveyno û tahma bicuwîyo. Heme Kurdî welatê xo di hînzar serra ki ino Homadê xo ra mirad kerdibi. Bîrî ma têdir yew qoncikê Kurdîstonî di çina vîreno û çina cîrîyeno, çina yeno himwelatîyonê yîni sereyî ser di, ma pîya xeyalê xo sernî, hê sebena û çi cîrîyeno ma têdir bigoştari û veynî.

2

Kurdîston dîrokê merdim û merdimêyi di yew qonaxo verîn û qadîm o. Cawo kû tede toyî terş destuy bîyî, astorî ki îni herron sero hi kifş bîyî û hi zî şerron di binê barê gironî ra bîyî. Koyon, newalon û dolun di gom bi gomi dişmenî dima omeybî xarnayîş. Toyî tihomî îni herron sero veynîyayî, keye û dewî îni herron sero pirûnîyayî, dabar û şilik bi fasala cabeyîşî îni herron sero ronîştî, citi û citîrêyi wîta di xeleşiya-ya, adir îni herron di veynîyawo. Ina herrra qadîmî asar yew welat o. Hima çîyo kû merdim û merdimêyi rê xizmeto pîl kerdo û ez tira hagîdar nîyo zî estî. Ino qoncikê welatî kû ez wazeno tira behs bikero, yew dewa Amedî ya û dekewena vakurê şaristonê Amedi, ya zî ha mîyonê koyon di ya. Waxtê Asuriyon ra rare tîcxaretê yê Gêl, Pali û Erziromî yayi sero bîyo û zaf zî cado stratejîk di ca girewta. Komî ki welati di hukim romit ina dewi zaf avzel dîya. Seba kû nuştîş çinî bi, hilla ki zî erê aver vecîya derheqê wîta di zaf çiy verînonê dewi reydir şî goriston.

Hewawo kû verînonê dewi û dormerî nişon daynî, ina dewi verê 1993'yî hîrî hewî rijîyaya, veşnîyaya û dewi veng kerda, dewijî tira wereznayî. Dewi hilla ki pirûnîyaya dormeredê yayi ra di layî vîyartinî, paştîya dewi koyî vera ya û tena yayi zî bide dayaya. Kowo kû peyê yayi di ca gîno, kowo mîtolojîk o. Lewedê koyî di yew zîyareto nomedar zî esto. Vatişê verînon gore şerrê kurdon û Îslamîyetî di wayerê aya tirbi wêra di şehît kewto. Heyna vatinî ki şehîdê Îslomêyi yo la hewawo kû ma pey zonî Îslomêyi çerray şehîdê xo koyona teyr û vergon rê nêverdawo. Heqûmicid cayê şilikî di wêderto, teyna ino zî nîyo şeşê bîynî zî estî û ino tewir tebera mendeyî. Ko wo kû paştîya dewi bide dayaya tira vacîno koyê Şêxî. Dewa ki hîrî hewî rijîna û veş-

nîna hetê maxduronê dewi ra newerna pirûnîyena. Vernîda Cumhurîyetî di yew xebata jeolojîkî virazîna û tede erjîj vecîno. Serron reydir dewijon monîkî xo rê erjîj vetinî û dezgeyonê xo di tira serçimêyî û guleyî viraştinî, ticaretê yînî zî kerdinî. Dima 1975'î di newerna yew xebati virazîyayî û heyonî 1978 romit la dima ya zî padîyayî. Hewawo kû verînon behsê di layon kerdinî la êro layon ra zî û awi ra zî çiy nêmando û nomeyê yayi zî bejêyi sero vete wo. Hetê zezewat û fêkî ya apey kewta ya la hetê cayonê mîtolojîkîya aver a. Kerre û koyê yayi zî zaf nomedar î. Axayêyi û şêxêyi tede nêbîya, nomeyê dewi kirrîjalî sero vete yo. Waxtê bisilmonê di ki rijîna û veng bena 550 keye bena û dormeredê 5-6 hinzar nifus tede cuwîyeno. Vatişon gore dewijê ina dewi timî hetê xoverodayîya bî, çerray dişmenî ver di milşikte nêvindertibî. Cuka ki îni aqobetê raçarnayîş û vila kerdişî yînî sereyî ser di omeybî. Êro hîna weş fahm beno kû sebebê hîrî hewî vengbeyîşî ino xoverodayîş o, neyarî rê nêdewer-nayîş o.

Dewi ki çerxê vîstina ki gorebê da-vîst serron xel-nena xoverodayîşê Şêx Seîdî ververnîyeno û zaf dewijî ki ayo şerr di may û pîy û desermonî bî, ma taresayî. Çîyo kû erdinî zon şerr zaf xidar vîyertibi. Şêx, peyeyê Şêxî û mîrîdonê xo na dewi di, şeqal, xap û maxaronê dewi di kulfetkî seterîyaybî. Demserri zî zimiston bi, hîrî-çêher mîtroyî vewri zî erdi bena. Tengonewo kû zimistonî derî pirûnabi yê şerrî ra gironêr bi. Dar û ber hîy bi, adir girewtîş zehmet bi. Dara hîyi zî ki adir girewtinî zaf duy kerdinî la gay dişmenî zî ino duy nêdîynî. Eki bidîynî cayê yînî deşîfre bîynî û teqînî pirûvarnîyaynî. Ino mişguleyî dewijon û paşmîronê Şêxî rê hewlwelaqo pîl viraştinî. Hilla ki dewleti zona Şêx ha dewi di yo, erzena dewi ser û dewijî bi mêmûnonê xo na perrenî ko. Qomotano kû wêra di wezîfedar bibi derî vacîyaynî Delî Fîkrî. Delî

Fikrî zaf bê îmon û bê wijdon şinasîyaynî. Dewijon veyşon û teyşon edelnenon, zext ronono, tahda pêkeno û tira Şêx ya zî cayê Şêxî wazeno. Dewijî ki dewi di mende yî, meydonê dewi di onceno pêser, yew bi yewî eşkence ra vîyarneno. Dewijî vonî ki ma çew nîdîyo, ma çewî ra zî hagîdar nîyî. La rapikonêk ki wenî, eşkencewo kû veynenî bi fek, bi qalon nîyno salixî dayiş. Oncax ontaxon bizonaynî ki se bîyo bider! La heyna zî çand eşkenceyon merdim bîyero zon xirab nêbeno.

Cenîyonê ki ayo eşkence dîybi vatinî ki; şerme ra nêbîynî ma ka timnonê xo war bikerî û eşkenceyo kû ma kerdibi şima ka herunda yêyî veynî. Delî Fikrîyî timonê ma war kerdiş daynî û pisîngî dekerdîni zerredê timnonê ma û ma ontiş daynî. Dima zî pisîngî cêr ra paşkilî kerdîni ki yî cêro leşa ma ser bikewî, pincirikî bikerî, vecî qeyme û hilla qeyme vecîyayîşî zî leşa ma pincirikon ver war bîyerî. Bi ino tewir leşi ma rû selexnaybî, darba yîni ver rêşê bêdaruyî tewerîyayî û ayîninî ki serron reydir ontibi heme bi ayî darbon merdî. Eki şermî ra nêbîynî şima ka veynî faqê ma senî rizaye yî. Heyna comîrdê ma zî berdinî daronê mijmewlona bestinî, rocon reydir teyşon û veyşon ayî darona beste verdaynî. Leşa yîni bi mijmewlon riznaynî. Verînon ma ra vatinî ki, kî şima rê kura ra ververnî û komi vacî, komi nêvacî! Vatişî reydir bi rocon û aşmon îni eşkenceyî nêvacîni û laya nêbenî ki? Ino zilmî ters û xewfo kû viraştibi serron reydir çew nêwatona tira turnonê xo rê behs bikero. Gedeyî ki 1925 di rapincîyaybî tolazêya xo di ino zilmî ser ra bîybî û bi dek û dilavon bawkalonê xo ra teber kerdibi.

Dêrunîya şarî mirdîya xo xerepîyaybî. Ayî ki mergî ver di bî, yî nêtersaynî û tahdaya ayî rocon vatinî. Xela û xeza dewi di dabara hewli çewî di nêverdaybî, şerron ki zî sere bi yemnû serna, yew xizonêya pîli ronîyena, sera ser dewijî belingaz monenî. Zaf keyeyî

nişîyayî xoverobidî û aya xela û xeza di mirdiya xo gedeyê xo vînî kerdî. Cindowo kû wîta di qala yêyî bena ayo mehel pîyê yêyî pêçek beno. Bi zor û zehmet xela ra xelesîno la çand way û birayê yêyî ayo hind wayerê siûdî nêbenî. Ge ge zî siûdê xo ra gazincîyaynî, “vatinî ki siûdo kû ez tira şa bimono teyna dinya di mendîş o”. Derd û kulo kû veyneno yêyî mendîş ra zî poşmon fiyneno. “Vatinî ki ez zî xo rê bimerdînî, wa ka ez zî sey ayî way û biraronê xo îni dej û kulon nêveyno”. Cindo, nomeyê yêyî çewî rê normal nîyomeynî, xo ra waxto kû tede rapincîyabi zî waxto normal nêbi. Aqobetî ki dapîr û bawkalê yêyî, mar û pîrî yêyî û yêyî sereyî ser di yenî normalî nêbîyî ki nomeyê yêyî zî normal bibo. Cindo ki vacîyaynî; sereterpuş, gicik qironçiliya, hergû punca yêyî hetîya şeye merdimî vîrî kewtinî. Û xora yû zî yê ters û xewfî hesebîyaynî, cuwîyena ki zî mîyon ra omebi sey gîjikê yêyî punci bi punci dormere ra vila beyabî, tēmîyoneki bî. Tewir bi tewir ra derd û kulî xo di hewînaynî.

Merdimê xoser û weşî di hal nêverdabi ki porrî di zî hal bimono û azadkî rardê xo ra biherrekîyo. Binêki zî dapîr û bawkalon ya zî mar û pîron gedeyê xo pey cindon tersnaynî, hi cindêyi û hi ters û xewfê cindon zî bara Cindo'yî mendibî. Çiki xirabêya ki erdon sero cîrîyaybî erzîyaynî cindon ser, ya zî şeytonî ser. Virê wîrdîyon di asar yew sewm virazîyabi ki Cindo zî derî xewfin omeynî. Pîçekêkî ki serehewanayedê Şêxî di rapincîyaybî bi ino zor û zehmetêyi ki pîl benî, hi dêrunîya yînî di û hi zî yê gedonê yînî di nehsêyêki viraştîbî. Heme şek û çeç bî la hi çimtersnaye û him zî binêkî rew rew çîy eye nêkerdînî, timî bi tererek tēyagêraynî. Çimkû çimê xo neçarêyi di, tahda di, zorêyi di, kîştîş û raçarnayîş di akerdibi. Çewî sey yînî bari kerdiş ra, veyşonêyi û tēşonêyi ra, merg û bermi ra, werwaymendîş ra û bone gêrayîş ra, sê yû sêkur mendîş ra çîy fahm nêkerdînî. Çew sey yînî çîy-

metê pîrî, datî, datizon, xal û xalizon nêzonaynî. Zaf mayon gedeyê xo ayî xapon û şeqalon di rapincnaybî la zafê ayî gedon zî ayî xapon di bîybî werê kerm û kêzon, teyr û teburî. Xora piyê Cindo zî inîn ra yew bi. Pêçekêkî şeqalon di bîybî, dergûş û gungilayon di gedeyêya xo nêviyarnaybî û tede yew hewn zî nêgîrewtibi. Asonêyi tahm nêkerdibi ki deruniya yîni zî bê mişgule bo. Çimkû zilmî ver dekewtibî koyon û şeqalon. Çimkû zilmî ver leyirê xo kerm û kêzon rê, mar û mişkon rê, teyr û teburî rê wer verdaybî. Çimkû kal û pîrê xo ino zilm di qûl û şeqalon di gonî gonî vergon rê bi destonê xo verdaybî.

Keyeyî ki wîtayon di mendinî, cuwîyena yîni hergû lem û kerron ver ra vilayî bî. Serron reydir leteyê cuwîyena yîni ayî lemon ver ra hewanênîyaynî. Terş û dewarî ki ayî lemon ver di arisiyaynî kerdinî qîrrî û barrîyi. Bi ina qîrî û barrîyi terşo yabonî, teyr û tebur, mar û mişk, kerm û kêz haya kerdinî ki wîta gunî rişaya, dej pirûniyawo û tersêkî esto xo ra hagîdarî bî, terekê xo veynî. Seki inodewar wendecayonê xo di milqetika hergû gedeyî, kal û pîrî biwanîyo, heme kerdon ra hagîdarî bî. Seki derdê vere hergû lemi, kerra, helûsiyi û deyeyî derî biro vaceyîş! Seki hemin dir bikewî pêkewte û yew bi yewî bieşnawî. Hilla ki gede veyşon bîynî û waştinî ki maya yêyî yew wita şitî qirriki di bikera la kerde ca di nêbîynî ki bermiyê gededê xo rê biba daru. Gede mecbur mendinî ki bi rarê bermiyî waştîşê xo ca bîyero. Ge ge zî şertî ki tede benî yê neçarêyi, bêweytîyêyi, bê daru û dermonî bî. Gede zî mecburê bermî mendinî ki mar û pîrê xo şiyar bikero, nêweşêyi û veyşonêya xo te dir bari bikero, bi rarê bermiyî hagîdar kerdinî. Çewî zî nêwaştinî ki gede bibermo, çimkû cayê yîni veynîyaynî, deşîfre bîynî. Comîrdî cenîyon ser di şîynî û gedeyî bide hişkerdiş daynî. Eki gedewo kû nêweşîyi zor bider kerdinî, teyna çare bermi dest di verdaynî û

ki hiş nêbîynî bi rarê bê wijdonêyi omeynî hişkerdiş. Rarê bêwijdonêyo kû gede daynî hişkerdiş rarê gede fetesnayışi bi. Bi ino tewir gedeyî ki hetê maronê yîni ya hiş kerdibî, yew bi yewî ra behs bîynî, mertewala yîni ma wirdîyonî rê vacîyaynî. Ge ge zî gedonê dihîrî serron ki waşt maronê xo ra cay çîy biwazî û ki verapersê yîni “çinî yo” bi sew yîni zî bi bermi waştinî ki miradê xo ya biresî. Gedon ki ona nehsêyi ki kerdinî tira vatinî ki mebermî, “leşkerê Romî” yeno. Eki ti bibermî, tu benî û kişenî, ino tewir ma wirdîyî gefî dîyaynî û daynî edelnayış. Hetta behsê yew piçeka-ki hetê mar û pîrîya ters û xewfî ver binê lemi di xo vîrî kerdibi û dewijî ki yîni dima wêra ra vîrenî dîybî û berdibî radestê wayeron kerdibî, ma rê mertewala yayi zî vatinî. Xora ma zî aya cenîka resayî û ge ge bi fekê xo zî mertewala xo ma rê bi bermi, bi ters, bi xewfê ayo waxtî waywelikon reydir vatinî.

3

Ino serehawanayeyî Amedi, Çewlîgî, Xerpêti, Muş, Bêdlês û heyonî Sureki sewmê xo vila kerdibi. Çewî rutbeyê Delu Fîkrî ra çiy nêzonaynî la cerebonê ayo roc û yê êro ra kî ki ewnîni genaralonê arteşê Tirkîya ra yew bi. Înêyî şik komî ra biberdîni derî xelasi çinî bî. Hewawo kû ters û xewfê xo ayo honqar ra vila kerdibi, verînon vatinî ki ayo ters û xewfî ver mîlçikî nêwatonaynî cadê xo ra firrî, wîçwîça teyrî tefîyaybî. Mar û mişk nêwatonaynî ki qûla xo ra teber vecîyo, serê erdon ra yew gonî nêwatonaynî ki cif bigîro, terde yêyî ver hes û bes yew gonî rû nêkewtinî. Heme gonîyon ayo zilmi ra bara xo mirdîya girewtibî. Rocêkî Delu Fîkrî Seredê mezêlê dewi di beno, koyê Şêxî ra yew gilzeyê adirî wardeno, yeno şono Zîyareto kû mîyonê dewi di yo, şono het. Yû ayo adirî mereq keno dewijî ki derî mertewala ayo Zîyaretî û hukmidê yêyî kenî, pey huweno, qeşmerêya xo keno, şinik veyneno. La ki şewi bider yena, hewnon ser di perrîno û heyonî şefaqlî qîrrî û barrîya yêyî bena, gillîya xo pêranêno, tewir bi tewir ra hewlwelaqon mîyon keweno.

Şefaqlî ki beno dewijon ono pîser, çîyo kû şewi nêverdawo gillîya xo pîrano tedir bari keno' û wazeno kû xo ayo ters û xewfî ra bifeletno. Yî zî vono ki gay ti destnimacê xo bigîrî û şîyerî Zîyaretî ser. Wêra di qomî nimac bikerî û efo û maxfîretê xo verî bawkalonê ma ra û dima zî şardê ma ra biwazî ki ti asar yew tengone ra bifeletî, nî ki xelasa tu çinî ya, bawkalê ma pêşê tu verranêdono. Yû zî vateyê dewijon sero şono destnimacê xo gîno û şono Zîyaretî ser. Hilla ki dekeweno zerre seki yew veng goşonê yêyî rû war şîyero, tira vono kû gêjo ti qomotan î la wayerê ino erdon nîyî. Ino zilmo kû ti îni belingazon û bêqomon kenî, kom wijdon wedereno kû ma wederî! Eki ti ona

dum bikerî, ma kû verê tu pey û peyê tu zî ver bikerî. Biewnî dormereyê ina dewi dekerde Ziyaret î, heme kal û pîrê îni belingazon î û vîyeyê tu dinya, axiret verranêdonî. Wa hêş biro tu sere, hima ca di wîta ra ragêri. Yû zî hima lezi lezi yeno leşkeronê xo pîser keno û dewi ra serecêr beno, nêverdono kû yew leşker zî xo ra pey biewnîyo û remeno. Hima sewmê ter-teledê Arminîyon nêwederîyabi, kerdeyê şerrê Elîşêrî vîrî ra nêşibi, ino ki zî sernîyeno şarê kurdî rê mergê mergon hesebîyeno.

Cenîyonê firrê şerron vatinî ki xelaya ki gede û extîyarê ma qîrr kerdibî, ma mecburê toyî kirrîjali ontişî verdaynî ki nîyena vatiş. Ma koyona galor nêvardabi werontibi û kirîştibi keyon. Ino galor sereyê kokîdê yêyî sey pîyozi bi. Ino sere ma şitînî wîrdi wîrdi kerdinî, tînci vera avistinî û wişk kerdinî, dima destaron reydir tehnaynî û ki ma neçarî mendinî, ma sey ardonî alawitinî, tewqî sero pewtinî. Bi nêtê nonî zî ma daynî gedonê xo. Hinî ayo îmkon zî nêmendibi, çimkû çewî ko di galor nêverdabi ki keye di zî mende bo. Sureko ki qûtê kerg û dîkon bi qet nîyomeynî werdiş ma çewî dest nêkewtinî ki ma gedonê xo xela û xeza ra bipawî. Surek qûtê kergon û werê teyron o. Rocêkî dewi di yew cenîyi gedeyê yayi tira şomî wazenî. Yayi zî zonaynî ki çare çinî yo, çand hebî kerron dekena tencere û adirî sernona. Kerreyî awi di kelîyenî, gedeyî ki veyşonêyi ver bermenî maya yîni tira vona ki mebermî, biewnî mi şima rê goşt tencere kerdî û ez ha şima rê goştawi hederneno. Eki pewjîya, ez şomîya şima zî ronona la ona nêbi, gedeyî nêmeyê şewon di veyşonê ver merenî. Heyna rocêkî yew rayon welatê serhedî ser di yeno wazeno kû vîro welatê xo ser û xo keyeyê xo na biresno. Barayîya ki Asur ra bigî heyonî Îskenderî rayerê ticaretî biya û çerray xalî zî nêbîybîya, heyna ayo hind zî wareyê vergon û cinawiron bî, mîrikêkî xo barayîya resneno la ser

nêkeweno. Vewri sey simerî war kerdibi û hergû pertalê yayi zî sey lepa hêşî hewa ra pertaleki kerdinî, yew tipî têrabena ki lacek nişîyeno sereyê xo hewano, serdê vewri ver bi astora xo na qefelîno û bindê vewri di nimînî. Çand rocon dima vewri ki heliyena cenîyê dewi astorî aqilînî û gala bider kenî. Bi necaxon astori şiqî kenî û yemnû ra bari kenî, benî keyon di gedonê xo rê pewjenî.

Sey îni mertewalonê gonriznayon seyon reydir mertewalî cuwîyaybî. Bi vatiş û nuştiş pirtûkî qêm nêkenî ki merdim binuso. Bi axê asar mertewalon zafê maronê ayo demeyî tertele dekewt bider û ridê erdon ra bar kerd şîyî dinyaya bîyni. Û xo ra pey ayo hind aqobetî nedîyarî verdaybî ki hima zî ma mîyon di qala yîni bena, sey astikon û mertewalon vacînî. Bi îni dejon ayî ki tira pey mendibî, goma ki yabon şîynî vengê deyiron, bermi û nalîya yîni koyon pulisîyaynî. Hesrê yîni zî lay û laser bîynî û alişkonê yîni rû se-recêrê sinedê derdon bîynî, dima leşa ki derdon ver kujilîyaybî tirû warkerdinî binê ningon. Bi waywelonê yîni goşt û esteyê merdimî rizaynî, kerre û ko helîyaynî, velg û vaş wişk bîynî, teyr û tebur waredê xo ra terqizîyaynî.

Şerrê Osmanîyon û Orisî di comîrdo kû destê yêyî çek tepîşt, girewt binê çekî û berd cadê şerrî. Îni comîrdon ra se di yew peyser nêagêra, ayî ki zî peyser agêraybî inî xo wayerê siûdî hesabnaynî la çîyo kû cadê şerrî di ontibi û ayî ki dewi di cîrîyabi diyî, hinî yê xo ra şermîyaynî ki vacî. Çimkû dewijon, xalib zî cenîyon û gedon çarenuso kû tahm kerdibi, derd û belayî sere di omeybî yê vatiş û eşnawitişî nêbi. Veynayoxon ra zafî pey teterxon bîybî. Ayêyî kû xo ra pey may û piyê xo, kulfet û gedeyê xo, dat û inca xo, xal û xalcinîya xo, emi û zomayê xo, xalîza û datîzayê xo vinî kerdibî, bi îni dejon mat mendibî, kerr bîybî, lal bîybî, gêj bîybî û kuçon kewtibî. Komî kû

zî îni belingazî dîybî yew hetê yêyî nêmcet û bi mer-
 tewalonê xo yê nimateyon dinyaya gêrayî. Firrê çerxê
 vîstinî ne gêraye, ne wende û ne zî zonaye bi. Teyna
 dewa xo û dormereyê dewa xo zonaynî, cayîna ra zî
 hayadar nêbi. Bêxeyra leşkerêyi teber vecayiş nêzo-
 naynî ki çina wo û çi tewir o. Teber vetişê yîni zî ya
 arîye bi û ya zî veyveyê dewon bî. Ino semed ra firron
 teng dîybi, teng veynabi û teng zî ewnîyaynî. Cuka ki
 ne welat û ne zî birayê xo aqilîyabi, hind dîy ki welatê
 yêyî çimonê yêyî ver di hewawo kû verg leşi lete lete
 keno û erd ra çirçîbelayî keno bi ayo tewir çimsuron
 zî welatê yîni lete lete kerdo û xo miyon ra bari ker-
 do. Ayo beyntare di hind veynenî ki Dersêmi di ter-
 teleyêki bêsalixî ronîyawo. Hinzaron reydir kal û pîr,
 cenî û comîrdî, zar û zêçî sungîyona bîyî û tirmê yîni
 çemê Mûnzurî di têsêr di qelebîyaynî.

Hewton reydir Mûnzur sur herrekîya. Qesbaya
 Mûnzurî newerna sîya û soti bîyi, awa çemê Mûn-
 zurî qirrika yêyî rû war nêşîyi, çimî sere di beliqîyayî
 û sey qoçikon bîyî. Homadê xo ra gazincîyaynî, va-
 tinî ki werrekîna mi dejê dejon bidîynî la yê îni zar
 û zêço ki sunguyona biyo mi nêdîynî, mi nêdîynî ki
 verî tecawuzê maron bîyo û dima zî qesbaya gedonê
 yîni seredê sunguyona kay dîyaya. Mi nêdîynî, mayî
 ki digonî bî û pîzeyê yîni bi sunguyon şeqrîyawo û
 nêmgedeyê yîni tira vetî û tehton rû onciyayî mi derî
 şadeyêyî nêkerdîni. Gunîya ki mi ra herrekîyaynî
 werrekîna qesbada mi ra biherrekîyaynî. Leşî ki dar
 û berona mendibî teyna leteyê leşa mi bibîynî. Neyarê
 zilmdarê zonaynî ki cenîyi wecax romitox a, sey xo-
 zayî xeleqnayox a û gedeyê maron zî wecaxî miqomî
 kenî, nêverdonî ki eynîyê netewi bipeyso, zûwa bibo.
 Ino çarenuş ki zî yê ayî bîynon wenîya raşta çewî
 ranêkerdîni ki firrê vîstinî rabikero. Bawkal û dapîra
 Cindoyî, may û pîyê Cindoyî senî gonî mendî û senî
 xo asar yew rocî ya resna ha werte di yo. Cindo ki zî

sey rocê yîni yew roc, sey aqobetê yîni yew aqobet, sey çarenusê yîni yew çarenus ki veyno. Çimkû rapinceyîşê Cindoyî bi mişguledo gird ra vîyertibi, qirrî û barriya mayon asmîn şeqnaynî, kerre û ko helnaynî, darî veşnaynî, deye û helusîyî war erdinî. Asar yew demeyo dejin merdimî rê çî tewir yew aqobet ki nasîb bikero! Çerray yew wesla ayo firrî xozada xo di nêgurîyaynî. Hindo kû zilmi di meleqîyaybî, hindo kû çimon şadêya çiyonê nêweşon kerdibi, hindo kû tîni dej di sebexîyaybî, fek û didonon bermi ra teber nêzonaynî ki huy çina wo! Hetta huy xo rê îxanet hesabnaynî, qestê rihê merdon dîynî.

Firrê serehewanayeyî hinî omebi 10-15 serronê xo gûnabi. Hinî kar û gure zî tira omeynî, qal ra zî fahm kerdinî. La cirîyayeyî ki neyarî kal û pîron, mar û pîronê yîni sereyî ser di erdibi, neçarêya ki mîyon vistibi derî ecîb û zor omeynî. Hinî zonaynî sewal bikerî. Gelo çina ra ihind zilom, merg, kutiş û kîştîş, welat ra raçernayîş, çî semed ra yo? Hindo kû yew ters û xewfo xişn vila kerdibi, zorî destur nêdabi ki çew serebutonê welatî ra behs bikero û firrê peyenî pey hagîdar bikero. Çimkû pîl û şinikî, cenî yû comîrdî, zar û zêçî halo awerte di çimê xo akerdibi. Çiyo kû dormeredê yîni di qewmîyabi yê şerrî ra teber ê çiyînayî nêbi. Tahlêyi, tirşeyî û nêweşeyî ra vîşer çiyîna rê şadeyê nêkerdini ki weşeyî û rindeyî sero bivaciyî yan zî pirû mijulî bî. Xora yîni rê firrê şerrî vacîyaynî. Ayo semed ra ewnîyayîş û veynayîşê firrî teng û tîndar bi. Ayo roc ra heyonî nêmedê çerxê vîstinî neyarî û emperyalon tîmîyon di yî belingaz, bêwayer, bêpaştî, bêhêz, bêduzi, bêcîgerayîş û bêardiberêyi verdabi. Hinî teyna kurdon mîyon di zî nê, dinya di yew vengê nêpewjnayîşê bi ino zilm û zordarêyi rê nêredîyayîş berz bîynî. Serron 68 nawitinî. Firro ki zî asar nêredîyayîşon veceno aver derî vacîyaynî firrê şêşt û hêştinî. Xebatî ki bi pişengêya Şêx, Seyîd û Mîreyon ve-

cîyaybî aver zaf zî Kurdonî rê xelasi nêerdibî, raro kû tede serfiraz bibî vernênîyabi. Qifli kû neyarî, dek û dolavonê yêyî fahm bikero û halê şarê xo zî weş tahlil bikero tede çinî bi. Hetta rarvistêya ki merdim tira bişîyo behs bikero zî hima hima çinî bî. Eşîron senî hewa kû riza diynî bi ayo tewir paştî vecîyaynî aver.

Merdim şiyeno Mîr Bedîrxanî, Şêx Mahmud Berzencîyî, Seyît Abdulqadirî, Şêx Seidî, seba şarî xo feda kerdo la nişîyaybî seba welatî yew rarvistêya hemini virazî. Çimkû asar yew rarvistiş qiflê Şêxon, Seyda û Mireyon ra vete bi. Sebebê parçe parçe beyîşî zî gorebê şert û şurtê rocon têyanêgêrayiş bi, mîyonê Kurdon di yewêyi nêronayiş bi û kihinperestêya bêhimtayî bî. Yew qala verînonê Franson a “Kom netewa ki nişîyayî xo vacêr (perwerde) bikera, xizmetkarêya serdeston rê xelaqî monena.” Şarê Fransa seki ina qali seba Kurdon vaco. Kurdon zî ino moj yew qali vata “Eki ti xo rê nêbî, ti kû bibî bara werê şarî.” Ino semed ra ewnîyayîşê ol û mezhebî nêverda ki yî raştêya welatî û yê xo veynî. Hilla ki merdim şarê Persî ra, qewmê Hz. Musayî ra ewnîyeno asar yew dehkera hîna weş fahm bena. Tirkon zî “Türk İslam Sentezî” reydir yewêya xo hîna şidînayî la teyna Kurdon ol û olperestêyi ra yew havili nêdîya, nişîyayî xo gore şîrove bikerî û yew fesali biderdî. Neyarî zî asar kihinperest ewnîyayîş weş kifş kerdibi û mîyonê Kurdon di zî hewl gurîna û hima zî gurîno. Serokkomarê Tirkîye Süleyman Demîrelî serehewanayeyê Kurdon vîst û hêşt yê verîni û ino peyen zî yê vîstê newini nome kerdibi. Hilla ki kapîtalîst modernîte aver kewt, dinya ra vila bi, netewdewletî pirûnayî Kurd seba kihinperest vindertişê xo tira camend, imbazon dir nişîya xo zonaye di bi xemelno, newe bikero û şarê xo zî çirax veco.

Ino semed ra veceyîşê firrê şêşt û hêştî, vengê firrê şêşt û hêştî Kurdon rê hîna zêdî weş ome û goş-

tarêya yînî aver veti. Ino yew ewnîyayişo newe bi û çîyo kû zî vatinî hayaya cenî, xortî û ciwonî, dewijî, citêrî, karkerî, teqawitî, bindestî, toynetewon ûab. kaşkerdinî xo ser. Palokon di karkeron dawaya heqê sîgorta û sendîqayon vet aver û riki kerdi, dewijon zî herra ki axayon dest di bîya waştinî ki dewleti yînî ra bigîra û mehtacon ra vila bikera. Û dewijon seba nahfa xo dawaya herri gurînayişî dayi xo ver. Xebatkaron vayayêya ki esta û çew nişîyeno rakero verba yayi meş û mitîngî ronayî. Wendoxon dawaya heqê bêpereyî perwerdî û wendişî kerdi û nêhediyayişê xo bi rarê nuştîşî sero hîna vîşî da şûxilnayiş. Cenîyi zexto kû sero bi verba yêyî bi zîhnîyetê neweyî vinder-ti û dormere hagîdar kerdi. Cayî ki bêawi yî dawaya awi vetişî û tira havil veynayişî kerdi. Teqawiton zî seba dabara sisti vengê xo berz vetinî. Înî heme vatiş û eşnawitişê firrê şêşt û hêştî bî. Mafdaron û bindeston pîşengê zîhnîyetê yê neweyî xo rê hêvîyi vijînayî. Heme şaristonon di, şarçeyon û dewon di sey lay û ruyon bindestî têyaresaynî û yînî rê paşmîrêyi kerdinî.

Heyonî yew deme ino nêhediyayiş bi pîşengêya "TSÎP" virazîyaynî. La yew deme ra pey ewnîyayişê "TSÎP"î qêm nêkerd û "TSÎP" mîyon ra sewbîna fraqsîyonî vecîyayî. Ino zî merdimê zîhnîyetê neweyî, Tirkîya senî veyneno û çand netewî veyneno? Pergalê Tirkiye çi tewir nome beno? Sosyalîzmî ra senî ewnîno û kom duyelon sosyalîst veyneno? Kihinperestêyi û kapîtalîstêyi kura di veyneno û verba yînî çi tewir yew têkoşîn hewcî veyneno? Înin sero xo perwerde kerdinî. Çîyo kû şarê rê wesî kerdinî bi rarê kowar û pirtûkon vetinî aver la xebata ri bi rîyî zî apey nêdaynî. Heme parq û qahweyî warecayê yînî hesebîyaynî. Xora dewleti zî seba kû ina neweyêyi rê têbeya nêbî, toyî Partî û Fraqsîyonî zî bi paştîya dewleti verba yînî perwerde bîybî û hergû roc mîyonê ciwonon di xir-

pevetiş û alozêyivetişî dima kewtibî. Roc çinî bi ki ya yew çand raştgirî ya zî çepgirî hetê “Mit”îya nîrî kîştî. Gladyoyo kû omebi guredar hergû roc karî sero bi. Roc çinî bi ki palokon di grew nêvirazîyo, meş û mitingî nêbî.

Dewleti ewnîyayi ki nişîyena aver vecayişê çepgiron û demokraton bigîro, xebata darbeyî ser ra gêrayî û hetta generalê xo Tahsîn Şahinkaya erşawitbi Omerîqa. Hilla ki Tahsîn Şahinkaya wêra ra agêra, leşkerêya Tirkîye “Genel Kurmayî” dest bi meclîsî serna û darbeyê duyesê İloni ilan kerd. Ino darbeyî zaf ciwonî êştî peyberon û dari di kerdî, tira toyî zî benasat kerdî, bira çewî nêzona ki çi aqobet omewo yîni sereyî ser di û tirmê yîni zî wayeron dest nêkewtibî. Hima zî seba îni vînîbeyon may û piyî çalakîyon virazenî ki tirmê gedonê yîni radestê yîni bibo. Tirkîye darbeyon ra xeyr dîybi, des serron di hewi darbe virastînî. Xora darbeyê 1971î pişengê çepgirêyî ki vecîyaybî aver Deniz Gezmiş, Huseyin İnan, Yusuf Asalan dari di kerdî û İbrahîm Kaypakkaya binê çimî di bi eşkence kîşt û yew bêvengêyi şarî mîyon di servisti. İbrahîmî yew xo verodayişo pîl nişon da. Va ki “Sere dîyeno la sir nêdîyeno” heme çepgir û şarê bindestî rê ino vindertiş bibi yew moralo xişn. Denî zî va ki “Bicuwîyo, birarêya şarê Tirk û Kurdî”. “Hakî Karaerî zî va ki; heyonî ki Kurd bindestêyi ra nîro xelesnayiş, Tirkî rê zî xelasi çinî ya”. İni vatişon hi vernîya devirîyayişê demokrasîyî akerd û hi zî birarêya Kurd û Tirkî şarî vîrî visti, demeyî mîyon di qasidî kerdî.

Dîrokî di tîfaqêya Kurdon û Tirkon newerna veti rocevi, sero pêkewteyê neweyî virazîyaynî. Sey tîfaqê Selçoq Begî û Kurdon, sey tîfaqê Yawuz û Kurdon, sey tîfaqê M. Kemal û Kurdon. Ina hewi îni pêşengon waşt ki ino moj yew tîfaqî ra teber tîfaqo ki birarêya raştkîni vecono aver, ê heq û hiqûqî veceno aver, ê edeletî û aştiyêyi veceno aver pirû mijûliyayî. Çi heyf

ki asar yew tifaqî ra serdestê Kurdon û emperyalistî tira tersayî, çepgir û tifaqê şarê bindeston xo rê taloke diyî, hima cadi waşt ki bifetesnî, darbe viraşt. Hetê dîrokşinasîyon ra vacîyaya, birarêya ki mîyonê Tirkon û Kurdon di esta bi asar tifaqon vecîyaya aver û êro zî tira behs beno. Zonîyaynî ki tifaqon reydir Kurd û Tirk êro rocîya resaywo. Denîzî û pêşengonê şoreşgeron newerna ta û taqet defist ino ewnîyayişî. Eki êro zî Kurd û Tirkî mîyon di yew şerr nêronîyawo sew sewmê ino ewnîyayiş û devirîyayişê Kurdî yo kû heme şarî bira veyneno û hetê têyagêrê azadiya zî xeta raştî esas gîrîyaya çimî ver, bara xo zî devista. Îbrahîm eşkence ra nêvecîya, Deniz, Yusuf û Huseyîn 1972 di 6'ê aşma Guloni di dari di bîyî, tira pey vernîya dari di kerdişî abi û darbeyê duyese Îlona 1980'yi di deson reydir ciwon dari di bîyî. 1973-4 ra pey Tirkîye di bi xişn kerdiş zî bibo behsê hêştay hebi fraqşîyon bibi. Fraqşîyonê ki vecîyaybî seba kû tahlilê ki derheqê Tirkîye di bîynî ayo gore zî yî tewir bi tewir ra bî. Toyini Tirkîye di demokrasî esto û sosyalîzm hewcî keno vatinî. Toyini vatinî ki demokrasî çinî yo faşîzim esto û gay devirîyayişê demokrasî ra teber zî yê sosyalîzmî bîro dayiş. Toyinin zî vatinî ki Tirkîye di mişguleyê Kurdî esto, eki ino mişgule çareser nêbo ne Tirk û ne zî Kurd nêxelesîno.

Ino moj hergû fraqşîyonî tahlilê xo bi rarê nuştî û eşnawitişî bari kerdinî. La seba duyelonê dinya zî û seba pergalê dinya zî pêkewte û tahlilî virazîyaynî. Emperyalîzm çina wo? Kom duyel emperyalist o? Kapîtalîzm çina wo? Kom duyel kapîtalist o? Faşîzim kom duyelon di esto û çi moj o? Kurdon semed zî; hal û waxtê kurdon çina wo? Cawo kû kurdî tede cuwîyenî tira çina vacîno? Asar pêkewteyî Zonayecayon ra bigî heyonî dewon çherpay romitinî. La qala raştî hilla ki behsê cadê Kurdî bîynî zafini sero sere masaynî û muyê yînî sero sey teliyî bîynî. Hîndo kû

xuy kerdinî, tu gonê yînî tira bigirewtinî sew derî hîna hewl bi seki ti behsê cayê cuwîyayîşê Kurdon kenî. Vatinî ki; eki ca nome beno sew xora nomeyê yêyî esto û “Doğu ve Güneydoğu” yo, qedîya. Çîyna vatiş Tirkîye lete lete kerdiş o û ino zî sucê “terorîsteyî” yo. Oxmo kû welatê Kurdon lete bibi û çewî nêwaştinî ki bîro zonayîş, çew zî pey ino lete beyîşî dejaye nêbi. Waxto ki zî Kurdon qala welatê xo yê letekerdişî kerdinî zî ina hewi bîynî “terorîstê” mîyonnetewî.

Toyî fraqşiyonê Tirk û Kurdon vatinî ki beno kû hetê dabara toyî cayê Tirkon zî apeyverdaye yî û merdim şiyeno vaco kû hetê dabari ra yew seycîyeyî zî esta. La mişguleyê Kurdî teyna dabari niya û xalibê welatê Kurdon di raştaraşt yew paloka zî çinî ya, herunda yînî di hinzaron reydir qereqol virazîyawo, gedeyê Kurdon bi zonê xo nişiyenî perwerde veynî, romiteyî sero zext esto, nomeyê dew û şaristononê Kurdî bê yînî û bê sebeb bedelîyayî. Înî hergû sebeb seycîyeyî nêvaynayîş o, yew çim ra nêewnîyayîş o. Waxt ki vîyertinî ca û rêça îni fraqşiyon zî zelal û zude bîynî. Zafê înin bîyî partî, ayî ki zî nêbîyî partî xo tasfiye kerd û sewbîna partiyona niyayî. Xalibê înin hîrî tewir ra ewnîyaynî merselaya sosyalîzm û demokrasî ra. Toyini vatinî ki; demokrasîyê Ewropa heme mişguleyon çareser kena û besê ma ya, toyini ino nîzdî beyîşê liberalon û zengînon dîynî û vatinî ki pergale Orisî oncax îni mişguleyon çareser bikero û ayî bîynon zî yê Orisî revizyonîzm dîynî yê Arnawud û yê Çinî raşt dîynî.

4

Cindo firrê şêşt û hêştî ra hesebîyaynî, çimkû ayo deme tolaz bi û newe zewecîyabi. Yew demewo kirri ra pey barê yêyî zî giron bi, nêwazeno kû tengoneyê dabari kû kulfetê keyedê pîlî ontibi yû û kulfetê xo na zî bioncî. Kar û guredê xo dima zaf perraynî, çîy sey dalamati avzel nêdîynî. Hetê herra xo ya zî şidînaye bi, romiteyê şarê xo zî sey erd û herra xo vetinî aver û avzel ewnîyaynî bider. Waştinî ki dîrok û erdnîgarîya welatî zî sey zonî bizono û bicuwîyno. Erdinî zon ki kal û pîron ino zon û romite senî ma ya resna, gay ma zî ayo moj turnê turnonê xo ya biresnî û hasasiyetê xo timî binawnî. Ayî vengbeyîşê dewa yêyî ki vîrî kewtinî, hîna zêdî erjonê welatî sero hasas bîynî. Efo kû dewleti seba surgunonê serehewanayon vetibi û surgunbeyeyî ki agêrayî welatî ser di tira Şêx Meydîn omebi dewa yîni. Şêx Meydîn serehewanaye ra pey surgunê Orisya bibi û serron reydir wêra mendibi. Hetê weşeyî û dîrokîya vacêr (perwerde) veyneno û gelekî xo aver beno. Vatişonê verînon gore nêweşonî rê reçete zî nuştinî. Dewi di heme waxt cematê yêyî giron bi, yew biwarîştinî ayo bîyn ronîştinî. Qerebegon, Xûlomon, Pali, Piron, Hêni ra şar omeynî het û tira şîret degirewtinî.

Ayînin ki Şêx bêwayer nêkerdinî tira yew zî Cindo bi. Timî bara kar û gureyî yê dabari yîni ciwononî rê kewtinî. Adir ra, awi ra, zad û zexîre ra çina hewcî bikerdinî bê waştîş û vatiş derî caerdinî. Hewcîyêya perwerdî û zonayêyî ferq kerdibi û şew û roc ino semed Şêxî vero veşaynî. Şêxî vatiş û eşnawitişê xo di mallayon ra cigîraynî, tira zaf heredîyaynî (cigirîyaynî). Zafê yîni herê pirtûkon nome kerdibi. Ono zon ki çîyo kû ayî pirtûkon di nuştewo verîcûyî perzin ra vîyarnî, zelal bikerî û bahdîcûyî şarî rê şîret ronî. Şarê

ma hetê zonayeyîya veyşon û teyşon o. Gay merdim hewn, keyf û kîberîgêrayîşê xo îni xeyalon di bimeleqno. Cor ra cêr xeyalê şîma wa asar vindertişon di bixemelîyo kû vatişê şîma zî, wa şarî rê şîrîn û raşt bîro. Ina dalamati ha milê şîma wenaya ya, şîma zî barê xo bizonî. Şêxî şîretê xo di avzelêya cenî ra zî timî qalî kerdinî.

Çîmkû duyelona gêrabi û barê cenîyi senî giron û aver o, dîybi. Ina avzelêyi vetinî aver ki wa cenîyê kurdon zî cematî di, cuwîyeni di ristê (rolê) xo bidî pewjnayîş û zar û zêçî zî vîşêr zonaye bikerî. Şêxî tebera veynabi ki kom netew ya zî cemat û çî moj vecîyaya aver û ningonê xo sero senî vindena? Ayo semed ra hayaya hemini ontinî ristê cenîyi ser û waştinî ki cenîyi bi taûtaqeta têyabigêra. Zonaynî tahda ki cenîyi bîyi, zext ki cenîyi sero ronîya, cenîyi ki şegezniyayi nêmeyê keyeyî di weşeyi, keyf û mirûz nêmoneno. Eki îni zî ki keye di nêgurîyayî, nêşixûliyayî cemat zî pey apey moneno, pelşikte moneno, timî xo mehtacê çiyêkî veyneno. Cawo kû tede mirûz çinî yo, heskerdiş çinî yo, şînayî çinî ya, keyf û weşeyi çinî yî, gonîyo kû dormere di cuwîyeno bara xo zî ina nêweşeyi ra gîno. Veyneno kû merdimê îni cayon gizma têyagêrenî, gizma wardenî û roşenî. Daye û girewteyê xo gizma onî ca û derî ferasetê cuwîyeni zî teng kenî. Eki merdim înin avzel veyno neyarêya ki mîyon di esta rakeno, alozêya ki virazîna puç keno, verpêgûnayışo kû qewmîyeno tasfîye keno, tahlêyi û tîrşêya ki mîyon ra çengeleki kena yew bi yewi wederneno. Kerdeyê xirabî karê xedirkaron î. Kî ki vernîyi kerdonê xirabon ki girewt, xedirkarî rê ca teng beno û zaf zî çiy nêmoneno.

Çîmkû weytîya xedirkarî nezonêyi û xizonêya kî ra yena. Eki merdimî milê xo xedirkarêyi rê rakerd, çiyê weş ki xo di kîşt, hînî derî sala destê yêyi monena kû şew û roc bilêso. Cuka ki Şêx cenîyi mîrazê

heskerdişî veynaya, estuna keyeyî veynaya. Hilla ki merdimî cenî ra heskerd, xoza ra heskeno, eki xoza ra heskerd gonî ra heskeno, eki gonî ra heskerd yemnû ra heskeno, eki yemnû ra heskerd yemnû dir şerr nêkeno, eki yemnû dir şerr nêkerd kîştîş, raçarnayîş, zurîkerdiş, dek û dilavon dimabeyîş, benesatbeyîş hewaniyeno, rabeno. Zonaye û xûlqo kû Şêx Meydîn dormere ra vila kerdibi serron reydir sewmê xo dewijon sero viraştîbi.

Şarê ayo çoşmeyî (dormere) xo kîştîş ra, xo niheqêyi ra, yewî virîyayîşî ra timî durî girewtinî. Heme niheqêyi seracêr biybî û hetê dereyîya leyri dîyaynî. Comîrdo kû polê zor û zordarêya, xirabêya vindertinî hînî xo ra şermayaynî. Mûzirêyi û hasudêyi cengar gêraybî, çewî imel pênerdîni. Ino xûlqî heyonî 1960 romit. Tira pey yew dewijî bisilmaya (xizmetkari) Şêx Meydînî remnayı, yû zî dewijon ra herredîya û barê xo wena şî Kelxesîya Xolomonî di rona. Heyna zî çewî yû teyna nêverda û çina wo kû dewijon ra ome derî teksîr nêkerd. Sewmo kû çoşmedê ayo honqarî di viraştîbi firrê 68 û 78î zî tira havili girewtîbî. Bi veng û sewtê berzî şarî behsê serehewanayedê Kurdon kerdinî. Tahda û zordarêya ki şarê kurdî biynî hînî raştaraşt yew vate bide wenîyaynî. Çina ra şaristonê kurdon di yew paloka nêvirazîna? Biynî dehkeraya vatiş û eşnawitişê cematon. Çina ra hergû cawo stratejîk di qeraqol virazîno? Cematon di vacîyaynî û fahm zî biynî. Çina ra ki gedeyê ma bi zonê xo perwerde nêveynî û yemnû dir tênonê xo bar nêkerî? Çina ra ki tahda merdimî bibo û yew sewal zî kerdixon ra nêpersîyo? Verarocikon û comîyon ver di rocewê dewij û karkeron di asar ewnîyayişon ca girewtinî. Verê vijînayedê şaredarîya Amedi Mehdî Zana seba vijînayîşê xo dewî zîyaret keno û ino halî ki veyneno, dewî semed “Verarocikon şima rewîna germin kerdî” vono. Înî verarocikê şima sey yew kulîscayê sîyasetî

guriyenî û aver rocê dewi zî xirab nîyo. Hilla ki tira behsê Fîlistînî keno, veyneno kû sey yêyî û imbazonê yêyî yînî ra hagîdar î. Şîrovevî kû zî kenî yê sîyaset-medaron ra apey nîyî. Seba firrê şêşt û hêştin zî toyî sewalon kenî wêra di zî xirab nêfîkrînî. Ino moj vindertiş roc bi roc hîna vîşî aver kewtinî.

Çîyo kû ino firrî tira behs kerdinî weşê bindeston û Kurdon şîynî. Emperyalonê kû welatê yînî çêher leteyî kerdîbî, sey Omîrqa, Oris, Almanya, Ingiliston û Fransayi; xizonêyî, belingazêyî û neçarêya ki yînî mîyon ra vila kerdîbî firrê 68'ini yew bi yewi erdinî zon. Tirkîye welatê Kurdon û Tirkon pîya wo, wîta di çî heqê Tirkî esto yê Kurdî zî ayo hind esto. Kurd zî sey heme netewon wayerê şînasnomedê xo no û mafdar o kû bi zonê xo vacêr (perwerde) veyno. Axayêyî û şêxêya ki vernîda roşndarêyî gêraybî, wa êro ra pey çew hewîs bider nêkero û herra ki zî axayon dest di ya wa dewijon ra vila biba, hewcîkeron dir bari kerdinî. Milletê dinya heme kek û birayê cî yî, yew yewidê bîynî ra serêr nîyo. Wa kes xo kesê bîynî ra, cîron û dewijê bîynî ra berzêr nêveyno. Wa çew xo koşka berza nêrono û yê bîynon zî xo ra cêrêr bider nêewnîyo. Zewac zî yew konsesusêkî yo, komî ki waşt bizeweciyo gay bi zerrîya xo bizeweciyo, gay tede zor û bêzerrêyî çinî bo. Zoma û veyvekê neweyî wa bêdej, bêlej, bêduzi û bêdawa cî dir keye bikerî û pîya gedonê xo bi zerrîya xo çirax vecî. Heme ol û mezhebî bi birarêyî têdir bicuwîyî. Rindêyî û hewlêyî reydir yemnû dir vîyarnî. Xedir û callêya ki mîyonê ol û mezhebon fîynîyaya, wa heme bi eşq û riza xo mîyon ra rakerî. Asar yew ewnîyayîş û vatiş hagîdariya heme şaronê Tirkîye kaşkerd. Û zêdêr zî cenîyon, ciwonon, bindeston û toynetewon paştiya ino vateyî kerd. Ino zonaye ki bi destê ciwon û cenîyi ki vila bi dewleti zî ason nêvinderti. Berê zîndononê xo heyonî peynî akerd û roc di seyon reydir hetkarê îni fikron erzîyayî peyberon.

Wayerê ino veynayeyî ya kişîyaynî û ya zî rarê zîndonî gomî kerdinî, ya zî rarê teberê welatî yê duyelê xerîbon xo feka kerdinî. Heyna zî dewleti pey ason nêbîyi, zerrîya yayi pey hewnik nêbiyi û darbeyê duyese îloni viraşt. Ino darbe di dewleti çî tewir qirîterî esas girewtinî û zafêr kom fraqsîyonon ser di şîynî bahdê darbeyî serron reydir tira pey fahm bi.

Fraqsîyononî ki Kurdiston nêşinasna û sey yew honqarê Tirkîye dîynî û tira vatinî “Doğu ve Güneydoğu” eki îni gîrîyaybî binê çimî zî bahdî bê ceza kerdişî verradiyayî. La ayînîni ki Tirk û Kurd bira dîybi, welatê Kurdon Kurdîston nome kerdinî, Tirkîye di zî faşîzîm esto vatinî derî çikî zî apey nêda. Vîst, hiris serri ceza kerdiş ra bigî heyonî dardakerdiş di yew ters û xewfî mîyon nêkewti û zaf ciwonê bêsuc û bêguneyî dari di kerdî û ayî ki zî mendî serrê yîni, ciwonêya yîni tira terawiti. Heme honqarê Tirkîye di kerra kerra sero nêedelnayi la arizî Kurdiston di ciwon nêmend raçerîya. Xirabşonêya ki ronîyayi pirtûk û pelon qêm nêkerdini ki yewêki binuso. Bi dek û dilavon êştinî dewon û keyon ser, cenî û comîrdî zitûzilit kerdinî û la nehayê (qo...ê) comîrdona kerdinî bi cenîyon kaşkerdiş daynî. Eşkence û bê heyayêya ki welati di pirûnaybî tarîh di qala yîni nêbîybî. Ciwonî ki ayo darbe di benasat bîybî hinzaron reydir bî. Vatişon gore kura di yew qereqol bi, dormeredê yêyî di zî yew mezelo monîkin virazîyabi, lay û rûyî zî sey mezelon gurîniyaybî. Tirmê îni benasatkerdoxon awa ayî layon û rûyon di yew deme ra pey erziyaynî kişti. Hergû dewi bîybî wareyê waywelikonê mayon. Waywelikî ki bermî reydir vacîyaynî ko helnaynî, zerrîya merdimî sîya û sot kerdinî, verê merdimî pey, peyê yêyî zî ver kerdinî. Merdimêki asar yew dej dîy, serron reydir tewş bi, gêj bi, bi aya nalîyi sereqobatî pirûda, fecir kerd û mereynayî. Dêrdê derdon keyeyî da tahm kerdiş.

5

Rocêkî rocon ra yew roc erzenî keyê Cindoyî ser û tira çek wazenî. Nege bider kenî, vonî ki keyê tu di çek esto û gay ti ayo çekî radestê ma bikerî. Dewa yêyî di zî hirî çiyî ki vecîyaybî aver, omeybî vîrî: Ez nêzono, mi nêdîyo û mi nêşnawito. Binê çimî di çi hind tahda veyneno zî yû xo meht keno û vatedê xo di riki keno. Bahdî veynenî ki nege serê xo nêgîno bêduzi verradonî. 1980 ra pey dewi biybî wareyê zaftiyon û leşkeron, ason nêedelnaynî. Zafxereba beyîşê yayi zî kokê xo dîrokî ra girewtinî. Asar yew dewa dîrokîni kom ason edelneno kû dewleta Tirkî ason biedelno! Dewletî seba kû bindeston binê zextî di tepîşî ratim xewf û tersê xo yîni sero miqomî kenî. Nîşteçayon zonaynî ki kalê kalonê yîni asonêyi nêdîybî, yîni zî zaf nêpawitinî ki çew yîni ason verdo la heyna zî bêhêvî beyîşî rê rar nêakerdinî. Cuka ki paşmîrêya firrê 68'î kerdinî. Îskender ki welatî ser di yeno û îqtîdarê Pers û Medon ki rijneno beyntaredê yîni û dewijon di yew xo verodayewo gird virazîno û yemnû ra zaf peyeyon kişenî. Îqtîdarê Îskenderî ki zî rijîno Bizansî welat dagir kenî. Ina hewi dewi bena hedefe Bîzansîyon û heyna şerrêkî bêhimpa beyntare di virazîno. Qûla Romonijon" a ki dewi di nomedar a û heyonî verê veşnayeşê 93 'yî esteyê merdîyonê yîni tede bî, hima zî ha pay ra ya. Yî zî zilmo xidar rononî, Kurdon tarumar kenî dewi veşnenî û dewi raşonenî, dima mendeyî xoverodonî ki agêrî dewi û newerna cayê êroyenî di pirûnonî.

Bîzansî seba kû olê yîni û arminîyon yew bi tedir himkarêyi virazenî û Arminîyon cayonê stratejîkon di ca bider donî, hewînenî. Çimkû ol, mezhep û zonê Kurdon ra oncax Arminîyon fahm kerdinî. Bîzanson heme arminîyî bonderê hunerê deston zî kerdibî, şaristonon di zî vetîbî aver û heme huner û bazargonêyi

bi destê yîni bîynî. Çimkû erdnîgarî di xomî bî, xerîbê welatê neweyî bî. Teyna beyîş û mendişî reydir nahfa Împaratorêyi rew rew cayê xo nêgirewtinî, gay yew hetkar û himkar bibo. Ino semed ra Arminîyî xo ra nîzdî dîynî û cuka ki dewi, şarçe û şaristonon di aver vetî. Xemil û xêz ra bigî, dês û asingazêyi ra bigî heme wistayîyi bi destê Arminîyon bîynî. Dîrokşinasîyon gore ino gure yê seraqilêda Arminîyon nêbi, seba kû olê yîni yew bi ino ardim derî bîynî. Kurdon seba kû Bîzansî ra bixelesîyo Selçoqîyon di hewa verîni girewt û bi 15 hinzar peyeyî êştbi Melezgirtî ser û Romen Dyojen radest girewt. Romen Dyojenî zî bedelê zilmkarêya xo ino moj da. Ayo roc ra demografiya welatê Kurdon ge Îskenderî, ge Bîzansî û ge zî Abbasîyon bedelna.

Hergû şerr di Kurdon ki zilmê neyaron nêpewjna derî kerdinî sebebê fetelnayîş û raçernayîşî. Hezeka peyeni zexto kû hukmatê Özalî rona dewijon sey ayî şerronê verînon nêpewjna û nêredîyayîşê xo nîşon da. "Özal"î zî serronê 90'yî di dewî veng kerdî û Afganî erdî dekerdî şariston û dewonê Kurdon, dima zî çek lapa na, kerdî "Qolçî"(cerdewon) yî. Înî mertewalî zonayeyê şarê Kurdî ki vecîya aver tespît bîyî. Kerdeyî ki bîynî yîni çerxê vîstin û vîstê yewin di hinî nênimîyaynî. Kurdon ki xo rê televîzyonî akerdî û tede bêminet nawnayî, teşhîr kerdî, kovar û pirtûkon di ki zî bêminet çap bîyî, hinî fahmê Kurdî yê tengî cayê xo yê herayî rê caverda. Hinî hagîdarêya xo teyna nê, ê dinya zî ontinî inî beyonê nêweşon ser. Dima yew zext û zordarêya pîli rocnamegeron, xebatkarê asar cayon, roşndaron, pawitoxon, mamosteyon, tortoron û karmendonê tenduristîyi sero ronîyayi. Roc di hewi tira ya çand tenî gîriyaynî binê çimî, ya kişîyaynî û ya zî benaset bîynî. Dewa Zafxiraba di zî yew mamosteyo erjeye û pîzeveşn seba kû razî nêbi vengê Kurdî yê weşî bifetesîyo, çîyo kû zona û fahm kerd, dormeredê xo di tira behs kerd, yû zî qirbon dîya. Dewleti zonaynî ki ina roşnêyi welati ra vila biba vernîya Arminî-

yon, Qizilbaşon, Êzîdîyon, Suryanîyon, Gurciyon, Lazon, Çerkezon, Tirkonê bindeston, neçaron, karke-
ron û xebatkaron abena. Bi pêkewte, bi mişewre ya
zî rayerê sewbîna têserevistişî, qanonî birî bedelnayiş
sew dewleti fahmê xo, rar û rêça xo na kihinperest û
faşistî ra fek verradona. Muhatabonê xo dir vacîna
û xo zî newa kerdişî ver di virazena û calêya ki mî-
yonê himwelatîyonê Tirkiye di esta rabena, herunda
xo birarêyi, aştîyêyi rê caverdona. Yewîna ripelo newe
abeno heme şarî bi weşiyî têdir cuwîyenî.

Hikûmat û aqilmendonê dewleti ge ge waştinî ki
yew ripelo newe abo û ge ge zî xo apey daynî kihinpe-
restêya xo na se serron yê verîni ser di. Rarê pêkewtî
xo rê yê mişgulêyi dîynî û xo tira pawitinî. Qala çare-
serêya mişguledê Kurdî ki bîynî toyî çepgiron zî sey
dewleti vatinî û derî xap û dekî leyaq dîynî. Toyini
zî waştinî ki mişguleyê Kurdî taxirê bahdê şoreşî bi-
kerî. Asar şik û gomomon destê dewleti qewînaynî û
sey yew paştî tira ewnîyaynî. Nijadpereston xora yew
hewî di Kurd heme heqon ra meht kerdinî. Vatinî ki
Tirkiye yê Tirkon a û komo kû wîta di cuwîyeno yû zî
Tirk o. Bira vatinî Kurdî Tirkê ma yê koyîyîn î. Hilla
kû koya vewri varayni û kû serdî zî ki serna vewri
kap kerdinî û merdim ki ser ra şîynî “kart û kurt”
kerdinî. Tirkê ma yî yê koyî ki ina vewri gomî kerdinî
ma tira vatinî Tirko “kart û kurt” û bahdî yî zî sey
medenî biyî, Tirk biyî. Inkay zî ma heme têdir Tirk î,
xîlaf ma mîyon di çinî ya.

Eki oldaronê kurdon ra toyî sey dewleti nîzdî nîyî
zî sew tira toyini xo radestê dewleti kerdibi û raştêya
xo ra zî remaynî, hima zî paştîya dewleti zafone ino
pol keno. Kî veynenî ki bisilmoneyê dinya bi ewnîya-
yişê netewêyîn fahm û fêmê xo aver berdo, teyna yê
Kurdî seba nahfa serdestonê xo olî ra ewnîyawo û
şîrove kerdo û hima zî keno. Waxtê Selheddîn Eyû-
bî di yew feraseto pîl Kurdon dest kewtibi, hewawo
kû mi cor di zî erdibi zon, teng nîzdî beno û Kurdon
vînîkerdiş dono. Ayo ewnîyayişo verapey hima zî ol-

daronê Kurdon sero sewmê yêyî sey verî zî nêbo la xo paweno. Dima zî Îdrisê Bêdlîsî kêm nîzdî bi, ristê xo şenêkerd û xo beyntaredê Şah Îsmail û Osmanîyon di xerc kerd. Bi zonayeyê netewkî nêewnîya ristê Kurdon ra û Kurdî feraset ra durî vistî, hîna vişêr şarê xo Osmanîyona bestî, derî xelegêya se serron verdayî û pergala dusnayî. Xora tira pey risto asarîn oldaronê kurdon zî dest nêkewt. Senî ki hetkarêya waxtê Îdrisê Bêdlîsî di mire û begê Kurdon seba keyedê xo, eşîrda xo nahfî pawiti, hilla ki Cumhurîyet zî şîn bi, awon bi, toyî oldarî, şêxî, begî, mîreyî û axayê bi nîzdî beyîşê kihinperestêyi vindertî û nahfa şexsî sero têyagêrayî. Ino zî bi vînikerdişo peyen. Pêşengî ki Kurdî rê xo apey nêda sey Elişêr, Şêx Seîd û Seyît Rizayî gonê xo da û ne nahfa xo û ne zî keyedê xo aver nêveti dewleti lezi yî û têyagêrêya yîni fetesnayî. La tira çew nişîya xeta nîzdimendişê neteweyîya têyabigêro, yîni zî bi ino kemone vîni kerd.

Pêşengêya ciwononê firrê şêst û hêştî û hewtayê hêştî bi tehlîlonê neweyon û bi hacûhuca yîni xo da aver, verba sergirewtişi zî şîynî. Vaşur di pêşengêya kihinperesti rar nêdaynî ki nahfa netewî ser bikewo û rarê xelasa netewkî yewver vecîyo aver. Xo û nahfa xo mîyondê heme çîy di ronaynî û vernîya yewbeyîşî di vindertîni û êro zî rar ra şeyîşê yîni ino moj o. Senî ki dewletê serdeston, merdimî ra sey yew mulkî ewnî-yenî, pêşengêya kihinperestê Kurdon zî kurdon ra ona ewnîna. Cuka ki neyarê Kurdî reydir hîna lezi yenî têhet. Têdir girewtiş û têhet omeyîşê Kurdî yem-nû rê heyf veynenî, xo rê deki veynenî. Nêmçerxîyo ki sey yew nêw dewleti gurîyenî û heyna zî halê yîni û Kurdon ha werte di yo. Hergû partî xo gore hêzê çekdarî weraznayî û eşîr û honqarê xo pawenî. Ino moj rar ra şeyîş neyarê yîni ra vişêr çewî rê havil nî-yono û nîyerda zî. Heyonî serronê 2020î zî sey yew çongalê deston serdestê Kurdon yîni xo destîya dayî û hima zî donî. Pêşengêya newa hewawo kû veynîno asar kemoneyon ra weş ders veto û xo yew hêzê Kurdî

teyna nê, sey heme şaronê bindeston veynena û wayer vecîna, paştîya yîni zî kena. Cuka ki heme şarê bindestî yê çeher kinarê dinya tira balhayî benî û derî wayer vecînî. Ino zîhnîyet zî hetê firrê şêşt û hêştî ra saz bi û heme çeher letonê Kurdîstonî ra vila bi.

Zîhnîyeto kû bin tepîşt û rîyeyê xo erd rû war kerdinî welati di sey yew şoreşî pewjîyaynî. Kapîtalîzm û dewletê kapîtalîzmî ki dayî şînasnayış, karekterê dewleton ki da fahm kerdış, xo zî sey yew hêvîyi, sey rocê bîynî, sey yew alternatîfî vet aver. Hewawo kû verînonê ma vatibi “Dewleti pird zî bibo serra meşo.”, ya zî “dewleti heri zî bibo mewenîşi.” Heto bîyn ra zî zîhnîyetê ”Dewlet Baba”yî şarî mîyon di sewmo kû viraştîbi înkâr nêbîynî. Ino qarekter û bawerîyi Cumhurîyetî rojejnaybi. Kom çî tewir pîsêyi ya zî xîyanet keno wa bikero la gay xîyanet dewleta xo nêkero. Yayi çîna pewjna gay himwelatîyî bê mahna pey di vinderî û vateyê dewlîti puç nêkerî. Eki wacib kerd şîyenî mar û pîrê xo zî dewleti semed awayî bidî. “Dewlet Baba”yî rê kemone erdiş, deki pîrûnayış, suco gird o, bi qanon ya zî bê qanon cezaya girdi bider dîyaynî. Nîzdîbeyîşê neweyî wesîtonê verînonê xo ra zaf weş ders vetbi ki asar yew sewm dabi kinar, şarî xo mîyon di yî pewjnayî û rêça yîni xo rê rarê xelasi vijînayî. Ino ewnîyayîşê neweyî kifş kerdibi ki dewletî hergû waxt wazenî ki şar derî xelaq bo, buraq bo û tedir dawaya heqê xo nêkero. Eki kerdî zî, yayi çî hind leyaq dîy daynî bider û gay yî zî pê şikir bikerî. Pergalê zextî verîna zî şînasnabi, la ki ino firrî zî toyî çîyî heta nayî, derî bi mantiqîn ome û pey di vindertiş di zî zaf aswas kaşnêkerd. Merdimî kû dabon tede çîni bîynî, şîyaynî vernî di xo, dima zî keye û imbazon veşno. Çîmkû hêş û aqîlê hemîni kerdonê dewleti ser nêşîynî, hi wesîtonê dewleti rû mil ronaynî û hi zî xayîneyî ver di xo viraştîni. Eşkence werdiş, zîndonî ver di xo viraştîş karê hergû kesî nêbi. Cuka ki ciwonon vatibi “mî nêdî, mî nêşnawit û ez nêzono” rarê xelasi vijî-nabi. Hêştay di ino rarî nasîbê xo zext û zordarêyi ra

girewtibi. Zaf keyayî û azayî terson ser di pernaybi û bi zor nege bider kerdibi û tira çek bi rarê erînayîşi girewtibi. La dewa Cindoyî di ino rarî pere nêkerd û qereqolî ki zor kerd ver di nobeti tepîşt, va ki çekê ma çinî yo. Şima wazenî yewver ma bierzî peydê berî, ma inêyî razî yî la ma nege xo kerdiş razî nîyî. Çek mekê ma çinî yo, yê komî ki esto wa bîyero bido şima, nî ki ma ra fek verradî, ma şîyerî keyedê xo. Ma xizonêyi ver ha gîsti merenî, ma nişîyenî gedonê xo serê yîni newe bikerî û pîzeyê yîni mird bikerî, ma kû senî çek biereynî! Eki ma bişîyî gedonê xo çirax vecî, mehtacê çewî nêkerî, hi ma rê û hi zî dewleti rê yew rispînêyi bena. Ma kû senî bi mîlyonon reydir çek biereynî! Û ki ino moj xoverodaye vet aver dewleti yewver yî veradayî, erşawitî keye. Eki vernî di milê keyayonê dormereyî sewmêkî vila kerdibi zî xo verodayişê dewijon yû zî veng vet, bêhêvî kerd, payon ser di vindertiş ra teber derî rar nêverda. Nî ki gay keyayî bi nomedê xo yew çek biereynaynî û radestê qereqolî bikerdinî. Xoverodayişî hi dewijî vetî sape û hi zî keya û azayî derdo pîl ra xelesnayî.

Çepgirê dewa Zafxiraba heme dewonê Pironî ra zêdêr bi la zirar veynayiş tede nêviraziya. Hi çepgiron û hi zî dewijon fekê xo sist nêtepişt û pedeşoyê xirabşonêya 12î yê îlona hinzar û hêştayî bêzîrar xo ser ra dehf kerd. Ino pedeşo ra pey nomeyê dewa Zafxiraba vecîya û heme dewon behsê xoverodayişê yayî kerdinî. Çepgirê dewi zafone sempatizonê bi nome "Halkın Yolu" ra bî û zonaynî ki pedeşo hîna vîşî verba xirabşonêyi şono. Çîyo kû şarê xo rê wesît kerdibi, şima çi şert û merconê xirabon di benî bibî, gay şima yew feksistêyi rê pîrîm nêdî. Cenî, comîrd, gede, kal û pîr wa pey bizono kû yew firt xo sist kerdiş peynîya dewi zî ono û sey waxtê verî dewi tahda û eşkence di meleqîna û hînî tira nêxelesîna zî. Rocêkî hînî taşte-re derîyabi û yew operasyonu dewi di virazîna. Gayî û bizî omeybî hillî, waxtê mexelê terşî bi. Şonon û gawonon terşê xo erdinî mexelca. Bêxeyra terşî û şo-

non û gawonon yew gonî tebera nêasaynî. Serleşker gêj bibi, har bibi û rarê yabonî tepîştbi. Bîrê dewi ser, raştê yew gedeyê bizîvonî û kalêk şoneyî yeno. Yinî ra persê yew çepgirê dewi keno, gede biteqaza vono kû mi nêdîyo, mi nêşnawito û ez pey nêzono. Serleşker mat moneno, hima persê xo raştaraşt nêkerdo kû pitî sey makîna laya kerd, va ki “mi nêdî, mi nêşnawit û ez nêzono.” Tirî çina ra ona pêpeya nayiş virazîya? Cay gede çîy zono? Veceno çiqolata dergê bider keno gede tira durî remeno. Veynda kalî donî, yêyî ra persê “Ehmed Korkmazî” keno. Kal vono kû ez şinasneno û bîrî ez şima bero keyedê yêyî. Kal vernî di, yî zî dima şonî dewi. Dormere keyedê datê Ehmedî gînî û serleşker veynda Ehmed Korkmazî dono. Ehmed Korkmaz! Ehmed Korkmaz! Ehmed vecîno teber ki ne ciwon o, yewi do sey kalî kû tedir omeb extîyar o. Bide perseno vono kû Ehmed Korkmaz konca wo? Yû vono kû Ehmed Korkmaz ez o. Serleşker gizma vono kû ti extîyar î û ayo kû ma persê yêyî kenî ciwon o. Ehmedo extîyar vono kû ayo birarzayê mi no û bîyo vîst serra ki ne mi û ne zî çewî dîyo. Şima bîlaheq ewere bîyî, xo rê hêvîya xo ma ra birrnî û ma zî ason biedelnî. Serleşker agêreno kalê verînî ser di vono kû qey tu ma erdî wîta, yû zî vono kû wûllay û billay ez îne yî ra vîşêr Ehmed Korkmazî nêzono. Ayo kû şima persê yêyî kenî vîrê mi di gede bi û pîrê yêyî barê xo dewi ra wena şîyî û tira pey ez çîy nêzono kû se bîyo. Ciwono kû nomeyê yêyî zî Ehmedo Korkmaz bi û yî bider gêraynî verba yînî yewîna keyeyî ver di ronîşte beno û temeşê yînî keno. Dewi ino tewir fekşîdînaya bî û wayerê cerebî bî. Tolazê dewi timî qasidî têyagêraynî, çerray yew xeta şaşi di, yew vengone di nêmendînî. Feraset nêdaynî ki pergâl çewî deki fîyno û xo destîya bido, şîyero dewi û dewijon ser di, xîlaf yînî mîyon fîyno û yînî pîya dişmen bikero.

Dabara dewi terş weye kerdiş, êzimi birrnayiş û citi sero bîynî. Vewri ki zaf varaynî zîwon binê vewri di helesnaynî û citêron ziraro pîl dîynî. Terş zî bi-

nezonêyi weye bîynî tira zaf zî yew havili nêdiynî. Êzimkarêyi ki zî nufis vîşî bi, qorriyon zî qêm nêkerd. Dabari ne dewijî mirdî kerdinî û ne zî gêsti di me-reynaynî. Mitîhîtonê kû êzima dewi erînaynî seba kû erjon erînaynî verba yîni yew girev ronîya. Çi hind zext zî sero virazîya zî çewî apey gomi nêêşti, yewver êzima xo garkî kerdî û nêroti. Payiz ki derîya, zimiston ki ome, çewî nêwaşt loxmeyê xişnî paşkil tafiyno. Mitîhîti mecbur mendî ki vatişê dewijon bipewjnî û erja kû dewijon riza diybî aya erji sero êzima yîni tira biereynî. Ayî honqaron di hewa verîna ki qala grevî bîybî, hewa verîna bi kû dewijî asar yew zîhnîyetî şinasnenî, hewa verîna kû bi asar yew rarî sero pîkenî û grev ronîyeno, peyenaapeynî zî serê xo gîno. Ino vindertişî dormere di yew moralo hewl rona û hemin rê bibi yew hezeka girdi. Ayo beyntare di Amed di yew semîner virazîya û ciwonê dewi bi minîbusêki dekewtibî semîner. Cenî ra comîrdî, pîl ra şinikî qala ino semînerî kerdibî. Ino semînerî xorton sero yew sewmo şidînaye viraşt û verê yîni vîşêr tada hetê şoreşgerêya. Ayo coşme (dormeron) di hîni bê cefa û bê zehmet ciwonî û şoreşgerî têdir warîşt û ronîştinî. Ayo payizî dima wesarî zî yew kûrra ewnîyayedê yê persgirêda Kurdêyi semed virazîyaybî. Ino semed ra xebata verîn ê persgirêda Kurdêyi bî û weşbê şarî zî şibi. Çi qas ki waxt ser di şîynî dewi yew şinasnomewo politik girewtinî. Heme verarocîkî bîybî warecayê pîkewtonê şoreşgerêyi, ciwonon bi zonaye zî nêbo yemnû hewl perwerde kerdinî. Înî ciwonî ki safa şoreşgerêyi di vindertinî dewi di sey kulbizikon abîybî. Tona ki yîni vila kerdinî, imbazî pey germin bîynî, adirê keyon derî la panêkerdinî. Germinêya kû yîni ra vila bîynî heme ciwonî vistibî binê sewmdê xo.

6

Payizê new se yû hêştay di leşkerî êşt dewi ser û toyî dewijî binçim kerdibî. Cindo zî mîyon di aşmî ra vişêr binê çimî di mendî û bahdî se bi sew Cindo tira tepîşîya, erşawîya zîndonê Amedi. Hînî rarê zîndonê Amedi gedonê Cindoyî rê bîynî sey rarê eynîyî, hewte di hewi ayo rar elawitinî. Pîyê hewt gedon o, tira çeher lac î û hîrî zî keyne yî. Lacê yêyî yo gird zewacî ver di bi, la hima ezeb bi. Hewtewo kû tira ver bi yû û maya xo û gedeyê şitî, wirdîkê keyeyî pîya şîynî veynayedê bawoyî. Zîndonê Amedi tîpa E'ya êroyen bi. Rocê veynayîşî têbeyêya xo dîybî û verê xo tadabi Amedê ti konca ya? Seata veynayî di berê zîndonî ver di newba xo pawitinî. Verê berê zîndonî sey veyvî bi. Kal, pîr, cenîyi, comîrd, gede, pîçek heme raf ra merdim wêra di bî. Heme bendedê veynayedê qawîşa gededê xo di bî. Gurrihîla kû zîndonî ver di bî, hêdî hêdî dekewtinî zerre û vecîyaynî.

Roc verba taştareyî şîynî Siltona Cindoyî û gedeyê xo zî dekewtî zerre. Hewt beron ki ser di vîyartî, qonatê cêrîn di yew heyata xişni di cayê xo girewt. Hima xomî bî, newey bî, xo rê imbazon ra ewnîyaynî û têtayêraynî. Yew masa di ki ca girewt çeher çimî ra Cindo pawit. Xeyalo kû mezgê yîni qefelnabi û tede xilxile viraştîbi aşmîya ki pîyê keyedê xo ra bêxeber bî, tira nêasabi. Gelo tirî seqet o, ya zî nêmcet o, ya zî nêweş o? Çi tewir o û senî no? Beno kû zî aşmîyaki ne non û ne zî awî dîyaya bider. Belingazê ma nikay ki bîyo sey zîlî yi. Kom çî zono kû yû çî tahda û eşkence ra vîyarnawo? Xora Cindo hedê xo ra vişêr fek şidînayê bi. Rew rew qalî nêkerdîni, eki yewî tahda bider bikerdîni, hînî bikîştîni zî tira nişîyaynî çikî zî teber bikero. Yew hewi di xo kerr û lal, mehtê dinya û axîretî kerdîni. Tira çîyêkî teber kerdiş yew merg he-

sebîyaynî. Hilla ki berdibi çewî nêverda ki xo têbesto zî, yîni yû cillonê kihinon ê kariya berdibi. Înî xeyalon di hind veynenî ki qifleyê imbazonê zîndonî dekewt zerre û têdir warîştî payî û rêz bîyî ki imbazî birî bider bipersî. Hewawo kû pawitinî Cindö ayo hewa nêbi, hi serê yêyî newe, hi qelew û hi zî keyfweş bi. Imbazon mîyon di sey tayê rîhonî asaynî. Seki ina des serriya kû zerre di mende wo û bira qet yew xomêyi û xeribê-yî nêontibî. Masa di ronîşte û sohbet zî xorîn bi, tersê hîşar kerdişê xardîyanon zî pîze di bi. Cindo hagîdar keno, vono kû eki çiyê şima wo avzel esto sew mi dir bari bikerî, nî ki ti ewnîyayî xardîyanon ma warez-nayî! Tira vonî ki halê ma tu senî ki caverdawo aynî ayo tewir heme çiy rar di şono û yew mişgule zî çinî yo. Ti ma rê meinterî, avzel ti yî. Yû zî vono kû cayê mi keyedê ma ra hewlêr o, şima zî mi rê meinterî. Şima yew keye yî, ma hewtay keye yî. Şima mîyon di têdir girewtiş qey mendo? Şima veynî ki imbazî senî têdir gînî! Ma heme sey yew keyeyî dabara xo cî dir bari kenî, çina wo kû yewî dir bibo yê ma hemin o. Çew nêverdono kû merdim yew vîsti teyna bimono. Komî di yew kemone bibo, heme ayo kemoneyî yê xo hesebneno û pey di vecîno. Qala Cindoyî nêbirîna û wirdî zî goşê xo sernonî. Ayo mehel çand imbazê yêyî kulfetê yêyî zîyaret kenî û hal û waxtê yîni tira per-senî. Binêki pa mendî, dima sewbîna mêmûnonê xo zî zîyaret kenî. Cindo çiqas ki wazeno yî dew û keye ra bivacîyî zî, yî qali tadonî yêyî û imbazon ser. Hind veynenî ki xardîyonon ververnawo ha zîyaretkeron wereznenî. Heyna sey verî veynayoxî rêz kewenî û im-bazî tira xatir wazenî.

Waxta kû Siltoni û Memo Cindoyî ra qerefinî dest û polê yîni têzerre benî, zerrîya yîni hesrî ca pînêdonî. Hîni ha tebera yî, Siltoni xeyalê yayi imbazê yayi sero mende bi zî sew la gay xo keye biresnî. Keye bêpel o, bêwayer o.

Memo û maya xo ki teber kewenî nurri û durra xo ra ewnîno, hêş tēmîyon keweno, dinya bide gêrena, verê yêyî pey, peyê yêyî zî ver beno. Hêdî hêdî hetê Amedi'ya meşîyenî la seki yû hetê pîrdê xo ya bileqî-yo, ningon rar aver gomî nêkerdinî. Hêş di persî ki newbi nêdonî cî, yêyî vero tîk benî. Persê bêveraper-son ne yew î û ne zî di yî. Tewir bi tewir ra persê xom û yê se serron pîpeya nîyenî. Çîyo kû Memo'yî hêş ra keno; rašta çina ra pîyê mi kewt heps? Û çîyo kû pîyê mi nû imbazê yêyî kerdibî sey biraron çina wo? Hilla ki hêşê yêyî di îni persî rêz benî, çîyo kû kal û pîronê yîni derî laya kerdibî yew bi yewi kewenî rêz. Derd û kulî ki verînonê yîni dîybî, zor û zordariya ki yî neçar vistibî, ayo kû kişîya, ayo kû welat ra raçeriya, yew bi yew verapersê xo gêrenî, mezgê yêyî dekerde moneno. Têverragêrayîşo kû qafîka yêyî di xilxile virazeno, qalî ki veynaye di bîybî û vateyê verînon elaqeder kerdinî yenî vîrî, xeyalê yêyî agêreno ayî çîyon ser. Verî zî ca ca pîrî asar sohbetî kerdibî la hagîdariya Memo'yî nêontibî xo ser. Pers û verapersonê rocê rocon dima kewt. Çina ra pîrî çûwaya xo qet binê çûwada çewî ra nêkerdinî? Çina ra neheqêyi yû zordarêyi ra xuy kerdinî? Bahcî û teqê yêyî çina ra mîre û axayon û kihinperestêyi ra omeynî, hêdî hêdî cayê xo zelal kerdinî û fahm bîynî.

Merdimî kû eslê xo ra xuy bikerdinî tira ko kew-tinî, eki himil bikerdinî rarê şîretî cerebnaynî. Ino vindertiş û ewnîyayîşê pîrdê yêyî xeyalonê yêyî yê verînon fecir keno, erzeno yew kîşt û neweyî tede têrêz kewenî. Bira mara xo tên nêkeno, hind veyne-no kû ha maşîna dewî het di yî. Xo rê ki ca abirrna, rarê wercayî xo feka kenî ki cay yew loxmeyê nonî xo biziqomnî. Hima teqeza yew kebabê tasi wazenî û bi lez û bezi ki werd, guherra dewijon di cîf gînî. Maşîni di ki cayê xo zî ki girewt verba mişguleyonê neweyon rarî dewesnenî. Keye ra ki yenî Memo tîc bi, taûtaqet

bi, bi keyf bi la hilla agêrayîşî ne bin di ningî gurîyenî û ne zî sere di hêş esto. Xeyalonê bêtažilon neçarêya ki mezgi di ronaybî, belingaz û bêqom malaqa verdawo û lal kerdo. Siltoni verî fahm nêkena la ki maşîni ki rar keweni bide aqilîna û dekewena bide. Çand vengî Memo, Memo Veynana ki Memo rih bîyo û seki maşîni di nîyo, konca şîyo sew bêlû zî nîyo. Leşa yêyî kîştâ yayî di ya, la ne hêş û ne zî aqil reydir nîyo. Hinî ki xo aqilnena, vona ki lacê mi ti keye ra waş û war omeyî û çina ra ti inkay ha yew teşqele di yî? Keyê mi tu rê veşo, ez tu rê kerr û lal bo, ez tu dormere bigêro! Ez tu rê biza qirbinon bo! Sedeqeyê seredê tu bo! Hê vaci delalîyê mi, sermîyonê keyedê mi, çina ra ti ona teng î û aciz î? Veynaye di keyfê pîrdê tu zî ca di bi, hilla ki ma dir vacîya cay yew xirabi ra zî nêvacîya. Hetta va ki; heyonî dad kerdişî bisebirî, ez pey bawero kû mi tahlîye bikerî. Xora çîyo kû mi persayî û tazîlî ki mi dayî tede yew xirabşonêyi çinî bî. Înî rocê verîni pawitox (aboqat) ome mi het, va ki tu rê weş helal bo. Ez bider persawo qey xeyr o? Mi ra va ki; verapersonê tu di yew xîlafî, yew xirpe ya zî yew alozîyi çinî ya, heme yê serkewte yî. Duza verîni di ti tahlîye benî, wa yew aswas û wesweseyê tu çinî bo. Ez qet taketnaket di nîyo, sey êro rocî veyneno kû rocê duzi ti ha tebera yî û darizyedê dîyin ya zî hîrîni di ti berat benî. La pîyê mi xo meqehernî, ino vâteyê pîrdê tu bî. Ez lacê xo rê sedeqe û qirbon bo, biewnî mi ra dalamata keyeyî heme tu wenîyaya, heme mişguleyê keyeyî tu vîye di mende yî. Sermîyonê keyeyî zî ti yî, pîyê keyeyî zî ti yî, pîlê keyeyî zî ti yî. Hinî teber û zerreyê dabar û şîlikê ma tu ra persîno. Eki ti xoveronêdî, ma kû se bikerî? Ona paştî û zerrî dona lacê xo la çikî zî tede pere nêkeno. Adiro kû zerredê yêyî di webîyo bi ino moj hîna vîşî girr beno.

Çiqas ki maşîni leqîyena seki vayê zerreyî adiri hîna zêdî têrabikero û leşa yêyî ra vila bikero. Ewnî-

yayişê yêyî yê verînî merdibi, ê peyenî ra zî ewniya-yişê mari qêm nêkeno kû fahm bikera. Hinî pîrê xo zî ayî imbazon ra yewî veyneno, xora imbazon zî sey roşnada çimonê xo miqat kerdibi. Zonaynî ki heme imbazî yew keye ra yenî û yê toyîni sey pîrê yêyî cenî û gedeyê yînî estî û yê toyîni zî ma yû pîyê yînî estî. Heme yew dawa sero, yew duzi sero zîndon kewtî. Memo'yî serê toyî çiyon sero kerd û tira asenî ki çina yî û çî moj î. Gelo îni hepsî tewir bi tewir şaristonon ra bî la xem û xeyalê hemini yew bi, rar û rêça hemini sey cî bî. Hilla ki imbazonê pîrdê mi qalî kerdinî seki ingimî fek ra bivaro, heme sey şekerî bî, merdimî vatinî ki kî xo rê hima bigîrî bierzî xo fek. Kî heme gedeyê yew mar û pîrî zî bibîynî, kî ona yemnû rê weş û şîrîn nêbîynî. Çîyo kû îni hîgînî rê ona xo weş û şêrîn kerdibî çina wo? Ayî vatişon û eşnawitişon di çina ino lacî rê şîrîn ome? Çîyo kû aqilê lacî ontibi xo ser tirî çina wo? Çina wo kû Memo zîndon ra heyonî xaraj û hima zî tēmîyon kewte yo? Xilxileyê mezgidê yêyî hîna vîşêr halê xo aver berdînî. Tam ayo mehel veyneno kû binê dewi di teber kerdo. Peye ki benî wîrdiyî ki tira pey mendibî ma yû birardê xo vera yenî. Hergû yew destê yewêkî gîni û taftalo kû erînabi xo desta kerd û rarê keyeyî gomî kerdinî.

Memo aver şîyero zî ningonê yêyî xo apey daynî rar nêontinî, seki bira ningî bin di çinî bî, ino moj nerdunonê keyeyî serkewenî. Hilla ki dekewenî zerre buya Memo'yî teng bena, cîf qirriko pulîsîno, nêhedîyeno, tebat bide nêdîyeno. Vecîno teber, pey bonî di binê yew dara vomîri di sey beratî xo erd ra derg keno. Hi bîyo kû yew wesla yêyî aya bîyni ra hagîdar nîya. Seki heme weslê leşî têdir biçizî. Ko, kerreyî, lem û darî seki ser di bîrî. Seki xurmîxurmi dormere bikewo û erd û asmîn pîya biresî. Keno kû binêkî çimonê xo pîrano, xayis bikewo, la tebat bider nêdîyeno. Hewawo kû mezg mijul o, hayaya weslêki ya

bîyni ra çinî ya, leşi zî yewkone takêş a, homta ya. Ina takêşêyi û homtayêyi tede ne asonêyi û ne zî hewn verdawo. Dormere di hergû çiy derî tahl û tırş asaynî. Ne kar, ne gure, ne wer û ne zî keye ra yew tahm nêgîno. Yew deme ona takêşkî gêreno, çew nêwatono kû fekê yêyi vacor bikero. Hêga şono derî sey zîndonî beno, ko şono derî sey qûl û qoncikon yeno, boston şono seki ko ra zindarî û helusîyî ser di birî, awi ver şono seki gunî biherrekîyo, keye ki agêreno seki derî sey mezeli bîro. Eki hirsê xo çewî ser ra teber nîkero zî seki bibahçîyo. Weş veyneno kû yew setari di zî nêdeberîno.

Rocêkî seki yew tira vaco ki ti daruyê xo ra xewf kenî, tira tersenî. Ti nêwazenî ki daruyê darba xo bişinasnî. Ti kû heyonî konca ona bi ûfi û pufiyi di wardî û roşî? Heyonî konca ona pişikê tu wardo û muyê tu tu sere di sey telîyî bibî? Eki ti biwazî daruyê darba xo sero mijul bî, zaf yew waxtê tu zî nêgîno, ti kû yew firti di biveynî û bişinasnî. La ti ki bipewjnî ya zî ti kû xo tira bipawî, ez pey nêzono. La çîyo kû tu ona bêhuzir keno, çîyo kû tu ona awi û wer ra birneno, tu qom ra keno, tu cili sero zî nêdeberneno, ti kû yêyi zelalkî veynî. Derheqê yêyi di wayerê toyî zonyon bibî, ti kû aver û apeyê yêyi zî fahm bikerî û seki kurmoncon nêva “ya herro, ya zî merro”yî xo rê vijînî. Ihind qali! Sewbîna çiy nêmoneno!

Merdimo ki bê silom û bê kelom omebi kîştî di ronîştbi û derî îni şîretî ronaybî hind veyneno kû het nîyo. Seki sey teyrî bi û yew firti di firra û hetonî ki tira asa zî dima ewnîya. Ewnîya, çimkû cayê yêyî, mekonê yêyî meraq kerdibi. Xo di vaciya, gelo îne sey merdimî mi rê şîret rona la merdim nêbi, mi cay qeretunê yêyî xo ver di nêdî. Mi rê sey yew meleketi ome, beno kû zî Homayê mi nê ezîmşonî seba ardimî mi rê erşawitbi. Qey verînonê ma nêvatinî ki “Homa çerray di beron kî rû nêgîno”, nêwazeno kû qûllê yêyî delal û torin tengone di bimono. Seki mesela heweleyê Homayê mi bîya, cuka ki mi rê ina meleketi erşawita. Bi monîkî xo di ono zon ki ino raro kû mi semed ronîyawo raro xeyrîn o, eki ez bişîyo sere bero yû kû mi rê bibo rarê xelasi. Hinî ina seati ra pey duzida “rarî” keweno. Tirî rarê mi senî no û çi moj o? Xeyalî ki zîndon di mezgê yêyî di çengeleki kenî, cayê xo yê neweyonî rê caverdawo. Hinî ha xo rê rar gêreno kû xo îni hewlwelaqon ra bixelesno. Raro kû hinî yew yêyî ca di seterneno, buya yêyî verradono, pişikê yêyî nîşneno, zerrîya yêyî hewnik û weş keno û newerna taûtaqet defîyneno.

Qala kirri, raro kû xeyalonê yêyî virarî bikero û ser fiyno, duzida rarê serfirazî di yo. Zaf ra toy çatalrari resawo la wazeno kû heyne xo zîndonî biresno û hîna zêdî, bêmişgule, bêhewlwelaq rarê xo serfiraz bikero. Veynayeyê diyni zî omebi, ino veynaye zî ne yê akerdeyî bi, ê peyberon bi. Waştinî ki personê bê veraperson veynaye di sero xebati bikero la çi havil ê padeyî di îni persî nîyomeynî tazîl kerdiş. Miradê xo bi imbazî ki waxti di koya mendibî tedir bîyero ca, personê xo yîni bikero. Nî ki derî tebat çinî yo, şew û roc vîrê yêyî dekerde wo. Ge koya, ge kar di, ge dêşti

di, ge doli di, ge newal di, ge sere helisîyon di, binê zindaron di, ge terşî ver di, hinî huka ki tanêgêrawo nêverdaybî la heyna zî tira yew asonêyi nêasaybî. Rocê veynayedê girewtî ome, may û yew di wirdîyonê keyeyî xo têkerd û şefaqê rocê veynayî di maşîni ver di cîf girewt û şîyi veynaye. Rar ra bi hinzaron mişgule û teşqeleyon mîyon kewte zî bibo û may û wirdîyon ra hagîdar zî nêbo waxti di wêra resayî. Heyata veynayeyî yê teberî di veynayoxon reydir ronîştî û yemnû persayî û yemnû dir terreqna. Şêwazê cî persayîşo kû hepsîyon xo rê avzel diybi veynayoxon zî taqîb kerdinî. Hi kerdinî ki ha gede ha gird yew bi yew yemnû sewal kerdinî. Ino şêwaz hemini xo rê esas girewtibi û ayî ki omeynî veynaye zî sero sewmo gird viraştibi.

Seata veynayî ki debîyi heme X-RY ra vîyertî û xo qûl û paconê veynayeyîya resna. Qûlla verîn ra ververnaynî heyonî yê peyeni heme hepsîyî merhaba kerdinî û hal û waxtê yemnû sewal kerdinî. Dima zî arizî yê xo diynî û tedir sohbet kerdinî. Himsera Cindo'yî zî sey imbazonê xo kerd. Cindo'yî zî halê xo ki tedir bari kerd, rocê dada xo zî tira va. Aşma ki pey ra yena hewtisê yayi di mi dareznenî (mehkema kenî) û ihtîmalo pilo kû ez verrabideyo. Imbaza yêyî zaf zî pey hêvîdar nêbena, yû ki vateyê pawitoxî (aboqatî) tira vono binêkîna mirûz dekeweno ridê yayi. Pawitoxî vato kû tu sero îfade çinî yo û xo ra tu zî weş îfadeyê xo dawo, ez wazeno kû ti zî hinî zaf nêxemîya. Yewîna aşmî sebir bikeri, ez agêro şima mîyon. Yû ki sewalê Memo'yî keno çimê himsera yêyî debenî. Sîyi ser ra şona, awki fek di pulisîna, zon fek di zûwa beno, yew hewi di lali bena, xovero dona kû nêbermo û Cindo rê zî aswas pirûnêno. La halê yayi hergû firti di hîna xirab ra şono. Halê delalîyê yayi sey şerîta filmi çimonê yayi ver ra vîreno. Hima nêvato kû çina ra? Hesrê yayi lay û laser benî, cor di alişkonê yayi yê nazikon rû war kenî sînedê derdon rû acêr benî pistin, zerrîya

yayi kelgirîni bena, leşa yayi recefina.

Cindo zerrîya xo pêti keno û vono qey delal û zerrîna mi? Çina ra ti bermena? Mala Homa bermi nêdo? Hewtewo verîno kû şima omeybî, cay yew xirabêyi tede nêasaynî, halê yêyi zî, moralê yêyi zî weş û rind bi. Se biyo bider ki ti pey ona xemîni bîya? Qet mevaci! Se bi bider sew ma ki wîta ra vecîyayî bi bider. Ma teber kewtibî nêkewtibî hêş tira vecîya. Ningonê yêyi nêontinî ki hepsî ra durî bikewo. Seki yew çiydê xo wîta di vinî bikero û nêtê yêyi bide gêrayiş bi. Hilli û gomi peyser ewnîyaynî, timî xecelnaye bi. Çimê yêyi hîyûhilor û malaqa mende bi. Mi çiqas ki hîşar kerdinî zî yû halê xo ra nêvecîya. Bi ino hal heyonî maşînca ma şiyî, hilla ki zî ma maşîni suwar bîyî hetta keye lomîcî nêva û vacor û gotir zî nêbi. Cay yew çiyêkî tira bipersaynî nişka ra erzîyaynî xo ser, seki hewn ra hayabo. Wûllay zî, billay zî halê qondaxê ma hewl niyo. Tede çina tewirîyawo zî mi fahm nêkerd, de ki veynayedo akerde di ome tedir xorîn xorîn qalî bikeri. Mi derdê yêyi di zewac nêdî ki ez guneyê yêyi zî zewacî sero bigîro. Eki mesela yê zewacî biba, ason a. Dewi ha pirr keynê yî, ma kû berê yewî teresî xeyrî sero bikewî û şarî sekerdo sew ma kû zî sey yîni bikerî. Hinî wesar qedîyabi, germê imnonî zî sewmê heme gonîyon kerdinî. Dewijon zî gala serê kêberon û bonon kerdibi. Şewon cawo akerde di rakewtinî. Keyê Cindoyî zî sey hergû dewijî cilê xo kêber di vistinî la lacê Cindoyî hergû yere cilla xo têrapîştinî û berdîni bonî sero vistinî. Teynayîya ki tede tewerîyabî ona wacib kerdinî. Hima şomî ki werdinî cadî serê bonî xo feka kerdinî. Cilli sero kû resa sey beratî xo ser ra derg kerdinî. Xora dewon di bonon sero rakewtiş zî nomedar bi. Hergû gede ki bonî sero kû rakewt xo rê yew estere vijînaynî û xeyalê xo sernaynî ki senî têyagêreno, sera şono? Komî dir têkil o? Têkiliya yîni yena çi vate? Ferqê esteredê xo û ayî bîynon çina wo? Bi çi

pergalî tēyagēreno? Eki ona asar xeyalon mīyon kew-
tinî oncax çimê xo pêranaynî û dima zî hewnon rû
gûnaynî. Heyonî destê nimacî hewnikêyi ver bêxeyra
destawi çew hewn ra haya nêbîynî. Merdimî vatini
qey dewi tēdir merda ya.

La yê Memo'yî rocê hepsî ra ino pol ona nêbîynî.
Hêşê yêyi ko û newalona gêraynî. Qûl û qoncikonê
dewiya gêraynî. Çimî zîq akerde şeki verê yew bi yew
deye, lem û kerron seheynaynî. Çiyo ki zî bider gê-
raynî teyna yû û xeyalê yêyi pey hesîyaye bî. Sewbîna
yew binademî nêzonaynî ki egîtê keyeyî ha sekeno!
Çew ne şewa yêyi ra û ne zî rocê yêyi ra xeberdar bi!
Xeyalonî ki yû xo mīyon vistibi toyini derî nurnnay-
nî û toyini zî derî şelnaynî. Ge ge toyin ra zewq zî
bigîro la mezgi di, rih di yew zelalêyi nêvirazîyaybî.
Halê kulfetê keyeyî vernî bide girewtinî, zelalêyi pirû
herom kerdinî. Ge piyo hepsî û ge kulfetê keyeyî û
ge zî dabar û şilikê keyeyî ki vîrî omeynî ewnîyayiş û
vindertişê yêyi sewm bide fistinî. La hilla ki zî neçar
moneno zor dono hewnî. Çimonê xo ki germin keno
ya zî nêkeno koyonê dewiya vengê sehrî yê zerencon
dormereyî ser keweno. Seydar zî nêbi ki, bi wendişê
zerencon wa ka binêkî pişikê yêyi binişo û hîna ason
rarê xeyalon cî mīyon ra veco. Wendişê zerencon û
gedonê ki veyşonêyi ver waştinî bi bermi maronê xo
haya bikerî, qîrriya yîni bes nêbi yê azonî zî sernabi,
xora binêkî ra pey zî yê mari sernîyaynî. Înî vengon
yewî ra zî aciz nêbi la îni vengon bider tēn kerdiş day-
nî ki ti teyna nîyi û hewawo kû vengê zerredê tu yew
sebebê yêyi esto, ê înin zî yew sebebo arizî û avzel esto
kû vengê xo vecenî. Hind veyneno kû mara yêyi ver
di teber kerdo û mayî ewnîna ki ha haya wo, çikî nê-
vona û derî mesîna awi ronona, wazena rîyê xo sape
bikero û diwar şîyero, yû dima veyndonno, qey se bîyo
dayê? Hima dewi di mi nû tu ra vişêr çew haya nêbîyo
û tu gala serê bonî kerda? Mari zî sey xo hewnon û

xeyalon mîyon vista hesebneno û zaf zî nêşono ser. Mesîna ki erdibî, gîno û verba cayê teheretî meşîyeno. Hîndo kû mayî şikon ser kewta ya, rik vindena dima ewnîna. Salîse salîse têyagêrayîşê yêyî bi objektîfonê xo qeyd kena. Ya zî sey Memo'yî ason nîya, xeyalî ki mezgê yayî di cîrît erzenî, deruniya yayî yê Memo'yî ra xirabêr kerda. Nêwatona ki zerrîya xo di nome bikero la fahm kena halo kû lac tede wo zaf aver şîyo. Terson ver vona ki ez cay çiy vaco û wezît eşkera beno, hîna xidar û adîrîn beno û verba zelalê yi şono. Hemîni nimacê xo kerdbi la yê may û lacî sey ayî bîynon nêbi. Yê mari çimo yew lacî sero bi, ayo bîyn hima nimacî sero bi. Wirdînon zî nimac kerd la hewcîya diayon nêdîyi. Mari zaf waştinî ki şefaqî Homayê xo dir bilebîyo û çand diayon têrêz bikero. Û vaco kû ya Rehîmê Rehîmon, ya Pîlê Pîlon, ya wayerê setar û hêvîyonê ma, ez xo erzeno tu. Ti kû ino lecê ma hêş û aqil ra nêkerî û halo xirabo kû tede wo, ti weşêya ma ya bibedelnî. Ti yêyî binê pelê mar û pîrî di biseternî, ti mefteyêkî fekê yêyî rû bidî û wa xo keyeyîya bino. Dabar û şîlikê ma rû sur bibo, xeyalî ki mezgê yêyî di xilxile kenî, ti berî tarî û xiznaya xo di vinî bikerî.

Ino tewir diayon nimacî sero pîpeya nona. La tersî û xewfî nêverda, bi teqaza warîşt sîpareyî virîyayi û bi gedona sîfreyî raşt kena. Kulfetkî roşenî sîpareyê xo ki wenî, karê xo zî yemnû ra bari kenî. Sey hergû rocî karê têrkon, karê teberî yê desermonon bi û yêyî zî ino moj bari kerd. La mari zerre di yew îtiraz bi la edelna hilla şeyîşî. Vaştîrî yû qalonçê xo ki sawitî, darey û zawayaya xo ki zî dekerdi, hera xo onti kel-melî ver û bider wena. Mari xo eşkera kerd û va ki ez zî yeno, yayî û yew di gedonê wirdîyon herî suwar keno û rar kewenî. Herî tira ver yû zî dima hêdî hêdî leqîyenî. Mari zaf waştinî ki Memo tira ver bo û hal û wezîtê yêyî ra fahm bikero, taqîb bikero. Tirî xeyalê lacî hêga û têrkon sero yo, ya zî cayîna di yo? Eki hetê

hêgayona biewnîyo derî dabar û şîlikê keyeyî bar û kar a, yînî rû mijul o la ki dêşti, newal, dolon û koyon ra biewnîyo sew wûllay û bîllay aswasê mi zî veng ra benî. La hewawo kû Siltoni qalonê xo yê peyenon di ona zon, bi ayo moj o. Yû xecilda koyî kewtibi, dêşt û zozonî kewtibi, newal û dolon kewtibi, imbazon û neyarî kewtibi, azadîyêyi û xobeyîşî kewtibi. Merdimî ki beşna yêyi temeşe kerdinî sey yew tirmî bi. Hinî geleguça rarî ha qedîyayiş di ya, hinî hêga nizdî kerdo, di rayonê xerîbon silom da bider û bi teqaza tira vîyertî, mayî şik û gûmonon ser kewena la Memo'yî di yew alamati nêveynena.

Veynena ki çiyêkî zî hayaya lacî nêonta, ya zî veng ra aswason mîyon kewta. Yew hesra xorîn û derg oncena û buya xo verradona, seki derî asmîn ra çiy bivaro. Ino halî nîşonê yew xeyrêyi veynena, xirabêya ki şefaqî mezgê yayi têmîyon vistibi têdir puç nêbibî zî hinî sey verî adirî sero nîya. Seki çiy o kû zerrîya yayi di adir têvistibi serê xo nêgîro la heyne lezi lezi xo yena, vona ki ino rarê xas û omî yo, heme tewir ra rayon tira vîreno, mi qey ona xişn kerdi. Înî zî sey ma rayonê Homa yî. Hinî ha hêga di yî û ca di heri ser ra zewada rononî. Dima cîfê xo zî ki girewt, hêdî hêdî hergû kesî verê xo vijîna û ver bi xelleyî çîynayişî verna. Bê minet çîynenî zî sew, hêşê mari lacî ser o û yê lacî zî vengê zerredê yêyi ser o. Ê mari têyagêrayişê lacî sero yo û ye lacî zî xilxiledê zerreyî sero yo. Hima hima heme rocê zîwon çîynayişê yînî ona vîreno. Rocê veynayişê akerdî zî verê dîrokê duzi bi. Şêyîşê ayo rocî may û Memo'yî sero pîlon bibi. Veynayedo verînî ra heyonî êro hêşê Memoyî ha têmîyon kewte wo. Çerray yew çiy ra zî tahm nêgîrewto, heme çiy derî tahl û tirş omewo. Bê ekil û bê tahm omeyo. Calêya ki zerredê yêyi di ronîyaya nîyna salixî dayiş. Yû nêono zon û çew zî zerredê yêyi ra nîyno kû he-mini hêş fiyno, hal û wezîtê Memo'yî derî salixî bido!

Rocê veynayedê akerdî yo, yere ra Siltoni û laci xo têçîynabi, şafaqî sîpare ra pey acêr gûnenî hetê maşîna meşîyenî. Hilla ki maşîni yena nîzdî zîndonî yîni peye kena, yî zî rarê hepsî gomî kenî. La çew fekê çewî vacor nêkeno, hepsî ver ki resayî hima bi teqaza rêz kewenî û X-RY ra vîrenî ki şîyerî zerre. La berî ki ser di vîyertîbî bira nişîyaybî biomarî. Kelmelo kû qantîna hepsî di erînabi masa sero ronênî, heyata veynayî di sey imbazonê xo rêz benî û bendedê Cindo û imbazon di monenî. Çand deqîqayon ra pey delalîyê yîni heyati roşn û germini kenî. Yî zî bi rêzkî destê yew bi yewî gînî û pîpersenî, dima zî hergû kes masaya ki xo rê abirnaybî ver di ca gînî. Ringuzê Cindo'yî sey heme imbazonê yêyî weş bi, akerde bi, xem nêkerdîni û keyfê yêyî zî ca di bi. La ringuzê Memo û yê marda yêyî weş nêaseno, hêş zî halî ser ra beno. Bi se serrona ki bêbextêyi û zordarêya ki kal û pîronê yîni bena, Memoyî zîndon di ferq kerda û fahm kerda. Qey ona ason o kû zilmê se serron ti çand rocon û aşmon di pey şîyar bibî? Xora ne qîflê mari û ne zî Memo'yî bi ino moj piranêresaynî. Ino beyntare di çand imbazê pîrdê yêyî seba persayîş û sohbetî benî mêmûnê masada yîni. Yew sohbetî xorîn û germin ververnîyeno.

Memo vîyeyê yîni ason nêedelneno û personê xo têrêz kenno. Heyron! Mubarikî sey profesoron verapersonê xo yew bi yewî sey têzbîhon derî laya kenî. Vonî hewawo kû “Çoban Silo” reîsê Cumhuriyet Türkiye Süleyman Demireli vatîbi dewleta ma serfiraz û gird a, ma senî ki 28 hebî serehewanayeyî tefînayî, ma kû yê 29'ın zî bitefîynî. 28'ki verîcûyî virazîyaybî û çewî derheqê yîni di zaf çiy nêzonaynî derî akenî û zelalkî zilmo kû zordarêya kû bawkalonê yîni bîybî, derî laya kenî. Hilla ki derî va zî yewqala vatedê yîni zî veng ra nêşîyi, heme sey goşerî xo goşa kerd. Nezonêya ki ge ge vernîda lacî kerdîbî, hinî verba çareserêyi şîynî,

zelal bîynî. Eki xo rê yew raro newe vijîyno sew hinî seba çina yo fahm kerdo, pey aqilîyawo. Hinî zerrîya yêyî ason û paştîya yêyî zî pêti bîya. Ne mayi û nê zî piy derî bar û kar nîyî, heme kulfetê keyeyî êšto yew het û çîyo kû yû xeyalon mîyon vîstinî tedir ri bi ri mendibi. Sînayîş û heskerdişê way û biraron zî yew astona nêbî. Hima hima vindertişê yêyî ver di yew laqî nêmendibî. Peynî sohbetî omêyi û sey heme hewi rêz kewtî, cî ra xatir waşt, her kesî rarê xo romit. Ina hewi ringuz û mirazê Memo'yî ca omewo û hilla ki teber kewenî marda xo dir vacîno, atle bider nêdono heyonî maşınca. Mayi zî xo di vacîna ino berxodarê mi şefaqî kerdî fekê yêyî nêakerdîni û inkay zî merdim fekê yêyî zincîli bikero zî derî edal çinî ya. Mayi pey Memo'yî acêbî monena, qey ino çi gosirmet o, yew hewi di aqilê mi vila kerdo. Cay çewî yew daru zî nêdabi bider, teyna toy çerez û biskuwit werdibî. Yew di aşmîya ki vacor û gotûr nêbîynî û inkay zî fekê yêyî panêdiyeno. Ma dîynî ki qeretunê yêyî ma verragêreno la sewbîna ma dir nêbi. Ez veyneno kû ez zî sey roconê yêyî yê verînon tewş bîya.

Merdîm yew seati mîyon di senî ona bedelîno, senî binê ihind barî di keyfweş beno? Kî çiqas ki bider ewnîni, hu ridê yêyî ra cibir nêbeno. Sey hewa verîni mara xo beno pewjxone di nonê xo ki wenî maşîni ver di vejîni. Rayonî hima hima temom bîyî û romotox zî şîyar keno. Vono kû wa rayonî suwar bî, erê yo, ma hinî rar bikewî! Herkesî cayê xo ki girewt maşîni zî verba dewa Zafxiraba rar dewesnaynî. Hewnikê yerêyî di keye resaybî. Qijê dewi serecêr verê maşîni ki bîynî keyfon ver pelî panîyaynî la yê Cindo'yî hesr û çilonti têmîyon di maşîni ver di may û birayê xo virîkî kerdîni û vengê bermîdê yîni koyonê dewi pulisîyaynî, qîrrîya yewi erd û aya bîyni zî asmîn şîynî. Yew dejî reydir may û birayê xo pêşwazî kerdîni ki qesbaya merdimî derî helîyaynî. Komî kû vengê

bermîdê ayî gedon eşnawit, xo yew daldeyê naynî ki vernîya ciqliqê qesbada xo bigêro la çi heyf ki nahfile bi. Ge ge zî veynayoxon vatinî ki wayer teyna zono kû se bîyo bider. Têndar û tengbeyîşê dewijon û cironon seba kû Cindo gedonê xo mîyon di nîyo bi!

Siltoni ki keye resena gedeyê ki tira pey dewi di mendibî rocê duza pîrdê yînî tedir bari kena. Vona ki acêr gûnayîşo kû seba pîrdê şîma bîynî beno kû yê peyenî bo. Heme têdir deston hewanonî û Homayê xo dir lebîyenî, vonî ki Homayo zulcelal ma bi tu hêvî kenî ki ina duzi bîba sebebê verradayîşê pîrdê ma, ino moj dia bi dia sero kenî. Siltoni vona ki qey yû nêbo kom û senî ino nêreyê keyeyî hewanonî? Înî wirdîyê mi kû senî bê pîr deyax bikerî? Binêkî ra ver bi qîrrîya yînî ina dewi kerr û lal kerdibî. Kom çi zono kû çi hind qesbayî derî vaşaybî? Ino barê ma nîyo, hillîna aver nêki apey wa bîro barê xo ma ser ra hewano, nêreyê keyeyî gay pîrî vîye di bîmono. Keyê bargironî di yew hêvîyi virazîyaya û Homayê xo ra wazenî ki ina hêvîyi goşt û este bigêro, Cindo zî bîro yînî mîyon. Memo sey çilayi keyeyî vero veşeno, hi zerrî dono delalîya xo û hi zî dono wirdîyonê keyeyî. Tira wirdîkêr şeş hebî bîynî zî estî. Yû pîlê wayon û biraron o, pîrî ra pey zerrîya kekê xo di seterînî. Kekî zî heyonî ayo roc yewî ra zî nêvato kû kullî, timî bi heyron û qirbon tedir vacîno. Yew virîki di, ayo bîyn kulîki di kaykenî.

Keko erjeye zî hi elerz, hi elerz ki heme dewijon tede balhayî berdinî. Pîl rê pîl, şînikî rê şînik, cenîyi rê zî cenî bîynî. Eki cay yew merdimî tengone di biveyno, wazeno wa imbaz ya zî dewij bo heyonî ki ayêyî ayo tengone ra nêxelesno, xo rê edali rewa nêdîynî, keye şeyîş zî xo rê herom dîynî. Hilla ki dejê dewijon ya zî yê welatî rê ri bi ri mendinî “axê” kal û pîron çimon ver ra gêraynî û vîrî omeynî. Verînon ra zaf eşnawitbi ki seba aqobetê kurdon yewîna roc hêvî kerdinî û tede “ax” berdinî. Axxx, ax! Senî ki Homayî

ma Kurdon rê yew roco bîyn nasîb nêkerd? Roco kû tede veyşonêyi, teyşonêyi çinî ya, qehr û dej çinî yo? Kîştîş û benasat kerdiş wederîyawo, zext û zordayi yew binademî zî nêbena. Xela û xeza çinî yî. Raçer-nayîş û terkê welatî hewaniyawo, bê zerrî pel dari ra nêkeweno, veyveyî û şayiî bi tahma pirûniyenî. Hilla ki di zerrîyon waşt xo têyabiresnî wa çew derî laq pirûnêno, kuçon di gedeyî wa bi keyf têdir kay bikerî. Teyr û tebur wiçiwiçiya xo bêters û bê xewf koyon ser bifiyî. Heme terş seydê xo yabona bi xozayî biçarno. Wa vaş û velg bê xazi, bê veşnayîş xoza bixemelno. Asar yew roc vizêr miradê kal û pîronê ma bi û êro zî yê ma hemin o. Roco bîyn ya zî Rocbîyn miradê kurdê hêvidarî û pel şikteyî yo. Cindo'yî zî miradê bawkalon keynarda xo rê nome kerdibi. Keynaya ki şona wendecayê verîn pola pûncini Rocbîyn a. Rocbîynî zî serrê yayi wîrdîk î, la hêş û aqilê yayi gird o. Zona ki yew neheqêyi werte di esta û piyê yayi zî seba ina neheqêyi ha zerre di yo. Aya neheqêya ki ovar û imbazêkî sey pîrdê yayi bîybî, kuçon di bê pers û bê sewal hînzaron reydir kiştîbî. Neheqêya ki bi mîlyonon reydir merdim welat ra raçarnabi, seba kû roco bîyn ina neheqêyi rê dermon bibo, daru bibo verînon hêvî kerdibi.

Rocbîyni hilla ki kekê xo veynena, toy aswas û weswesonê marda xo zî çimon ver ra vîyarnena. Gelo ino kekê mi ha sekeno? Çina ra veynaye ra ver xemîn bi û inkay şa yo? Çiyo kû yêyî ona şayî keno çina wo? Mezgê yêyî çinayî rê mijul o kû, yû ona weş têyagêreno? Eki ez tira perso, mi ra aver ya zî apey çîy vono? Nê ki serebin çi pedeşoyo kû tira vîreno bincil keno? Rocbîyni di zî aswas virazîyawo. La hewawo kû Memo'yî xo zelal kerdo çerray yew aswas zî pere nêkeno. Çiyo kû vernî bider bigîro heme panusê xo ra ester-dî. Se beno ya zî çina qewmîno zaf zî derî xem nîyo. Yû zî hînî sey pîrdê xo ha rocê xo ver di yo. Hewawo

kû mezgê xo di pîloni kerda rocê duza pîrdê xo û yê şeyîşê xo têyafîyneno. Hi ayer kerdo kû bi keyfê ver-radayişê pîrî vernîya xemê şeyîşê xo gîno. Fikrîno kû roco kû pîy bîro û ez keye di nêbo keye zî zaf pey apey nêkeweno û îni wîrdîyonê ma rû di berî panêdîyenî. Eki bi mi xemîn bibi zî, bi bawoyî şayî benî. Keye zî roco yenewo kû pey ra yeno şonî duza Cindo'yî. Roc yencyî semed Memo nêwazeno şîyero Amedi û mara xo zî ona vero ono, yayî û Rocbîyni erşaweno duzi. Mayî zaf zî pey ason nîya la mecbur pewjnena. Roco yene ki ome têbeyîşê xo temom kena û Rocbîni reydir suwarê maşîni bena.

Waxti di duzi ser resenî, qontrolê şinasnomeyî ra ki vîrenî, heyata duzi di cayê xo gînî. Dadgerî ki dekewenî darezeyîş hima nîyomeybî û yî ha bendedê yînî di yî. Bahdî dadger û aboqati ki dekewtî zerre, dima berîvonî nomeyê Cindo'yî wend û Cindo zî dekewt zerre û ver bi darezeyîşî na. Dadger nome û peynomeyê Cindo'yî ki sereraşt keno, çand person zî bîder keno. Persî ki verpers bîyî, aboqati zî ki pawiteyê xo caerd, maben dîya duzi. Heyetê duzi çand deqîqeyon ra pey newerna ronîşt û biryarê xo yê tahlîye ridê Cindo'yî di wend. Siltoni, Zindar û Rocbîyni zî xo têkenî şono verê berdê hepsî û hêvîya Cindo'yî di monenî. Seatêkî nêromit azad bi û ome gedonê xo het. Cindo û Siltoni virarî yemnû ra benî û hesreta çand aşmon ningon sero ki daru kerdî, gedonê bîynon zî pîyê xo ki miçî kerd, pîpersayî û wîrdîyê xo gîrewtî xo virîkî hetê xerajê dewîya meşîyayî. Keyfo kû tede cuwîyenî gîştî nîyomeynî ser. Peyekî xo yew aşxone resna û yew het ra pîzeyê xo yemnû rû veng kerd, heto bîyn ra zî pîzeyê xo mird kerd û warîştî rarê xerajî gomî kerd. Siltoni şefağ ra xemê xo, xo pîze di nimitinî. Çimkû hilla ki keye ra vecîyaynî zerreyê çimonî Memo'yî çîyîna nîşon daynî. Ayo semed ra maya delali seki telîyon sero bo, bêhuzirêya xo Cindo'yî tên

kerdiş daybî. Halê lacî çand aşmîya ki weş nêbi, roconê peyeron di qet weş nêbi. Tirî mi ra pey cay yew gêjêyi kerda nî wû nêkerda? La sew ina şayîyi ma rû herom nêkero weş beno, xo di vacîyaynî. Adiro kû zerredê yayi di têkewto mîrikê xo dir bari nêkerdi û nêta yayi çinî yo kû zî tedir bari bikera. Gedon rê toy wîrdimirdi ki erînenî, maşîni wenîştî. Verradayişê Cindo'yî zerreyê maşîni zî şa kerdibi la ina hewi com ra ewnîyîş û malaqa mendîş bara mari bi. Xeyalonê tewir bi tewirînon dima beyîş bara Siltoni bi. Veyneyonê verînon di Memo com ra ewnîyaynî û mayi rayonon di vacîyaynî la ina hewi zî mayi com ra ewnîna û Cindo rayonon di vacîno. Cenîka yêyi sey tirmî ha ver di ya, ne hes û ne zî bes pirû keweno. Yew-di seatî ra pey dewi resenî.

Peye ki benî û nêbenî çimê yayi keye gêreno û Memo'yî seheynena. Tirî Memo se bîyo û konca wo? Xora çîyo kû maşîni di ya xecelnabi zî ino bi, xeyalon dima vistibi ino bi. Bêqom û belingazi senî ki maşîni suwar bena, yû tererekê rayonêya xo veyneno. Ya duzi şona, yû zî ko şono la ki keye resenî verîcuyî sewalê Memoyî kena. Gedeyê keyeyî vonî ki kekê ma şîyo rez, ma ra va ki ez şono binêkî eşîfi keno û hetê mexrebîya yeno. Ma ona zonî la mayi eşkera nê, nîmitikî xo çukon rû dona. Hesronê yayi qesbada yayi di ca pênedâ û ververna bêveng waywelîkî têrêz kerdî. Xo pîze di veynda: Va ki, wûllay û billay ma êro ra pey yêyi çimî nêveynenî. Keyê mi tu rê veşo, delalîyê mi, egît û imbazê mi, çimsîya û palingê mi, roşnaya çimondê mi! Mi senî şefaî ti xo dir nêberdî? Ez a kori êro ra pey sekeno? Senî bê tu vîyarneno? Bê Cindo'yî bîynî la bê tu qet nêbeno! Heyonî ki mexreb zî beno Memo cay nêasa.

8

Çiyo kû aşmon reydir hêşê Memo'yî meşgul kerdinî, hînî serê xo girewt û Memo yew dalde di bendedê dayzayon di vinderte bi. Seata yînî ayo honqar ra vîyartişî zonaynî. Aşayî ra pey beno, hind veyneno kutikê dewi ha lawenî. Zonaynî ki çand deqîqeyon ra pey yêyî het di teber kenî. Memo zî dalde ra araşt beno û vernî di vindeno. Persê fermandarî keno, zaf deme nêvertibi ki ca kerd, çand deqîqeyî pîya mendî. Fermandar yew imbazî qifleyî ra aqitneno û Memo'yî rey fiyneno û peyser erşawenî barxonedê xo. Keyedê yêyî di zî zerrîya mar û pîrî yewîna tewir têyagêrena û tirmê yînî yewîna tewir têyagêreno. Seba kû mêmûnî estî derî çay û çerez îkrom kenî. Seba kû qesba ra yew lete ca di nîyo, gûpigulpa yayî merdimî şik û gûmonon fiynena. Çewî derheqê lacî di çiy nêzonaynî la ki wêra di nêveynenî hêş ra vîreno kû çiyêk persî, heyna zî nêmekenîni çiy vacî. La ayînin ki persê yêyî kerdo zî tira vato kû şiyoy xebat. Cemat dekerde wo, dehkerade dehkerade sero abena. Heme zerre û teber têverşonenî, hal û wezîte welatî şîrove kenî. Daraxa vaceyîşê polîtîkî yê keyeyî mirdî warîşte wo. Sohbet hi weş romîno kû çew ceraw nêkeno birrno. Hind veynenî ki şewi dicay ra vîyerta, cemat zî hêdî hêdî vila beno.

Cindo ki persê Memo'yî ki keno heme têdir lal benî, xo succdar veynenî. Çimkû keye sey verî radestê pîrdê keyeyî nêbi. Cuka ki çewî fek di zon nêgêra, xora yî zî zaf zî aqobetê kekê keyeyî ra hagîdar nêbi. Teyna zonaynî ki tepîştîşê pîrî ra pey mezgê lacî têsere di perrawo. Roc çinî bi ki nêqewqeziyo, hewlwelaqon di takêş nêkewo, aciz û neçar nêmono. Derheqê Memo'yî di çiy zonayîş heme elatexmînkî yo. Mar ra pey way û birayî ki keye di mendibî, tererekê kar şeyîşê

tedir bar keno la çew şik û gûmonon ser nêfyneno. La pîrî veynayedê peyenî di binêkî hewana û ronabi. Veynabi ki Memo ha sewbîna xeyalon di dono û gîno. Persî ki imbazonê yêyî biynî yû şikin miyon vistibi la heyna zî nêpawitini ki demeyo nizdî di ko şîyero. Qala raşt daraxa ki pîy taresaye wo lac bi zerrîya xo nêrşawitini zî la ki yû bi zerrîya xo şîyero zaf zî pey nêdejaynî. Înî tênê xo kulfetê keyeyî dir bari nêkerd, bê veng mend la va ki wa çew aver ya zî apey çiy nêvaco. Kî dîy ki pey ser ome. Verînon vatinî “serê teqû teqi keweno şeqûteqi”, wa çew nêbo zemînê leqerdîyon. Û wa ne serê lacê ma û ne zî yê ma çewînayî zî nêdejo. Ma ino hedîseyî xo miyon di bifetesnî, wa sîxûr û neyar pênêhesiyî. Tu dîy ki ewteyon ra bi û mêşt ra bîro zî ome, wa zirarêkî nêveyno. Komê kû ma ra persê yêyî zî kerd, ma vacî ki şîyo xebatî. Wa cîron û dewijî ona bizonî, eki cay çîyna zî vacî, şima teyna hewawo kû ez vono tira vacî, heyonî ki ma hemin rê yew berê xeyron abo.

Aşm û di aşmê Cindo'yî nêdebîbî ki yew verba yere leşkerî êşt keyedê yêyî ser û newerna tepîşt. Çi qas ki keye û cîronon îtiraz zî kerd, leşkerî çimonê wîrdîyon û girdon ver di qeydon ra da û serecêr dewi bîyî, çimon ra durî kerwtî. Des rocî ki binê çimon di mend, heyna yew verba yere verrada ome kulfetê xo miyon. La ina hewî mone pirûşikîyabi, se kerdibi bîder sew, tira se vatibi sew? Cindo ne yê verê hepsî bi û ne zî bahdî hepsî bi. Ayo Cindo şîbi yewîna Cindo omebi. Teyna vatinî ki yewîna siûdê ma çinî yo. Zaf têverna û rijna la peyena peynîyi raştêya xo zî kulfetî dir bari kerdî. Tira va ki; ina hewî ez îni herron sero bîro tepîştîş ê mi kîştos o. Heyna zî rocon reydir bi taketnaket û wesweseyon tēyagêra. Zaf nêromit roşono kû tira ver bi xo rê qewlê welatî ra vetîşî pewjna. Hêdî hêdî qewmî dir bari kerd, ver bi tēbeyîşê xo zî na. Heto bîyn ra cayê şeyîşîyo kû aqilê xo di zelal kerdibi

Estanbol di yew dostê xo gêreno û tira ardim wazeno. Dostê xo ra wazeno kû derî yew bonê kîra veyno, yû zî vono kû wa bê qeda û bela bo, bon ason o. Bonon ra zafêr çiy çinî yo. Û dostê yêyî çand rocon mîyon di derî yew bonî kîra keno û dostê xo rê telefoni keno. Hilla ki telefoni hetê yerêya cenîna, zerrîya Cindo'yî pirtnena û bi aswas akeno. Çimkû roconê peyenon di toyî telefononê bê wayeron gîno. Ge telefoni cenîna û hima cadî birîna, ge telefoni cenîna hilla hewanayîşî di qefelîna, ge zî merdimî ki akerdi veng tira nêvecîyaynî û ge ge zî ki merdimi ahîzeyê telefoni ki hewanaynî vatinî ki; ez Hayder yan zî Ökkeş vatinî û peyser padaynî. Hima hima aya seati di dostî zî derî telefoni akerdi. Bi xewf û ters telefoni akeno û beno goşê xo ki vaco aloooo! Vengî eşnaweno kû dostê yêyî yo. Tira vono kû dostê mi bon temom o û tu kom hilla ki barê xo wena, mi ra vaci, ma tu rê pûnk bikerî.

Cindo ayî telefon ra pey seki barê tonon ser ra ronî yo. Yew nefeso xorîn û ason gîno, yew hesra bêvate onceno û zor bela derî weşûwarêyî wazeno. Imbazî nêzona ki xemî ver bi, keyfî ver bi, bermi qirriki pulisîno û tira vono kû eki ma bar wena ez tu gêreno. Temom, vono û agêreno keyeyî ser di vateyê imbazê xo tedir bari keno. Delal û zerrîna mi, ma ino gureyî nêverdî rocîna, ma nêtaxirnî yewîna waxt, ma hillîna aver nî kû apey teftalê xo bioncî pêser, dengî bikerî û kamyonêki ayar bikerî, barê xo wenî wîta ra şîyerî. Kamyonêki ayar keno û romotoxê yayî zî hagîdar keno. Û nimacî bîyn zî kamyoni onti barî ver kelmelê xo kirîşt, ca da bider. Kelmelki debîynî, çimê yêyî û yê keyeyî koya mende bi, hêş zî gor û mezelonê kal û pîron sero bi. Leşa yêyî têdir rizaynî, ne aqil bi û ne zî fêm mendibi. Seki xo mesulê heme guneyon veyno. Hilla ki verba mezeli şono kû meyitonê xo ra xatir biwazo hemin helqa bider nayî û gazincê xo tedir bari kerdî. Tira vonî ki; qey ona ason o, ti ino welatî

bêwayer verdonî? Ti ma kal û pîron wîta teyna verdonî kom hetîya şonî? Qey xeyr o, lawo? Eki ti êro îni herron sero ma teyna verdî, rocêkî ti zî dinya di teyna bimonî! Ma ti erdî dinya ki ti ma rê perçîn bibî, roc ki ome ma zî tu rê perçîn bibî. La hima yew tengonewo verîn o, tu qeresiyawo û ti ino welatê erjeyeyî û qadimî yê kal û pîron ra fek verradonî, paştî ser rû donî, radestê neyarî kenî û ningon xona fiyenenî, vera yew nediyarêyi terqezînî. Qey xeyr o? Îni erjî ihind kewte û erjon î? Wecaxo kû ma xo ra pey verdabi, ma vatînî qey yî zî sey ma heme tengone di xoverodonî û benî perçîn û wayerê ma? Eki ti ya zî ayî ki kewenî daraxa tu, şima xoveronêdî û welat ra biterqizî, roc bibo kû şima hîna zêdêr zirar veynî û agêrî welatî ser di ki û himilê çewî şima rê nêmono! Şima kû gosirmet bî û yew darba xo rê zî dermon nêbî. Şima kû welatî rê û welat ki zî şima rê xerîb biasîyo. Seki verînon vatibi “Şima kû hi Îsa’yî ra û hi zî Musa’yî ra bibî”. Şima kû ayo roc ra pey xaxî bibî û ne yew dabari û ne zî yew şilikê şima nêbo! Şima ki destê xo êşt kom gil, yû ki şima destîya bîro. Şima kû xo hi bêwayer veynî ki ne zad ra ne zî awki û adirî ra, ne cîronî ra û ne zî ewladî ra yew tahm nêgirî. Belê lacê ma yo gêj hinî ti xo rê zonî, ma ti beyonê hîna xirabonon ser ra kerdî û şiyar zî kerdî. Tu wû zerrîya xo û keyfê xo!

9

Hînî kamyoni debîya, hînî xatir wazîyawo, hewawo kû dostê xo no yê Estanboli ra zî xeber gi-rewtibî, bon zî tepîşîyawo, mendo rar kewtiş û xo wê-
raya resnayiş. Delaliya yêyî ki zî toyî kinc û minconê destîverî têkena, şeş zî gedonê xo na suwar maşîni benî. Estanbolo kû bîrê bêbinî yo ti konca yî? Estan-
bolo kû derî qala yêyî ya weşî kerdibî rayonê wêra yî! Estanbolo kû merdimî sey areyeyî tahneno, heba kî ya xişni sey heba merjîyi tewardi keno! Estanbolo kû sey bîrê bêbinî kî xo mîyon di vinî keno, benasat keno! Aqobeto nedîyar ha rarviste wo. Hinî yî rayonê cuwîyena newa yî, hinî yî xomê metropolon î, hinî yî endamê aqobetê nedîyar î. Xeyalê dar û berî, ko û newalon, çirri û eynîyon, dêşti û zozonî, teyr û teburî, herri û erdê welatî yînî sero bi, aqobetê yînî sero bi.

Qala raşti çîyo ki Cindo'yî xo pey vererdibi; Es-
tanbol cayê xizon û belingazon o, dabar û şilikî yo, yî bi şik û gûmonon tira ewnîyaynî û derî interiyaynî. Di rocon ra pey keyewo kû derî tepîşîyabi xo wêra resna, hima yew gomi di newerna pûnk kerd. Çand seaton ra pey kamoyoni zî berî ver di teber kerdî û bi cirono-
na yew het ra teftal rona û heto bîyn ra kirîşt keye di ca bider da. Keye bînaya pûnc qonat di bi û qonatê yînî yê dîyini bi. Ne bîna û ne zî keye weşbê çewî nêşi-
bi la mecbur bî ki pey bihedîyî. Xora hilla ki mefte da berî rû buya zincar û kufi mezgê yînî qefelna û fecir vist bider. Hima cadi vengê meyitonê yînî vîrî ome û yew hewî di takêş kewt. Cadi vateyê verînon kû seba şîrînêya welatî vatibi, vîrî kewt; "milçiki dekerda qafeso zêrrîn heyne yayî vato kû ax welat, ax welat! Seki bawkalê yêyî tira vacî ki gêjê mi "qey axûrê ti rind nêbi sey ino keyeyî"? De ino Estanbolê xo na bigêri û veyni derray dinya çand qoncikî ya? Bi inî

xeyalon mexreb bider yeno û dostê yêyî yînî kulfetkî keye waneno. Pîya ki şomîya xo werdi, heyonî nêmedê şewî têdir terreqnenî, qeda û belayonê Estanbolî ra, sixre û pîsêya yêyî ra, tewir bi tewir ra bawerêya yêyî ra, xûlq û nîzdîbeyîşî Estanbolî ra, hewtay û di milletonê yêyî ra derî behs kerd. Aswasî ki zerrîya yêyî di tewerînî ge ge dest û polonê yêyî têqerefnenî, dermonê leşî tira vecenî, bê hîvî û bê daru verdonî. Bi hinzar tewir ra aswas û wesweseyon ra pey cî ra ki xatir wazenî rarê setara xo na newa tepîşenî. Rocê dîyini seba qeydê gedon yê wendecayon tererekê ewraq û belgeyon virazeno û wendecayonê newon ki saxkeno rocê hîrînî zî qeydê yînî hemini temom keno. Di yê pîlî şonî lîse, di yê wertînî şonî wendecayê wertî û kaynaya tewr wirdîkî zî şona wendecayê verînî. Xora Zindar zî hima yê wendî nêbi. Xişnôn ra yew lac o û yew zî keyna ya. Wertînon ra zî yew lac o, yew keyna ya û yê wirdîkon ra xişni keyna, şinik zî lac o. Qeydê Rocbîyni wendecawo wertîn di û pola yewin di bibi. Hinî gureyê gedon qedîyabi, hêdî hêdî gedeyî şonî û yenî, bonderê ca û imbazonê xo yê neweyon benî.

Him Estanbol û him zî şarê Estanbolî hemini rê zaf xerîb omeynî, zerrîya yînî ason zî nêbo, kar û gureyê yînî seki rar di bimeşîyo. Çi qas ki mabe dekeweno, veynenî ki qirm û rîyeyê aswas û wesweseyonê yînî esto. Ewnînî ki ino şariston derî ware û wayer nîyo, xo mehkumê waxt û şaristonê xerîbî veynenî, xoverodayîşî ra vişêr yewîna rarî nêveynenî. Gay lezi lezi xûlqê wêrayî ser bikewî, senî û komî dir çî moj donî û gînî bonder bibî. Nî ki sey heba xelle ya ki kewena binê destara areyeyî û têtahnîna yî zî ayo moj wîta di têtahnînî û tuz û dimon benî, Estanbolî ser ra vaydîyenî. Zonî ki dekewî yew kemone hinî derî xelasi rew rew nêbena. Rocbîyni zî mîyon di heme çêher gedeyê girdî ino tewir fikrînî ki mar û pîrdê xo rê derdonê neweyon pirûnînî. Mitbaxa ki mitbaxi nêmone-

na, hi awke û hi zî sey wedeyî yena gurînayiş ha tede yî û kenî ki kulfetê keyeyî rê şomî bihedernî. Zonî ki sewbîna çareyê yînî çinî yo û xo rê pey hedîyenî.

La hedîyayiş zî heyonî yew ca wo, wendoxê lise kewenî çareyonê newon mîyon. Seba kû waxtê xo nê vengî kar sero vîyarnî û dabara keyeyî rê bibî paştî, roco bîyn kar persenî. Cayî ki ser pirûdabi toyî nê-bîyî, la toyin zî eynî roc sozê karî nêdabi bider. Lac û keynaya girdi dersê xo ra zêdêr xemê mar û pîrî kerdinî, zaf zî derî interîyaynî. Ge ge seba kekê Memo'yî nêwaştinî çîy bider persî la ge ge zî waştinî ki derdî bonder bibî û xo mîyon di derî çare veynî. Şik û gûmonê yînî aswas û wesweseyê dabar û şîlikî sero veynenî û rocêkî mar û pîrdê xo ra vonî ki ma wazenî ino halê ma yo xizonî ra bixelesî. Ayo semed ra bê xeber vîstîşê şima ma xo rê kar gêrayî û çand cayon ra zî ma tekîf gîrewto. Eki şima zî rîza veynenî ma kû hi wendeyê xo biromî û hi zî hetê dabarai ra bara xo zî defîynî. Zerrîweşî yew cafe di û Şayda zî yew maxazaya kincon di xo rê gure dîy.

Karcayê wîrdînon zî kolonê İstîklalî di bi. Keyedê yînî ra nîzdî bi. Verîcûyî may û pîy rîza nêveynenî û wendîşî avzelêr veynenî. La yî ki sozo arîzî nîşon donî, yî zî ayo sozî sero mecbur monenî û kar di xebeveyîşî gedon zî pewjnenî. Hinî waxtê qarînedê verînî zî ome-yo, qarneyê hemîni hi gorebê zerrîda hemîni bi û hi zî yê may û pîy bi la may û pîy karî semed taketnaket di yî. La zaf zî pey xebata gedon şayî nîyî. Waxt bê waxt şeyîş û ome-yîşê wendecayî û karî senî cî mîyon ra vecenî? Çi tewîr serebuton veynenî? Û çî tewîr ra çareyon rê ri bi ri monenî? La ki bê ma mişguleyon sero çare bigêrî û dekewî kemoneyon mîyon û xebera ma zî tira çinî ba sew ma kû çî tewîr belayon rê ri bi ri bimônî? Seba kû bi nomîs û heşma monî toyî bedelî daybî û beno kû zî hima bidî zî. La sew yew bêheşmê-yî di monî û ma dir zî bari nêkerî, ma kû se bikerî?

Demeyo verîn di omeysiş û şeyişi di yew mişgule nêasaynî, seki heme çiy rar di şiyero. Perewo kû girewtinî erdinî destê marda xo kerdinî. Dabar û şilik di hinî yew asonêyi zî roniyaybî. Ringuzê may û piyi binêkîna abibi, mahdî reydir, mijîjdê hewlî reydir warîştinî û ronîştinî. Hîna kê m û zêdî aswas û wesweseyê dabar û şilikî kîştî diyabi, binêkîna vişer keye di yew huzir roniyabi. Hinî hêdî hêdî hêviya ki Estanbol di pey deberiyenî û tede keye û şilik kerdinî bilon zî bestinî. Taketnaketi cayê xo xeyalonê kar û dabari rê caverdabi. Piri zî xo rê kar sax kerdibi û yew nêmsoz zî girwtibi. Keye, keyeyî zî nêmono, welat zî derî qasê welatê yîni şîrîn û avzel zî nêbo, dormere ra xism û dewijê yîni zî çinî bî, mezelonê welatê neweyî di yew gorrê kal û pironê yîni zî çinî bo sew la hey-na pey hêvidarî ki hêdî hêdî bihuzir bicuwîyî. Çand rocon ra pey Cindo'yi zî ver bi karî verna. Huyî ridê hemini di xo nawitinî.

Hinî mitbaxi di zî werê weşi pewjîyaynî û buya xo na weşi zî keye vistinî. Hilla ki dost û imbazî zî biomeynî şiyaynî bê minet wereznî, mêmûn hewîna-yiş derî hîna ason bibi. Hind dîy ki betlone zî qedîya û wendecayî newerna abiyî. Serra newa di hîna vişî teftalê xo têkerdibi û hewciyê xo caerdibî. Waxto kû şonî wendecayonê xo çew tede zerrî şikte niyo, aver apeyo kû derheqê gedon di zerrîya may û piri ciqliqî kerdinî hinî xo dabi apey. Hima hima cay yew aswas û wesweseyê çewî nêmendibi, karê piyi zî hewl meşiyaynî. Keye şiyaynî vaco kû hinî ma zî "ax" dawo apey û "oxêş" ma rê zî akewto. Eki Homa ma ino haliya verde sew ma rê bes o! Serri ona qediyayi, çewî yew seredej nêdiybi, zerrîya çewî rocêkî zî nêgulpnabi, leşa yîni di tewon sere bi yemnû ser nênabi. Kuçe û dormere di sere tukerde veciyaynî teber û gêraynî.

10

Rocêkî laco pîl, Zerrîweş kar ra apey agêrabi. Mar û pîrî normal dîy û nîşîyî ser. Va ki beno kû cay yew imbazî ya mendo, ya zî karca di derî gure veto, cuka ki erê visto. Yew çand rocî beyntare di ona vîyart hey-na çand rocî pîser erê ome. Pîrî waşt ki tedir qalî bikerero la mayî sey mîrikê xo nêfikrîyayi û nêverda ki pîy şîyero ser di. Waşt ki zerre û teber di halê Zerrîweşî taqîb bikerî û mari tunikê yêyî sehînayî ki yew keşa peron tede esta û pîrî di bari kerdi. Hilla ki îni peronê zafon tede veynenî derî erd û asmîn pîranî-yenî. Gunî gala seredê yînî kena û adirê leşa yînî zî wardeno. Yew sereqobat gînî ki seki biteqîyî. Qalî yînî feki di laqa monenî, zon gîrîno û lal beno. Belingaz û bêqomî bira nêzonî ki se vacî û kura di ververnî yew çare bigêrî. Xeyalî ki mezgê yînî di neçarêyî viraştâ kenî nîkenî nişîyenî gironeyê xo dest di vecî. Bermî dest nêkeweno kû xo rê ronîşî şefaç û yerêyî bibermî. Sebebê xo teng kerdişê yînî bêxîretêyî û bénomisêyî ver bi û halo kû lac tede wo beno kû zî rarê heşma nêmendîşî zî bibo. Seki ino lac yew guredo xirabi di wardo û ronîşo, cuka ki îni pereyê zafî tedir estî. Eki ino tênê ma raşt vecîyo sew ma rê awa gîyî di veşayîş moneno.

Ayo mehel êro ra pey keye di huzir nêmoneno. Ma kû heme yemnû bivireyî û sey nehon coşme ra tehtîlîraş bî. Himserî wirdî zî hi sist bîyî ki, sew merdim puf bikero sey puşî vaydîyenî û hergû yew yew hetî ser di vinî benî. Pizeyê yînî bider veşeno, dest û polî yînî têqerefinî. Hi bêhîvî kewenî ki nêwatônî halê xo zî çewî dir bari bikerî. Şik û gûmononê xo, xo di seter-nenî û nimnenî. Pîy teber ra binêkî rêça lacî çarneno la çîy tira fahm nêkeno. Intereyîşê Memo'yî hima çewî vîr ra nêşîbi ki yê Zerrîweşî zî xo dawo tên kerdiş.

Zonî ki yê Zerrîweşî çîyo hewl nîyo, eki çîyo kû yînî fikir ra vîreno bibo sew xo kîştîş zî dest nêkeweno. Xo pîze di Homayê xo ra vono kû mala çîyo kû ma pey şik benî wa zuri bo! Mala qet bin û binenşeyê yêyî çinî bî! Nî ki Estanbol zî ma rê herom beno, cuwîyeni ma hemin rê tahl û tirş bena, şeref û nomisê ma pûnc pereyi benî û ma kû gêj bibî kuçon bikewî, hewîya neyarî bibî. Rar ayo kû ma xo gonî gonî defîynî herri. Eki herri zî ma wedero sew hewl o?

Tam ino mehel di kal û pîrî ki mezêl di gonî bîybî, vernî bider girewtibî, derî tewir bi tewir ra şîret ronabi, hîşar kerdibî omeybî vîrî. Hesr û çilonti têmîyon di alişkonê rusileyon û erdişinon rû xo verradaynî defa sîneyî. Seaton reydir bê kulfetî berma, berma û berma... Teyna qîrriyi û barriya yêyî dormerî ser nêkewtibî. Çi xirab kewtibî! Vono kû Cindo bibîynî û ona xo ino hal bivistinî! Hinî eki yerêyî ki lacê mi ome ez roşeno tedir qalî keno, sekeno û çî gure di beno gay ma ra yew bi yewî vaco. Gay ez Zerrîweşê xo çîyê nêbeyî ra bipawo. Nî ki yû yew guredo bêxireti di bibo, ma ino halî hewanînonî. Zerrîweş hi zerrîweş bi ki heme veynayoxî aşiqê der bîybî, rindêyi û hewlêya yêyî nomedarî bî. Û ki inkay çîyo kû merdim pey şikîno û pey dejeno tede bibo sew heme dost û imbazê yêyî ki tira biremî. Dormerî têdir balhayî berdinî ki çî elerz, çî welathes, çî wayer şîret, çî xebatkar, çî xîretkar o! Sermalî komî kû bidîynî ha şinik, ha pîl, ha cenîyi û ha comîrd heqûmicid aşiqê der bîynî. Komo kû tengone di bidîynî, eki destê xo bider nêvistinî sew tira nêvîyertinî. Pûnc qûruşê yêyî bibîynî heyonî qûruşo peyen zî imbazon dir bari kerdinî. Eki nonî ser bibîynî sew loxmewo xişn û hewl daynî imbazî ver. Yêyî ser ra xorto asarîn ayo coşme di çinî bi. Xora heyfê ma yû pîrî zî wîta di yo. Ihind sîflêyi werda û lac erdo mexelî ser, sew wayerê gureyê xirabî derî deki pirûno û yêyî xerc bikero? May û pîy ki xo çerray efo

nêkerî. Çimkû birrê metropolî omeyîşî nêdaynî wa ka Zerrîweşê yîni zî asar yew gurewo xirabi di cayê xo nêgîro. Eki welati di bimendinî zaf zaf wa ka yû zî rarê kekê xo ra şiyero, xora ayo rar zî çewî derî tomet nêdîynî. Çewî tira lomeyî nêkerdîni, may û piyî zî awa gîyî di nêveşnaynî.

Condo'yî kar di yere xo di erdibi û cayêka nêmoneno, raşt yeno keye. Wazeno kû ino halî Siltona xo dir bari bikero la nêmekenîno. Çimkû yayi zî nêwaştibi bîrî Estanbol. Amedi şeyîşî hedîyaynî la metropolonê Tirkîyeyî rê qet xoveronêdaynî. Cuka ki pey zaf interîno, cuka ki xo teyna veyneno. Hinî şomî werîyaybî, şewi zî dicayî ra vîyertibî la hima hatû beratê Zerrîweşî nêasaynî. Destê nimacî bi, ber kuwîya, pîrî kerd ki şiyero derî berî akero la mari nêverda. Fikrîyayi, va beno kû piy zorê comîrdêyi veco aver û heme çiyî bimederno, rarê qalî kerdişî pabido. Hêdî hêdî hetê berîya leqayi û bi vengê nimzî va ki şima kom î? Lacî zî verê berî di bi vengê teresî va ki daye ez o. Xeyrê xo ti şiyena berî akera? Mayi bi rîyê huyîni ber akerd û va ki delalîyê mi ti xeyr omeyî. La lacî veng nêda, sewt x ora nêvet û hima lezilezi tira vîyert şî wededê xo, ber zî xo sero qefelna. Hinî asaynî ki Zerrîweş yew guredo weş di niyo. Aswasê mari zî, yê pîrî zî seki raştî vecîyo, wîrdî zî eşkera nêmekenîni cî ra çiy vacî. La hima hima şikê xo di heqdar vecîyayî. Mayi mîrikê xo ver ra warîştî hetê berê Zerrîweşîya leqayi. Berî ver ki resena, çand hewî berî kuwena. Sewt ki lacî rû nêkeweno, ina hewî veyndona, Zerrîweşê mi, zerenc û bewronê mi, ez tu rê qirbon, ti şiyenî mi rê berî akere? Lac xo ki kerr û lal keno, ina hewî piy xo cerebno. Zerredê wedeyî di vono kû ez wazeno binêkî teyna bimono la may û piy ki zor kenî derî berî akeno.

Siltoni, Cindo peyser veradabi û xo teyna wede ra kerdibi. Halê lacî ki ra ewnîyayi yew hesra xorî-

ni onti û va ki qey ti ona erê mendî? Lac, seki ven-
 gî nêşnawo û goşpey kerd, mari newerna dibare ki
 kerdi, lacî bi gizma va ki qey xeyr o ti mi vîrîyaya? Ti
 mi oncena hesabî dayişî ver? Hewawo kû Zerrîweş
 dekerde wo û bi gizma vacîno heqûmicid raro raşt di
 nîyo. Hewawo kû fahm beno ha yew xeletêyi di yo,
 yew şaşêyi di wardeno û roşeno cuka ona tewş bîyo
 û tewşikî vacîno. Inî vona ki lacê mi ina seata xey-
 rîni nîya, qey seata ki ti kar ra vecînî kura ya û ina
 seati kura ya, yû hima gizma vera panîyeno, tazilê
 yayi dono û dekeweno cila xo, leheyfî zî heyonî seredê
 xo onceno. Sey heme hewi mayî bi ûsila nîzdî bena
 û şona cila yêyî het, goşeyê leheyfdê yêyî berz kena
 û çand hebî miçon pîsero padona. Vona ki delalî û
 şîrînê marda xo, ti ona nêbî? Qey ti çina veynenî ki
 hayaya ma pey çinî ya? Qey ti çerray kar ra zî, gure
 ra zî, wendeca ra zî erê nîyomeynî? Verîcûyî ti şîynî
 wendeca tira pey ti omeynî keye û hima şîynî karî ser
 la inkay cay ti ona nêkenî? Ina çand rocîya ki merdim
 nişîyeno fekê tu akero, tu ra çîyêkî vaco! Hê vaci şêr û
 palingê marda xo, çina ra ti ona yî? Vacî ki wa maya
 tu bi darba tu fecir nêbo û çewî rê zî bar nêbo, des-
 tonê çewî zî nêkewo? Qey kom û çi semed ra tu beno
 konca? Çi gure tu kerdiş donî ki; ti bi peronê zafin û
 cillonê weşon gêrenî? Û Hilla ki ti keye zî yenî hergû
 yew buya weşî tu ra rar kewena ki; merdim pey deng
 beno, serxoş beno, gêj beno. Qey kom kî rê înin bê
 sîflêyi û renci bexş keno? Kom heyonî ki tu ra se pox-
 noti havili nêveyno, yew poxnota xo tu rê caverdono?

Biewnî delalîyê marda xo, eki ti ma dir halê xo
 bari nêkerî, ma kû heme têdir vînî bikerî! Eki ti yew
 şaşêyi di yî sew êro tira agêrayiş ason o û bêmişgule
 wo la ki mêşti bi zor û zehmet bibo. Ina şaşêya ki ti
 tede yî, teyna ti kû tira zirar nêveynî. Roc bibo kû
 kulfetê keyedê ma heme tira zirar veynî. Dormere-
 dê tu di heme kes kû tira zirar veyno. Bes nêbeno,

himwelatiya ma kû zî tira zîrar veynî û ti kû imbaz û himwelatiyonê xo rê bibî hezeka xirabi. Ez palingê xo rê qirbon bena, ez tu dormere gêrena, sedqeyê gondê tu bena, sewlonê tu ra awi wena, marda xo rê raşti vaci, ti ha se keni? Konca di û komî dir donî û gînî ki ti ona erê kewenî û dekerde yî? Ma çew nişiyenî fekê tu vacor bikerî? Mayi ki ona erê kewena pîy zî dekeweno zerre û ringuzê wirdînon zî têdir pulisîno. Xora yê Zerrîweşî verî ra pulisnayebi, wirdî zî hewl nêveyniyenî. Wirdî têdir xo oncenî pîser la mayi îtiraz kena û pîrî lezilezi teber kena, dima ya zî lacî halê yêyî ya verдона, wede ra vecîna.

Wirdî himserî mitbaxa ki sey yew nêmkuçeyî ya şonî tede nimac xo di onî. Heyonî destê nimacî fekê wirdinin zî nêabi. Zerrîya xo di xo çukon rû donî, çi heyf ki Cindo zafêr interîno û xo ver keweno. Xo di vacîno kû kom gededê mi sere di çina wo kû biro sebebe yêyî ez o. Ez o, çimkû verê keyeyî mi tada metropolonê Tirkîya. Vir û gomone çewî bi Estanbolî çinî bi. Eki mi xo rê Estanbol ihind şîrîn û erjeye nêkerdîni sew wa ka gedeyê mi zî mi vero vecîyî û wa ka wîta nêresî. La veyndayîşê malayî nîzdî bi û Cindo nêtebetîya û persa, va ki qey xeyr ti dekewta û hinî nêvecîyaya? Vatiş hima nêqedîyabi hesronê delalîyi têver rû warkerd, leşa nazik û pistinê derd û kulon rû acêr gûnayî, pistino kû serron reydir pîçekî hewî-naybî, pistino kû yew bi yew gedeyî xo rê tede kay kerdîni, pey hewîyaynî, tede waxt vîyarnaynî. Çîyo kû nimite bi hinî nêmendîbi, merdim ason şîyaynî halê talokîyî veyno. Çi hind mayi nişîyaybî lacî ra qali bigîro zî, raro nêweşo kû Zerrîweş tagêraynî hesronê Siltoni cayê yêyî nawitinî. Cindo'yî inî hêza dayî xo ki şîyero Zerrîweşî ser di mari nêpewjna, ver gêrayî û ca di roşejna. Wirdinin yew axo bêdermon kaş kerd û "Estanbolo kû merdimi sey yew heba xelleyî têtah-
neno" xo vîrî erd û hesrê wirdinon lay û laser bîyî xo

pîya resna, cor di war kerd gorrê meyitonê yînî. Polo bîyn di zî Zerrîweş heyonî destê nimacî nêrakewtbi û xo berdo yew çatalrari resnabi. Ya keyeyî vijînenno û ya zî rarê benasat kerdişî vijînenno. Ya nomis û xîretî vijînenno yan zî bénomisêyi û bê xîretêyi vijînenno. Ya welathesêyi vijînenno yan zî welat rê neyarêyi vijînenno.

Hewlwelaqo kû tede wo hêş û aqil tira veto, tewir bi tewir ra hûkon di xo nimneno, keno kû xo keyeyîya no la se keno sew xo rê yew setari nêveyneno kû tede biseterîyo. Ayo mehel di eşnaweno kû berê wededê may û pîyî abi û dekewtî zerre. Yû zî neçar o la ayo feraset di xo têkeno û hêdî hetê berê teberîya şono sewlonê xo ki paykeno, bi vengê nimizî berî degîno. Hilla ki dekeweno kuçe yew axê bêdaruyî zî yû oncenno û hewa peyeni verê xo tadono keye û vono kû werrekîna heme çiy sey verîcûyî bibîynî, werrekîna wa ma dewa xo ra nêqerefiyaynî, ez erjonê welatê xo na bimendinî. Wa ka mi xo rê kutikon dir lep biwerdinî û sey kutikon biwezuraynî! Hinî keye ra ewnîyayişo peyen bi, bi leşa kû homtayi bîya, ta weslêki ki di zî nêmendo, kuçeyê taxedê xo yew bi yewî ra xo vîzikna, hûkî dayî xo û çimon ra durî kewt. Axê xatir waştîşê mar û pîrî, war û biraron pîzedê yêyi di sey yew kulli mend. Vono kû mi hima newe fahm kerdo ki ez ha sekeno û çi raro xirab di yo la ez erê kewto. Helalêyi waştîş yena vîrî la vono kû merdimno sey mi çina helal keno kû mar û pîrdê xo ra helalêyi biwazo! Ayo beyntare di kuteron û martiyonê Estanbolî ser ra pellî weşonaynî û seki wesîtê mayi bieşnawî û tedir rayonî bî. Teyrî seki pistinê mari di bihewîyî û hal û waxtê yayi ra fahm bikerî heyonî cayê xirabî Zerrîweşî dir rayon bîyî. Ayo halnêweşêya xi di vono kû; merdim vono qey ez ha rardê şeref û xîreti di yo! Û duristêyi, hewlêyi û helalêyi ono xo vîrî. Heqê mi xo awi di kerdiş o, heqê xo behre Marmara di xeneqnayîş o la bî veynî asar comîrd konca mendo kû rarê nomis û

şerefi vijîno! Çimkû heme çiy tedir bazar bibi, eki yû yew şaşeyi dima bo, kakozurê keyeyî ronîyeno. Heyonî ki ti gonîyî gay ti ne yew merdimê xo veynî û ne zî yewî dir çiy bari bikerî. Çiyo kû zî ti zonî, kerdeyî ki ma pîya kerdî gay ti xo di biseternî û tu dir şîyerî mezêl. Waxto kû inîn xeyal keno hesr û çilonti tēmîyon keno, zerrîya yêyî teng bena, hesrî ca pênedonî û bêveng bermeno. Hesrî cor di alişkonê suron rû war benî, leşi yew hewi di adir gîna la xo pîze di vono kû; erê yoooooooooooo! Erê!!!!!!!

May û pîy nimacî dima suzdî sero venekîni, ayo mehel mayi hewnon rû gûnena û xafîla erzîna xo ser. Cadi wedeyê lacî xo feka kena, wedeyî ki veng û varit veynena, zonîyî bin di têqerefinî, zon lal beno, ta leş ara vecîno, gunî yew hewi di vazdê seredê yayi kena. Zor çî bela xo berî ver resnena ki sewlê yêyî zî wêra di nîyî. Xo çûkon rû dona, sey sarbina erd rû rojînîna û turinc dona. Mîrdek veyneno kû suzdî sero nîya, wazeno kû duzda yayi bikewo. Inî hêza dono xo ki wardo, berî akero û veyno kû Siltoni konca ya, sera şîya? Hima araşt nêbibî ki ta tira vecîno, qom birîno, leşa yew ver homtayî bena, sey pontîla vaşî erd ra derg beno. Cindo wazeno kû hawar bikero la tersê gedon ver heme çiyî erzeno xo pîze û Memo'yî ra ardim wazeno. Êêêê Memoyê mi, hê tu bizonaynî ki se bîyo birardê tu, ha çî daraxi di yo û sera şîyo, komî dir dono û gîno? Çî gurewo pîs di wardeno û roşeno? Hewlwelaqo kû dekewto çî daraxi di yo? Ma belingazî senî ki binê ina darbi ra wardî? Û ino aqobetê nedîyarî komî dir bişiyî bari bikerî? Êro ra pey, kom çî zono kû hima çand berî ma rû padiyenî? Ma kû çand hewlwelaqon mîyon bikewî? Ma kû komî ra yew şîret û aqil bigîrî? Ma kû pey kom bawkal û zîyara zerrîya xo vero bîyerî? Adirê zerrîya xo bi çinayî bitefinî? Hi bîyo ma ki, qîflê ma çiyêkî ra zî nêreseno kû ma xo rê wayer vecî, rar vijîni.

Maya bê daruyî û bêdermonî xoverodona ki war-
da la sey tura awi recefîna, tirmê yayi hewayê pontî-
la vaşî ge polê raştî sero, ge zî polê çepî sero têqe-
refîna û heyna erd ra oncîna. Kena nêkena erd ra
arînédeyena. Sereqobatî gala mezgîdê yayi kerdibi,
zon bide gîrîyabi, sewm serkewetibi, hêş û aqil vila
kerdibi, dermonê deston û ningon tira vetibi. Vengo
kû pirûgûneno; hewar, hewar dâye! Hewar mi mar-
da ciwononî rê hewar! Hewar, hewar marda Memo û
Zerrîweşî rê hewar! Hewarrrrrrrrrrr! Hewar!!!!!!!!!!!!!!

Înî hewaron ra pey hêdî hêdî zon fek di gêreno û
tênonê xo pêpeyanona. Ez sedîqeyê seredê şîma kul-
bizikon ba, ez destîqê şîma çeç û jêhaton ba! Ez bo-
raqê verdê ningonê şîma ba! Eza belingaz û nezoni se
bikera? Kom heta û kom welatî ser di şîyera? Ez senî
gedonê xo yê mendon vergonê Estanbolî ra pawena?
Zerrîweşê mi se bi, sera şî? Kom heta û kom honqarî
ser di şî? Bira ez nêzono kû sera şîyo û bi komî xeya-
lon reydir şîyo? Û kominin berdo û sera berdo? Seba
çînayî berdo? Zerrîweşê mi, çi gure di yo û kura di
beno? Tirî xo rê neyar o, yan zî welatî rê neyar o? Ez
a bêgom û bêqomi! Ez a zerrî şikta û zerrîsotî! Hêdî
hêdî qom omebi bider û xo kîştôn ser di qelebnabi û
xo wedeyê Cindo'yî ra zerre kerdibi. Eki veynda Cin-
do'yî ki dona, yû bi vengê verînî wirdî ningon sero tîk
beno. Hima nêvato kû qey xeyr o delalîya mi, lacê ma
ra xeberêki esta la lewonê yayi heme çîy xo di nawî-
tinî. Çimon ra hesronê derdînon war kena. Zon fek di
gîrîyabi, desto yew kaleki di, bi ayo bîynî zî waywelîkî
lornaynî. Pey ewnîyayiş û deston derî toy çîy vona la
Cindo'yî hinî zona ki Zerrîweş keye ra ragêrawo. Wirdî
sey yew leşî têrû pîşînî û hesrê yînî zî têya resenî cor
di warkenî ki adîrê qesba serdîn bikerî, hewna bikero
la qala veng bî. Ayo mehel bi hesr û çîlonta xo ya wa-
zenî ki teyr bî û Estanbol ser ra bigêrî. Kuçe bi kuçe,
papul bi papul, taxi bi taxi, şarçe bi şarçe, qûl bi qûla

Estanbolî verpêdî û kavirê û beronê xo sax bikerî. Komo kû vera kewt tira şîrînê xo pers bikerî. Hilla ki neçarêyi aver vecîna, xeyal di vonî ki seki erd bişeqîyo û ino bêqomê ma zî tirû war şîyero. Seki zuri bo destê nimacî keye ra teber kewtibî? Şewa tarîzalmati di kuçon di, papulon di, taxon di meyesî ki siloyon ser ra serqoçileki kenî tira Zerrîweşê xo sax bikerî, teyr nêgêraynî ki yew xebera Zerrîweşî bide persî, hergû xûlûxûlçikonê Estanbolî di persê Zerrîweşê xo bikerî. Bi xap û xapînayiş kavirê ma, şîrîn û delalîyê ma ma ver ra wedert. Bi çinayî û kom welatî ser di berd, beronê ma? Têne ki zerrîya merdimî veşnenî, sîya wû sot kenî pîdima rêz kerdî. Yew zî nêwatono kû hesê xo bikero, sewt zî çewî rû nêgûneno. Sey maron têrû pîşte cadê xo rû rojînayeyî. Bi dest û polon lornenî, bira kî nêzonî ki çi hal û kom ewladê xo rê lornenî.

Cindo'yî, cawo kû tede çimê xo akerdibî û heyonî Estanbolê bêxeyrî qûl û qûlçikî nêverdayî seki tabigêro. Ge zîndon di, ge goriston di, ge koya, ge dêşt û newalonê dewi di, ge eynîyî ver di, ge bîrî sero, ge zî bîrê bêbinî di lacê xo gêra. Hesab bi hesabî sero kerd, lomêyî bi lomeyî sero xo ra kerdî. Keno kû gazinc û lomêyonê xo rê verpers bo la raştâ ki sey rocî ver di bereqîna vernî bide gîna. Xo sucdar veyneno, xo bi ecrin û gunekar veyneno. Xo pîze di vîyarneno kû cay yew çîy xo sereyi ser di bîyero la aqilo selim ki dekeweno beyntare, ewnîyayişê yêyî puç veceno, vindertişê xo yê şaşî ra fek verradono û şono wededê wîrdîyonê xo. Yew bi yewî muçî keno û xo pîze di bermeno, wayweliki wayweliki sero veyndonno, deyiri bi deyiri sero rêz keno. Xo mesulê aqobetê xirab yê Zerrîweşî veyneno. Çîyo kû omewo seredê gededê yêyî ser di dalamata xo veyneno. Vono kû sew mi goş meyitonê ma binaynî, ez ewtîya nêresaynî. Eki mi şeyişê Memo'yî xişn nêkerdîni, mi zî sey dewij û doston normal bidîynî, wa ka ma ino hal nêkewî? Eki vatiş

û eşnawitişê imbazon mi xo rê esas bigirewtinî ez ka Amedi ra nêvecîyo.

Ino moj gazinc û lomêyonê xo têrêz keno. Hind veyneno kû mallayonê Estanbolî bi qîrrî û barriya xo Estanbol gonî kerdo, zemelewo kû Estanbol vistbi kuçeyî zî gonî kerdibî. Ayo kû şîynî kar, ayo kû şîynî dikonê xo akerdinî û ayo kû şîynî wendeca yew tégê-ra girdi taxi vistbî. Cindo bi aya leşa homtayi wededê wirdîyonê xo ra vecîya û şî narîna xo ver di turincî da. Desto yew hesrê yayi esterdi û desto bîyn zî yê xo esterdi. Dima zî wirdî destê xo têrasawitî ki hesronê mar û pîrê qesba veşayon têyabiresno, dejê xo yê yayi mîyon di bihewîno. Bahdî zî rinda xo ra vono, hewawo kû aseno ino aqobet ina daraxa nêvindeno. Mi ino bîrê bê binî ra zaf xewf kerdo û ez tira tersawo. Werrekîna mi goşê xo tu û imbazon binaynî! Ez ka êro roc sucdar û sebebê ino aqobetê nedîyarî nêbibîynî. Çinawo kû şîma sereyî ser di ome û êro ra pey zî bîro ez tira mesul o. Eki mi ino rar şîma ver nênaynî, wa ka ma êro roc dewa xo di bî. Wa ka delalîyê ma zî virîka ma di bo. Ma ka welatê xo di Ameda rengîn di bî. Mi goşê xo qalonê vengon serna û ez bîyo sebebê Zerrîweş û kerdonê nêbeyonê yêyî. Hima êro ra pey sebeno û çîna ayî belingazonê ma yê mendon sereyî ser di yeno ma ra nêsaeno. Delalî û zerrîna mi êro ra pey ti rar vijînena û ma ver nona û ma heme xo rê ayo rarî tepîşenî. Hima ti rar roni, tira şeyîş zî bara ma ya. Êro ra pey “Ahdûwehd bibo kû ez sey xo bikero”. Ez hînî sey nomedê xo zono, roco kû mi nêt kerd ki welat ra vecîyo, caverdo, ez ayo roc ra rar ra vete wo. Raro şaş mi ayo roc vijînabi. Ez hînî sey xo nê, sey şîma keno, aqilmendê mi şîma yî. Ters û xewfê mi îni pûncî ki mendî, ma senî neyarî rê alef nêkerî!

11

Hîni hêdî hêdî rocî sukerdê û dormere zî roşn bîyo. Gedeyî ki hilla nimacî şonî wendeca haya kerdî. Sîpare zî têbibi û sofre ki raşt bi, gedeyî zî duzda kekê xo kewtî. Kekê xo wededê yêyî di ki nêveynenî mar û pîrî ser di agêrenî tira persenî. Vonî ki keko Zerrîweş konca wo? Yî zî hi kenî ki wa wîrdîyê yîni şikon sernêkewî. Vonî ki yerê ma hagîdar kerdibî û va ki mêşti wendeca di toy gureye mi esto û ez binêkî rew vecîno. Wa hayaya şima pey biba, dima şî wededê xo di rakewt. Şefaqî ma ki warîştî ma dîy ki wededê xo di nîyo. Ino vatişî zaf zî gedeyî vernêerdî la bi ino vateyî hiş biyî û helqa sofreyî nonî. Sîpare ra pey hemin pêlekê xo têkerd û rarê hergû rocî tepîşt. Yî ki keye ra vecîyayî pîrî zî rarê wendecayî romit. Teyna Zerrîweşî aya lîse di nêwendinî, waya yêyî ya ki dima rapincîyaybî yayî zî aya lîse di wendinî. Hilla ki pîy şono saxêya lacî hesabê Şayda zî keno. Seba kû şikon sernêkewo û derî xeyal nêbo xo tira paweno. Çand ders û mabenê derson di dormere di rêça lacî çarneno la ino rêççarnayîş bêhavil bi. Goma ki derheqê lacî di çiyêkî dest nêkeweno, zerrîya yêyî di xilxile pirûniyeno, sîyî ser ra şona, qirtê yêyî qerefino, dima rarê karcayê lacî bi aswas û taketnaketî gomî keno. Wêra di toyin ra lalîkî persê lacê xo keno. La veraperso kû gîno “êro çand rocîya ki karî ser nîyno” bi. Dato, ez tu ra çiyêkî vaco; verê nîyomeyîşê xo tede huzur çinî bi, ma zî va qey dersê yêyî weş nêşonî. Timî dekerde û hêrs beye bi, fekê yêyî ra adir varaynî. Ma çewî zî haldê yêyî ra çiy fahm nêkerd. Zaf zî vîyarnayox bi, hewl bi, xûlqweş bi, zerrîhera bi la ina peynî di teng bibi û hêşê ma zî sernêşi. Bê pers û bê sewal ma mîyon ra vecîya, şî, kar tereknawo. Ma va ki vacvêrê yêyî pîsernîyayî la kû bîro. Ma bendedê yêyî di bî. Hilla ki inî

vatişon eşnaweno dermonê çukonê yêyî tira vecîno, hêdî kuçe di sey yew parsincîyî çok dono, turincî ra sereyê xo tepişeno. Xo pîze di vacîno ki “hima newe keyeyê mi xerepîya, dest û polê mi têzerre bîyî. ” ez senî ki hesabê Zerrîweşê xo bido? Ez sêkeno û çi rar xo rê veyneno? Ma “hi Îsa’yî û hi zî Musa’yî ra bîyî”. Sebebê welatî ra veceyîşê ma, mi waşt ki; wa ma ra çew ne welat û ne zî himwelatîyonê ma rê yew xirabi nîyero bi la ti bî veyni ki êro ra pey se beno! Mi ino semed ra welat terekna, mi ino semed ra terkê kal û pîronê xo kerd, mi ino semed ra merdim û dewijê xo caverdayî, mi ino semed ra peya xo tadayi welat û himwelatîyon û ez remawo, remawo, remawo!!! Fatu-
raya ino remî mi rû giron bîyi, hima kû zî gironi biba.

Werrekîna, zext û zordarêya ki ma sero virazîyaynî, ez verba yayî bivindertinî! Hetê welat û himwelatîyona waştekekêki ma ra pawîyaynî ma bêxewf û bêters hewcîyêya yîni ca bierdinî. Aswasonê ki mezgê mi di halin pirûnabi, waxt û cadi mi bertaraf bikerdinî, esl û fêslê xo zî nêheremnaynî, wa ka bedelê bedelon mi bidaynî. Ez bênomisêyi û bêxîretêyi vero warîşt, kewto hewlwelaqon mîyon û mi gedeyê xo bi destê xo êştî kêşt, neyaron. Mi bi destê xo gedeyê xo kerdî neyarê welatî û himwelatîyonê xo. Cay ez pey zono kû çi tewir nezîh tira peyda beno? Bira ma çew pey nêzonî ki karo kû keno çi tewir o? Bira ma pey nêzonî ki mêşti sereyê komi warda xo ya zî birardê xo bela rû ceneno? Kom welatî ser di şîyo û komin dir şixûlîno? Xaskî sebebê wîta omeşê ma xelasa gedon bî û zirar çewî rû nêdayiş bi, welat û himwelatîyon neyar nêbeyiş bi! De ti bî êro ra pey zirarî û neyarêyi temeşe bikeri!

Ters û xewfo kû pîzedê Cindo’yî keweno yêyî neçar verdono û rardê keyeyî fiyneno. Hinî yerê derîyawo û hilla wendekaron apey agêrayîşî yo. Yû zî newe nerdunon ser kewto, hinî ha zerre di yo. Goma

ki Siltoni mîrikê xo rê ber akena û reng û rungizê yêyî ki veynena zerrîya yayi pirtnena, qirtê yayi pîze di qerefino, gunîya yayi vazdê seredê yayi kerda la bêveng a. Nişka ra qîrrena û qîrriya yewi erd di, aya bîyni zî asmîn şona. Vengê hewarî apartmoni zaft kenê. Mîrik hima ca di berî degîno, xonima xo rû pîşîno, têdir çik cayî ki hêvî bider kerdinî hewar bider kenî. Fek û pîzeyê yînî pirr qalî bî la tayê vaceyîşî çewî di nêmendibi ki xo rê bivacîyî. Ina bêsewtêyî di mezgê yînî waywelikon nurneno û pîzeyê yînî zî dejî şelneno. La seba Zerrîweşî heme çiy erê yo. Yerêyî ki gedeyî omevî heme çiyî tedir raştaraşt bari kenî û çareyi sero fikrînî. Hemî nêt di êro ra pey se beno bî? Nurri û durra xo ra ewnîni, qîflê xo sencenî, bahdî fahm kenî ki qereqolî hagîdar kerdiş û dadgehi di duz akerdiş ra teber çiyê kû destê yînî ra bîro çinî yo. Hima ayo yere ser qereqolî rû donî. Qereqolî ki zî heme zonaye tira girewt, vonî ki şima şiyerî, eki ma cay çiy sax kerd û yew aqobet xo dest vist ma kû şima dir bari bikerî. Roco bîyn zî duzgerî hagîdar kenî û duzi akenî. La duzger piraygirewtiş û tirkîdê yînî ra ki ewnîno tira vono kû beno kû zî şiyê ko, beno kû zî “terorîston” dima kewto. Piyê lacekî, vono kû ma gededê xo ra çiy zonî, eki çiyê asarîn di bibîynî, wa ka rocêkî yew kerededê ino mojî di bigîro û bido, wardo û roşo.

Yû roconê peyenon di bi peredê zafî gêraynî, cilê hewlî piraygirewtinî û şewi ki dicay ra vîyertinî keye omevî. Bê huzir bi la bi pere bi, bi kar û gure bi la bi aswas û weswese bi, bi hêş û aqil bi la bi şik û gûmon bi, şewon hewnon rû gûnaynî û bêxebêrkî vacîyaynî. Ma dir sofre di werdiş ra xo pawitinî, keye di werdiş ra xo durî girewtinî. Ma qenat onî ki gedeyê ma çeton dir o, dek û dolavon mîyon kewto. May û pîy hi qereqol ra û hi zî dadgehi ra bêhêvî agêrenî keye. Estereyê çimonê gedon qerefeye û miruzê çewî zî ca di nîyo. Hesr û çilonta hemîni têmîyon di cor di

war bîya sînedê yînî ser. Çewî ne waştinî biwerî û ne zî cadê xo ra wardî. Neçarêya ki yî radest girewtibî Şayda zî terson ser pernaynî. Çimkû ya zî raro raşt di nêbî û hagîdarêya mar û pîrî zî tira çinî ya. Çer-ray şik û gûmon nêkerdîni ki ya zî yew çîyo xirab di bena. Gurewo xirabo kû Şayda zî kaşkerda xo mîyon, eki may û pîy pey bizonî xo gonî herri fiynenî. Çimkû kerdeyê yayi imir û cuwîyena yînî di ne çewî kerdo û ne zî çewî çewî ra eşnawito. Eşnawitox deyxî ina nêweşêyi nêkeno kû may û pîyê yayi deyx bikerî. Xo ru (çem) di kerdiş zî dest nêkeweno. Senî ki yew may û pîy ina bêarêyi hewanî? Derî hi giron ki bîro salix dayişê yayi mezgê merdimî fecir, goşonê merdimî kerr û zonê merdimi zî lal bikero, tewş bibo û taûtaqet ra bifîyno. Şayda zî tersê xo girewto, nêwatona ki muyi xo di têda. Zerrîya keyeyî yewîna tewir xilxile kena û yê Şayda zî yewîna tewir xilxilîna.

Aswasî kû zerrîya yayi yeşîrî girewtibî, ma senî kewtibî ina daraxi bi? Aqobetê Memo'yî zaf zî yew hewlwelaq û teşqeleyî ma mîyon nêvistibi la yê kekê Zerrîweşî hêş û aqil ma ra vet, buya mar û pîrdê ma teng kerdi, zerrîya yînî çuqûrnayi, sîya û soti kerdi, nêmcetî verdayi. Tirî ma ino halî ra feletîynî? Feleteyîş û xelesa ma kû bibo? Hele ez keye di çi moj ridê mar û pîrdê xo ra ewnîno? Ez kû çi tewir wirdiyona ma xo virarî bikera û tira hes bikera? Keko Memo ki mi vîrî kewt ez kû çi tewir hesab biderda? Ez kû ino kerdonê xo kura di rono? Ne gedeyêda ma di û ne zî êro roc çew îni kerdonê mi nû kekê Zerrîweşî meşrû nêveynabi, nêveyneno û nêveynenî zî. Kom şiyeno bi îni kerdon keye di bimonon, bideberîyo? Aqobetê ayo comîrdî ya zî cenîyi xo kîştîş bi, yan zî benasat beyîş bi. Hinî ez bi îni kerdonê xo nişîyeno ewtîya di vindero. Hesabo kû ez ha ver di yo, seba kû keyedê ma rê yew taloke nêro. Gay ez ino rarê xirabî biromo û heyonî konca ki şî! Rengê hesronê hemini yew zî bibo, halê hesronê yînî cî ra cîya wo. Eki merdim bi şeklê hayayî ridê Şayda ra biewnîyo, halê Şayda weş teşhîş beno. Reng û mirûzê yayi salix dayîş rê ne qalî û ne zî vate qêm nêkeno. Ringuzê ayî bîynon di xem, aswes, weswese asaynî, ê yayi di ters, şik û gûmon asaynî. Ayo semed ra hesronê yayi çiyîna semed xo sîne rû war kerdinî ciconê tezon û nazikon mîyon. Ino bermi di hergû yew xeyal yeno bider ki vîr û gûmonê çewî pey nêbeno. Nişka ra zon sere keweno, vacîna ki gelo tirî nêtê mar û pîrê ma, ma semed çîna bi û ma sekerd? Birayê mi çeton mîyon kewt û benasat bi, ez zî ha bêbexteyî û bê bêmomisêyi mîyon di yo û êro ra mêşti gay ez zî sey yêyi benasat bibo, vinî bibo. Hilla ki xeyalon mîyon kewena dewi, dewijî, kal û pîrî, xeta

raşt û duristi, keko Memo û imbazê yêyî yenî çimonê yayi ver. Rarê zîndonî, xeyalê ayo cayê arizîyî ver di tîk benî. Halo kû dewi di tede bî, komî kû yî bidîynî xo viriki kerdinî û miçi bi miçi sero padaynî. La halo kû êro omeyî û taresayî yê miçon û heskerdişî nîyo. Ê teq û bahcon o, ê bêxîretêyi û bênomisêyi yo, ê şermî û mil xo ver rû vîstîşî yo. Halê risipîyêyi û çare tuckerdî nîyo. Durî, nîzdî komo kû pey bizono verîcûyî pey ar keno, dejeno, nahleti pirûvarneno. Ayo semed ra xeyalê yayi, ringuz û mirûzê yayi, hesrê yayi sey çewî-nayî nîyî. Ya zî hinî ha peyena-peynî di ya, ha çatalrar di ya, ha pîrdê sîratî sero ya, ha verapey beyîşî ver di ya. Hi biyo bider ki seki boldozeri ser ra şîyera û leşa yayi têbitahno, mezgê yayi têbihereyna û kafîk ra teber bikera, çand seaton mîyon di zerrîya yayi bikera yê serron û derdon.

Hinî ina seati ra pey bermîyê yayi, intereyîşê yayi seba aqobetê yayi semed o. Qey ino çi halo ez ha tede wo? Êro ra pey çîna ki bîro mi sereyî ser di? Çi tewir ra cayon di ki cayê mi bibo? Ayo mehel Siltona keyeyî dekewena zerre. Zerrîya xo pêti tepîşena, newerna xo verodona, seba kû wirdîyonê xo têhet tepîşîyo, hesrî ki sey laserî herrekîyaynî esterena û dest û rîyê xo şowena, agêrena kulfetê xo ser di, vona ki ma Homayê xo ra sebir biwazî, aqobetê xeyrînî biwazî. Seba îni mendonê xo ma şikir bikerî. "Hê Homay erdê tu pûnk, rîyê ma sîya" ma xo rê inayi rê zî şikir bikerî. Îni riçikî ki ma mîyon di yî ma bi înin Homayê xo rê hewtay bar şikir kenî, bi ino moj zerrî dona kulfetî. Hemin ki pay fiynena, dest û rîyê xo şowenî, têdir sofrî sero ca gînî, bê himt û bê zerrî şomî kewçikî kenî. Çew nêzona ki çi werd û senî werd, kuradê yîni rû şî! Hergû kes wer ra çerexîya, xo yew qoncika na û maya keyeyî sofre hêdî hêdî hewana. Kena ki ha-yaya gedon bionco waneyî (dersî) ser la sîflêya vengi bî. Çewî rê wane zî wendeca zî û çikî zî bar û kar

nêbi. Çewî xebati xo vîr ra nêvîyarnayî, ge ge xeyalî ki omeynî bider tira vatinî ki Zerrîweşî ma hemin ra weşêr wendinî. Biewnî se bîyo bider û êro bira ma pey nêzonî ki çi aqobet yêyî sereyî ser di omeyo. Kom çi zono kû komî keyê ma xo rê bar û kar kerd ki ino aqobet erd birardê ma sereyî ser di? Çarenusî ki hima êro ra pey ma sereyî ser di yenî bira ma çew zî tira hagîdar nîyî. Kom ma ra yewînayî xo çimon ra vîyarno û ma zî sey birardê Zerrîweşî bionco xap û dekon mîyon? Eki ma pey bizonî ki ha yenî ma çew nêzonî ki merdim senî ver di vindeno û derî astona pirûnono, laqi virazeno û yînî bertaraf keno. Gedeyî xewfon mîyon kewenî û vonî ki ma kû yew bi yew ino areye di bitahnîyî û heba maya xişn ki zî heba merjîyi biba. May û pîyê ma xomê dek û dolavonê metropolon bî. Kayî ki wîtayon di kaydîyenî bira vîr û gûmonê belingazonê ma pey çinî yo, hima zî gorebê cuwîyeni û dekonê metropolon hayig nîyî.

Dewi kura ya, dormereyê dewi kura wo, nufisê yayi kura wo, xûlq û bawerêya yayi kura ya û yê Estanbolî kura yî? Kar û gureyê dewi kura wo, daye û girewteyê dewi kura wo, cîron û imbazêya dewi kura ya û yê Estanbolî kura yî? Hergû yew kuçe wayerê yew arizîyê yo kû kitabon bile nênuşt. Înî kuçon di merdim bira nêwetono kû peya xo tado dostê xo, “pîşê merdim binê merdimî di qesnenî”. Hergû leqerdî kî rê têtûvecîno kû rîyê merdimî tira veşeno. Asar xeyalonê tewirînon mîyon di heme têdir “ax welat”, “ax welat!” “Wa ma terkê tu nêkerdinî, wa ka şomîya ma eşkence û sîpareyê ma zî repikî û wa ka taştîya ma zî awi veranayîş bibîynî. Ino çi gosirmeto ma tede yî? Û bê hes û bê bes wardenî cila xo fiyenenî û xo cilo pîşenî. Hilla ki dekewenî cili hemin vîrî keweno; setara ki ma serd ra pawena, setara ki bi bîh ma xo zerre di yew emir hewînena, setara ki reng bi reng xeyalonê ma rê wareca bîya, tirî işmo zî sey verîcûyî ma xo

zerre di hewîna? Ma kû ino delalîyê xo ina setara miqomî û qaîmî di veynî ki sera şîyo û ha se keno? Leheyf ontewo seredê hemini ser di û seki bira çew cîf nêgîro. Seki bira qelbê çewî nêertzîyo, seki hemini têdir xo radestê mergî kerdo! Çew çewî ra hagîdar nîyo û ha bendedê şefaqî di yî ki cay yew surpriz berê yînî biku. Eki endamê keyeyî zafî xo di şîyîbî zî, Şayda qet çimê xo nêdegiretibî, xeyalê âqobetdê xo çarnaynî. Şayda rê şewî zî rocî zî yew hesebîno. Erd û asmîn derî pîranîyabi, seki sînedê yayî sero tonon reydir bar bibo, binê ayo barî di çiceyê gilor û tezeyî bifetesîyî, seki yew yînî dekerro dengî û denga yînî veco, bikero hefle bierzö kîştî. Belingaza mi nişîyaynî ki wişa cîfî bigîro. Hîndo kû cîf qirriko pulîsîyabi, vona qey ez ha teterxon beno. Meşka xo masaya, qesbaya xo kujilnaya, mezgê xo kuya xerepnaya, zerrîya xo zî şikta veynena. Hewawo kû çimonê xo masnaye veynena, vona qey qalikê xo ra perrayî teber. Gêj bena, tewş bena, vona ki ino çi halo ez ha tede yo? Derdo kû ne çewî dir bari beno û ne zî mi di hêş û aqil verdawo mi rê mendo. Qey mi ona kerd xo û kulfetê keyedê ma? Çina ra mi xo devist asar yew domî? Keyeyê ma verba weşî û şayîyî şîynî, hi mi û hi zî birarê mi têdir ma ino keye şelpeze kerd, xaxî kerd, neçar vist. Ina seati ra pey çikî zî destê mi ra nîyno û ez nişîyeno çikî zî bikera. Seki verînonê ma nêva "binê çûwa gi, serê çûwa gi", çîyo kû pûnk bikero û mi tira bixelesno hinî nêmendo. Eza kor a kerri, nezoni ki ina seati ra pey se bikera? Sera şîyera? Kom welat ki mi konca di biheweyno? Hilla ki inî xeyalon di monena, veynena ki cilicilamura yayî hesron vero guda awi bîya. Bêxebîrî vengo kû pirû keweno "dayêêê" la ez se beno? Senî ki mayî ino vengî eşnawena hetê wededê yayî ya wîrdi wîrdi meşîyena. Goşeyê leheyfê yayî ki hewanona, veynena ki çimê "bewronda" yayî sey qoçikon bîyî û leşa yayî hîyûhîyimur bîya, sey tura awi recefina. Xo

erzena ser û xo turûpîşena, hindo kû xo têrûpîşta, yemnû şidînawo, kî vonî qey pîyazeleqiyayî, yew wişa cîfî zî nêgînî, qehron vero seki biteqî.

Maya delali bira nêzona ki Şayda bi aqobetê xo yê şermî ino hal kewta! Ya zî vona qey seba birardê xo, xo ona şelpeze kewta. Yew mehel ra pey rinda xo vero ona û erşawena destşoyî ver ki dest û riyê xo bişowa. Binêki xo ki yena mallayê şefaqî veyndono têdir destnimacê xo gînî, dima zî nimacê xo kenî. Şayda hewa peyeni keye di nimac kena la beno kû zî nimaco verin û peyen zî bibo. Hewa peyena ki way û biraronê xo hewn ra haya kena, nevinon hewanona, keye di kulfetkî sîpare wena, kitabonê xo têkena, yew bi yewî rû pişîna. Hinî hewa peyana ki berê keyeyî degîna, kuçe di xo ra pey ewnîna û dest têşonena. Ayo waxt zerrîya yayî terîna, xo wena, kelgirî bena la zona ki heme çiy omewo xeta qedînayîşî. Esas Şayda raro xirabo kû romitînî nêwaştînî ki yayî ona lezilezi bîyero yew çetalrari la serebutê kekê Zerrîweşî zorê xo da ser û rew rarvist. Fîkrîna ki sew pîyê mi firizonê birardê mi sax bikero û rardiberêya lîse ason nêedelno, beno kû zî kerdonê mi zî serrabibo û zêdêr zirarê mi keyeyî bireso. Hilla ki taqîbê yêyî viraşt beno kû zî halê mi ra hagîdar bibo û ayo mehel mi rê kîştîş hewcî keno. Eki çew mi nêkişo zî, ez xo aweydono, yew çiy ono xo sereyî ser di. Bi îni aswason û wesweseyon xo ona yew çatalrar di edelnena û hind veynena ki wendecayî ver di teber kerda. Imbazî ki yayî veynenî awi fek di zûwayî bena û mat monenî la çew nêmekenîno çiyêkî zî bider perso. Zengê waneyî seba deketişî waneyî cenîno, ayo beyntare di ya û mamoste têdir dekewenî zerre. Wane di zî ne hes û ne zî besê Şayda yo, kerdî fekê yayî nêakena. Wendekarî çi qas ki xeyalê xo sernonî veynenî ki ya ha bi aswas û weswese têyagêrena. Vernî di pirtûk, panus û pênusî hederîyayî la alaqeyê yayî û waneyî piya nêmendo, ya yîni rê

degirewta ya. Poli hewa verîna ki imbaza xo na erjeya û şeki ona veynena. Lomîcî nêvona, çewî dir ne bari kena û ne zî sewt pirû keweno. Hima halê birardê yayi ra zî çew hagîdar nîyo, kom imbazê birardê yêyî pers bikero zî tira vona ki bawkalê ma merdo û şîyo welat. Eki zaf zî ser di bîrî xo verapersê hinî “yû welat di moneno û wêra di waneno” ver di viraşto.

Bi ino nizdî beyîşî wazena teslîya persayoxon xo ra fîyno. La rarê yayi zî yê birarî ra kemêr nîyo, hinî havila yayi zî çewî rê çinî ya. Nêto kû pey erdo, eki wane ki qedîya fek bi lîse ra zî verrabida yo. Hinî hewa peyena ki imbazonê xo reydir poli di ronîšta û waneyon rû mijul a. Zeng ki cenîno bêkeyf, bêzerrî, bêhîm tefûtalê xo têkena, virarî imbazonê xo ra şona. Hemin ra xatir wazena û şona dek û dilavonê bêser û bêbinînon ser di. Cawo kû yayi rar ra veceno, cawo kû yayi jehr çarneno, cawo kû yayi bonderê pîsêyi keno. Cawo kû yayi û keye têra qerefneno, cawo kû yayi mar û pîrî ra tiraweno, cawo kû tede heşma merdimî bînpay keno, cawo kû merdim tede xo sey yew kelmelî roşeno wêrayî ser di şona. Cawo kû şar kî tênonê xo yê wahşon di gurînenno, cawo kû merdimî qewmî rê bêerj û bêqîymet keno hetê wêraya rarî hêdî hêdî bi zerrîya şikta gomî kena. Hinzaron hewi bi taktûnaket zî bibo, xoverodona kû ino rarî ra fek verado, durî bikewo la vîdeoyî ki televîzyonon di bari benî yenî vîr û xo tira apey gîna. Eki derheqê mi di zî asar yew çiy têkerdo sew ma û pîyê mi, way û birayê mi heyonî ki dinya esta, yî pey merenî û gonî benî. Ino moj ez teyna mereno la sewbîna keye kulfetkî mereno. Çik xeyalê pîy û birardê mi estî heme gemar gêrenî û veng vecînî. Ez beno neyar, ez beno seabê sewbîna mergon. Rind aya ya ki ez zî sey kekê Zer-rîweşî werton ra vinî bibo. Keye ki zî yew deme qehr û qotik bionco, ax û of bikero û bahdî ki xoverobido. Ina seati ra pey ez hinî çewî rê çinî yo, hinî ferqê mi

nû yew kutikî nêmando. Eki ez keyeyî ser di agêro zî hinî zerrîya mi di cayê xîretî, cayê nomisî, cayê hewlê-yî û miradon nêmando. Êro roc ra pey se bibo zî keye mi ra zirar veyneno. Mi bi îni kerdon heşm û şerefê keyeyî kelpay kerdo, hinî ez keyeyî rê û keye zî mi rê nêbeno. Rarê aqobet nedîyarî tepîşena û cawo kû bi nome cayê karî yo berê yêyî bi vengê nimzî kuwena. Çand kutişon ra pey bero kû yayî qûltneno, bero kû yayî heşm ra keno, bero kû cuwîyena yayî derî jehr û ziqom keno, bero kû gon û rih tira veceno derî abeno. Ino mehel çîyo kû wîta dîybi û senî merdimî erj û erjeyon ra keno sey şerîda filmî çimonê yayî ver ra vî-yert. Zerrîya yayî gûlpna, gunî gala seredê yayî kerd, adir dekewt zerredê yayî, aswas û wesweseyon helqa bider nayî. Tewşîkî vacîyayî, gelo ino aqobet ki mi heyonî konca xo dima kaş bikero? Çi kerde û hewlwe-laqon kû mi sereyî ser di bîyero? Deka gunîfirrona ki ez onto xo mîyon, çina û çî tewir aqobeton mi tahm kerdiş dono? Tirî mi kom welaton di û çî tewir nêbeyon di gurînenî? Ez kû konca di, senî û çand qurîşon reydir ki xo biroşo? Ona tewir bi tewir ra xeyalî goma kû ber ra gomi erzena zerre mezgê yayî qefelnenî. Eki birrê yayî zî ino nîyo sew la ina hillî ra pey rar û rayeron ra ino xo ver di verdayo. Xo di vacîna tede rotiş zî merg zî bibo rarê mi ino yo. Çand salîson mîyon di heme aswas û wesweseyî cayê xo zeled kenî û bi run-gizê tirş û tahlî imbazon silom kena. Ina gomi ra pey Şayda zî bena endama aqobetê nedîyarî.

Yere derîyawo û hilla Şayda karî ra omeyîşî yo. Pîy keye nêresawo la gedeyê wirdîyî ha keye di yî. Mara delalî şomî têkerda û ha bendedê Şayda û himserê xo di vinderta ya. Vistikîna zengê berî yê teberî cenîno û wirdîkê keyeyî vazdono berî ver akeno kû pîy o la hatûberatê Şayda hima çinî yo. Pîy ki dekeweno zerre himsera xo nû gedonê xo ki merhaba keno, şono destşoyî ver destonê xo şoweno, dima

persê şomî keno. Maya nazîni vona ki heyonî Şayda nîro ez sofreyî raşt nêkeno, yew gomi bisebirî. Verî-cûyî Cindo pewjneno la bahdî vono kû rocî derg î û ma zaf zî xerclix nêdonî gedon, beno kû wîrdiyê ma veyşonibî. Hewl aya ki ti şomîya ma rona, hîllîna aver nî ki apey ma xo bizoqomnî û wa gedeyî dersonê xo rû surî bî. Ya zî îtiraz nêkena, hima cadi sofre raşt beno û şomî zî ronîyena. Hêdî hêdî ki şomî werîna wazenî ki sofreyî hewanî la pîy nêverdono, vono kû wa Şayda zî biro, biwera, ma dima xo tira bixelesnî. Des, vîst, nêmseatî, seatî ki Şayda nîyna. Pîy dest beno telefona xo ki cayê xebata yayi bigêro, mayi vero rijnena û vona ki mekeri! Beno kû dersî êro gironî bî û nêşîya karca bahdî fekî kewena, hê bisebirî Homa gird o. Tu dîy ki seba ders xebeteyîşî şîyera keyê imbazonê xo zî. Ti zî zonî ki birardê xo ra pey hêşê yayi zî zaf tēmîyon kewte yo. Kar ki kena, yan zî wane ki xebetîna, ez veyneno kû xo di nîya, timî ha xecelnayaya û zaf zî interîna. Cay ez ki tira çîy perseno zerrîya yayi teng bena, çîmê yayi debenî, sere di muyê yayi sey telîyî hewa kewenî. Tewir bi tewir ra reng û ringuzê yayi şono û yeno. Ayo semed ra wa binêkî imbazona mona qe binêkî Zerrîweşî xo vîrî nêkena. Ti veynenî ma rê senî giron ome, ya zî wa ya, bi dejê di hebî kekonê xo ne şewi ra, ne rocî ra, ne wendiş û ne zî xebeteyîşî ra tahm nêgîna, ez veyneno. Hêş û aqilê yayi tēmîyon bikewo zî derî normal o. Memo yî ra pey heme wîrdiyê keyeyî Zerrîweşî ya beste yî. Kek vatinî û çîyîna nêvatinî, yewida yêyî di nêkerdinî. Vateyê mi nû tu erd di verdaynî la çerray ê yêyî erd di nêverdaynî. Ayo semed ra himilê xo zêdêr bikeri, zerrîya xo heray tepişi. Wa delalîya ma zî keye ra serdîn nêba, derson ra durî nêkewa û mirado kû ma xo pîzeyâ çarnaynî wa bin tepişo. Balî ma heyonî inkay nişîyayî cillonê xo awi ra vecî, wa ma rê ino kê m nîzdî beyîş aqil bo, êro ra pey ma îni mendon çirax vecî.

Şewi dicay ra vîrena la qali Şayda ra nêvecîna. Qijê keyeyî rakewtî la may û pîy ha axon û ûfon ver di yî. Ereğ ereğê bîynî dima nawo, cellî ver wirdî zî sey tura awi recefînî. Intereyîşî vero nikayî wirdî zî teterxon benî û Homay nêkero beqa nêkenî. Çerray ona neçar nêmendibî, hi bîyo bider ki hinî ne vîr û ne zî aqilê yewî nêxebetino. Sewt pirûnêkeweno la sey gêjon wede bi wede gêrenî. Sanîye derî sey seatî, seat zî sey rocî derg bîyo, zor çî belayî şefağ xo di onî. Cindo nimac zî nêkeno, tefeqonê yêyî zî çikî nêwedereno, hima nerdunon rû acêr gûneno û rarê karcayê keyneki xo fekîya keno. Xonima yêyî dima veyndona, cay nêbo ti çewî ra vacî ki işmo nêyomeya keye. Çi zono nêtxirabî zaf î, wa çew keynaka ma rê leqerdîyon tênevêco. Vengê ûfî û pufîya yêyî ver sewt bider nêşono, hima tewşikî xo karca resneno. Imbazê Şayda yê mîyonê rocî veynenî, hêrson ver zonê yêyî lal bîyo la ringuz di nawneno kû yew mişgulewo xirab esto. Tira persenî; dato qey xêro êro çand rocîya ki Şayda nîyna kar? Ma zî xo het va ki qey dersê yayî giron biyî û vacvêrê yayî pîser bîyî cuka ki nîyna. Patronî va ki heqûmicid yew di rocî ra pey ki bîro, nî ki ma şima hagîdarî kerdinî. Ayo kû ti omeyî, hinî tira vaci, eki vacvêrê xo xelesnayî, sermalî wa nêvîndero, bîra.

Lacek ne yewi vono û ne zî di, tira xatir wazeno verê xo tadono keye, di ningê yêyî keno çeher. Yew firti di keyeyî ver di teber keno, bi teqaza nerdunon ser keweno. Senî ki imbazê yêyî derî ber akena, ca di sey tirmê merdî erd ra derg beno, sey yew gedeyî zirrizirri yêyî bena. Bi vengê nêmxenaqî ya zî şîyi, ya zî şîyi, delalî û porrkeja ma zî Zerrîweşî dima şîyi. Şayda nêyasana, kar zî nêşona, çand rocîya ki kar caverdawo, bira xebera ma pey çinî ya. Çiyo kû karca pey bizono çinî yo. Cenîk ti vona Şayda se bîya, sera şîya? Ez kû senî îni hesabon bido? Ino çî g... wo mi werdo? Qey mi vateyê meyitonê ma nêşnawit?

Qey ez axê kal û pîron dima nêkewto? Qey mi dewij û cîronî nêşnawitî? Homay ez girewto, qey mi goş duza xo ser nêna? Çina ra mi welat terekna û tira terqezîyawo? Mîyonê çand serron di ma di hebî delalîyê xo karê xirabî sernayî. Ma bira nêzonî ki çi gure di wardenî û ronîşenî? Ina çi xêvêya ez dekewto? Senî ma hal û waxtê yînî ra yew vate nêvet û di delalîyê xo qirbon dayî? Înî roconê peyenon di wirdî gedeyê ma yê girdî him hetê psîkolojîya û him zî hetê dabara tewirîna biyîbî. Vindertîş û eşnawitîşê yînî bedelîyabi, piraygirewtîşê yînî zî reng û reng bi. Ma ra xerclix nêwaştinî û pere zî tuniki di seredê yînî ra zafêr bi û ge ge keye di zî nêwerdinî. Ma zî vatinî ha xebetinî û beno kû zî karca cay vîşî pere bider dono, ino hal zî ma xo het di normal diynî. Qet ma şikon sernêkewtî. Cay ma çew cor di nêgirewt û ma nêva'eyniyê îni bedeleyon çina wo, konca ra yeno? Ma qet pers û sewalê îni cilonê weşon û tebera werdişî nêkerd? Ino gormez teber kerdişî gedeyî ma ra qerefnayî, durî vistî û çem û çem berdî. Înî çand aşmîya ki Zerrîweş vinî bi, ma nişîyayî tira çiyêkî zî bonderbî, ê diyni zî ser niyayî. Ino çi halo ma dekewtî, ma kû se bikerî û kom welatî ser di şîyerî? Sercelonon vero kû dinya ma rû teng biba. Eki hergû kesî sey ma yewdi ewladê xo qirbon bidaynî, wa ka Estanbol veng û varit bo. Wa ka çew nomeyê Estanbolî xo vîrî nîyero. Eki zor di zî bi, wa ka rarê xo wîtaya nêfiyno. Ino çi gosirmet o ma dekewtî? Înî darbî ki senî hewabineyî? Bi îni darbon merdim bibo sew fecir beno, teterxon beno, qesabada yêyî di rîşa merdimwerî tewerîna û bi yayî zî qedîyeno. Ino moj bira erd ki zî ma xo di nêheweyno, nêseterno. Ewladê ma yê bêgune, bê ecir ma kerdî gunekarî. Gedeyê pûnk û erjeyeyî ma kerdî yê nêerjeyon, ma qewmê xo rê kerdî neyarî. Ino erd senî ki ma xo di biseterno? Cayê ma kû cehnim di zî çinî bo. Gazinci bi gazinci sero, lomêyi bi lomêyi sero xo ra

keno û vengê waywelikon keyeyî pulisîno. Hinî fêm û fahm qedîyawo, hinî ningî bin di çinî yî, hinî dest û polî têzerre yî, hinî goşî kerr û çimî zî kor î. Hinî şenêkenî ki senî têyabigêrî, hinî nêzonî ki komî ra û çina bipersî. Bi halê tewşî rocî bi rocî sero vîyarnenî. Hima derheqê Zerrîweşî di qereqol ra yew hagîdarêyi nêgîrewtibî, seba Şayda zî xo têkerd û rarê qereqolî gomî kerd. Seba keyneka teza û naşîya xo zî ser pirûda. Hal û wezîtê yayi zî tedir bari kerd. Bê hêvî bî, neçarî bî la sewbîna rar zî nêzonaynî vijînî. Serpirûdaye ki qediyeno, amîrê qereqolî tira vono kû de ti şo keye, eki yew çîyo xom û newe ma xo dest vist, ma kû tu dir bari bikerî. Çareyê şîma bendedê ma di mendiş o, tira vacîno. Eki ina qali goşê yêyî ra war şona yew hesra girdi onceno û xo pîze di vacorîno la şîma heyonî êro komvînîbeyî rê yew çare dîyo kû şîma êro yê mi rê veynî! Şîma bidîynî sew şîma ka yê Zerrîweşê mi rê veynî? Ne ez, ne zî ino welat xomê ino nîzdî beyîşon nîyo. Werrekîna mi xişn bikerdîni, pabinaynî û nege bikerdîni. La ki merdim hewtîs hinzar failê benasaton ra ki ewnîno mecbur o kû ona bifîkrîyo.

Qereqol ra ki vecîno mil xo ver rû fiyneno û rarê qal û qûlikon, rarê şermîzarêyi, rarê tîrş û tahlî, ê bê himt gomî keno. Hilla ki çimê yêyî Siltoni gûneno hesron têver rû war keno, allîyi qîrriki pulisîna, fek zûk û zûwa beno, rengê yêyî beno sey şahma, runguz tede nêmoneno. Derdê dînya derî pirûnîyeno, hinî ne rocî ra, ne zî şewî ra, ne wer ra û ne zî şîmitîş ra, ne karî ra û ne zî xebati ra, ne cîronon ra û ne zî taxi ra yew tahm nêgînî. Rocî derî sey aşmon, aşmî zî derî sey serron dergî benî. Bi ino psîkolojîyî veynenî ki serri û nême Zerrîweşî û serra Şayda debîya. Çiqas ki rarê Ewlehîyî dewesna zî yew havîli nêdîyi. Hinda misqalê zerretîn yew xeber wirdî ciwononê yînî ra nêvecîyayi. Çarewo kû derî mendo, heme dejonê xo qesbada xo di seternayîş o. La çiqas ki gedeyî vîrî kewenî, vindertişê

dewijon, cironon, merdimon û meyitonê yînî çimonê yêyî ver di köye bi köye, berd bi berdi, gark bi garki rêz benî. Poşmonêya ki zerrîya yînî esîr girwtibî, bi qalon salixî nêdiyena. Mil şiktişêya halê xoverkewtişî ne şiyenî gedonê xo rê, ne zî şiyenî yewîna merdimî rê akerî. Hi verba ewladon, kal û pîron, hi verba dewijon û him zî yê himwelatîyon xo gunekar veynenî. Suco kû efûyê yêyî çinî ko, suco kû biro pewjnayiş zî zerrîya çewî hewnik nêkeno. Suco kû rocî efûyê yêyî zî bibo, yû ki heyne nişîyo ridê çewî ra biewnîyo û rîyê xo sape bikero, bifisikno, yew hetî ser di ragêro. Nizdî şiyero yew derd o, durî şiyero hinzar derd o. Bawkalon hêşyar kerdibi ki welat ra durî kewtiş hewlwe-laqonê neçaron rê ri bi ri mendiş o. Nêbo, nêbo ti welatê xo yew çand tengoneyon vera bibedelnî. “Hergû tengoneyî dima yew herayî, hergû qeymeyî dima yew serecêr zî esto”, wa îni qalê ma verînon zî tu goşî di goşere bî. Heyna kalikonê ma vatinî ki “hergû zimistonî dima wesar yeno”, tu xo gêj kerdo lacêm. Welat şîrîn o, qafes zî bibo zerrîn o, setara bê derd û kulon o. Wîta ra biewnî, nurri û durri ra biewnî, koyon û dêşti ra biewnî, hergû kerre, hergû deye, hergû dol û newalî, hergû şeqal û qûllî, hergû dûşî û şiqî ma hemin rê setarî bî. Waxt, bê waxt pelê yînî ma ser ra bî, sîya yînî ma rê wayer bî. Senî mi îni şîretî goşpey kerdî, mi yew vatewo erjeye bider bar nêkerd! Eki mi ayî şîretî bi degirewtinî sew wa ka êro roc qesbaya mi ona ki jon nêkera.

13

Estanbol omeyîşî Cindo hi pöşmon kerdo kû bi qalon nêvacîna, bi pênuşon nênuşîna, pirtûk derî qê m nêkenî! Seba kû peyser agêro welat rih di heme çiy hal bîyo la ki wendişê Rocbîyni ki vîrî kewena, wîrdî himserî zî sist benî, taketnaket di monenî. Wazenî ki wendişê lîseya keynekda yîni serê xo bigîro û dima yew dabari xo sere bikerî. Eşkera nêvacî zî lîse ra pey Rocbîyni kom zonayeca (zanîngeh) şona, şiyena qezenc bikera, wazenî ki ayo şaristonî gore peyser agêrayişê xo bêlû bikerî. Hi bîyo bider ki xeta şaşi vila kerdiş û qedînayişê keyeyî vîrî fiynena. Misqala zerretîn yew şaşeyî nêwazenî ki bikerî. Hinî bi qontrolê may û pîyî gedeyî şonî wendeca û yenî. Pîy beno wendecayon ra vila keno û dima şono kar, mayî zî yerê şona gedon pîser kena, ona keye. Ihind dej ra pey newe hêşê tererekî veynayişî omewo vîrî. Qûrs şeyiş û omeyiş zî bi ino moj newbeti reydir ca yeno. Rocbîyna delali zî him hetê terbi û malîfetiya û him zî hetê wendişê xo na yew kemone nêverdona. Adirê zerredê yayi vindertiş û ewnîyayişê kekê Memoyî ser şono la çewî dir çiy bari nêkena. Heyonî ina hilli zî nêtê yayi wendiş o û wendiş ki sere berd, cay yew karşewo hewl xo dest vist, dabara keyeyî rê hetkar biba. Hedefê yayi di tortor beyiş esto, vona ki ez tortor biba, neçarêya keyeyî ez werte ra hewanona. Sey îmonê xo zonaynî ki dabara keyeyî weş bibîynî, yew semto hewl di bironîştinî, keyeyê yîni gorebê zerrîda yîni bibîynî, wa ka Zerrîweş û Şayda êro yîni mîyon di û wendişê xo rû mijul bibîynî. Ayo semed ra seba xo, seba wîrdiyonê yîni, seba kû may û pîy yew asonêyi veynî nêtê xo wendiş di birrnawo. Xora mar û pîrdê xo rê zî sozdar a, vato kû ez waneno û beno tortorê heme derdonê şima. Vengonewo kû pîlonê mi viraşt û

bi sebebê îni dejon ez tede nêwardeno û nêronîşeno. Zerrîya xo hewnik û pêti tepîşî, heyonî ki mi ra ome ez xûlqê keyeyî ra durî nêkeweno.

Şireto kû şima kal û pîron ra girewto û ma ya resnawo, ez zî gorebê fahm kerdişê xo romeno. Wa yew şik û gûmon şima dir nêvirazîyo. Ez pey zono serrê şima aver şiyî û yewîna qehro giron şima hinî hewanîno û ez zî şima rê pirûnîno. Eki ferasetê mi ino bo ez şima milşikte nêedelneno. Qey mi hêvîya kal û pîron xo vîrî kerda, esteyê meyitonê ma heyonî êro çizayî, bi destê xo zî ez nêçizneno. Çiznayîşo kû heyonî êro ma kurdon mîyon di virazîyawo, qey ez bara xo defineno? Komî “şitê heri werdo kû ez biwero”. Ihind derd û kulî ki şima dîyî qey bes nîyî! Wa zerrîya şima û yîni têdir weş bo, ason bo. Qey mi vîrî nîyno, şima ki cematon di ronîştinî qala rocê bîynî bîynî. Roco kû tede zext, roco kû tede zordarêyi, roco kû tede belingazêyi, roco kû tede xizonêyi, roco kû tede tahda, roco kû tede kûtiş, roco kû tede raçarnayîş, roco kû tede kîştiş û benasat kerdiş çinî yo, mala ayo roc nesîbê yê dinya bo, ma zî mîyon di bî. Hinî bes o, bes o, besss! Ma kurdon çî zar û zêç, kal û pîr, şêr û egîtî dekerdî binê herri! Çina ra dewa ma ra vacîno dewa “Zafxiraba”? Hewawo kû dewi di vacîyaynî, dewi verê 1993’yî hetê serdestonê kurdon ra hîrî hewî veng bîya û dewijon xo rê bi hinzar mişguleyon newerna pirûnaya. Veng kerdiş bi xo yew tiravmaya pîl a, çiyoy kû veng beno xo dir toyî derd û kulon zî ono. Ma vacî; hilla ki fekê merdimî ra didonî vengî benî merdim pey çî dej û kulon kaşkeno, senî ki nişiyeno bi fahm xo îfade bikero, bi ayo moj welat ki zî veng bi çiyoy kû aîdê yêyî yo tede tahmêki nêmoneno. Hilla ki dewa verînonê ma veng bîya, Homa zono kû tede hinzaron reydir merdim kişiyawo, keye veşiyawo, terş û dewar qirr bîyo, xoza bedeliyaya, raçarnayîş û terke welatî ronîyawa. Kom çî zono kû kom demserr di veng kerdiş virazîyawo û

şertonê ayo demserrî çi moj yî tahda mîyon visti? Tira çand keyeyî kor bîyî, kakozurê çand wecaxon ronî-yabi? Cay çew pey zono kû hewar û gazîyi komî kerdê? Hilla ki yîni hewar û gazî kerdinî îni ko û kerreyî çi tewir helîyaybî? Dar û ber seni wişk bîybî? Mar û mişk kom heta remabi? Teyr û tebur, verg û vergumur kom hetîya perrabi? Leşê delalîyonê yîni çi tewir erd di mendî û kerm û kêzî seni tede xilxile kerdibi? Îni dejono kû tertele dewijon mîyon vistibi çand serrî romitbi? Asar dejî kal û pîron ewladonê xo na, ewladonê yîni zî şima ya û şima zî ma ya resnawo. Hergû firrê verîni yê peyenona resnayış xo rê hindo kû avzel dîybi, arizî dîybi şewon û rocon reydir vatinî û qet zî betil nêzonaynî ki çina wo! Rocbîyni ki înin derî laya kena, zerrîya may û pîyî gulpnena, hêş û aqilê yîni têmîyon keweno. Xo di monenî, derî erd û asmîn pîranîyeno la nêwatoni ki yew dirîyêyi rê tenezul bikerî.

Rocbîyni yîni ser di agêrena bide tesdîq kerdiş dona. Vona ki qey ona nîya dayê û bawo? Yî zî seki hewn ra newe haya bibî, xafla erzîni xo ser û tewşiki xo feki di vacîni. Ne wetonî vacî eye û ne zî wetonî vacî ki nê. Keynaka ciwoni şek a, fahmdar a, halê yîni ra weş fahm kena û wazena ki hewayê gironî vila bikera. Vona ki waxtê mi debîyo, mi rê destur ez şona wendeca. Pîy zî tedir imbazêyi keno û çand deqîqeyon ra pey wendecayî ver di teber kenî. Xatir ki yemnû ra wazenî hergû yew karê xo ser di şono. Keynaka zerrî herayi hi lîse di û him zî dersxone di yê yewin a. Hi hetê terbî û malîfetîya û him zî hetê wendişîya çew sey yayi nêbi, dormere di hemin tede balîheyi berdinî. Ino halê xo no yê yewini weş kifş kerdibi û çerray yew xeta şaşi nêromitinî. Waştinî ki zonacayê tortorêyi qezenc bikera û hi darbonê mar û pîrî û hi zî yê himwelatîyonê xo daru bikera. Mezgê yayi di rêça kekê Memoyî narbe bido zî yayi wendiş xo rê esas gi-rewtinî. Nêwaştinî ki may û pîyê yayi hîna zêdir xem

di bimonî, derdê yînî gironêr bikera. Xayleyo verîn wazena ki pelonê xo wirdîyonê keyeyî ser ra bigîra û bi zerrîya weşî û peti peyena peynî welat di bicuwîyî. Sebebê vinîbeyîşê kekê Zerrîweşî û Şayda zî cuwîyena xerîb û yê bê welatî bî. Ino semed ra zonayeca zî keye kulfetkî welat di fikrîyaynî. Fekê may û pîyê xo zî seheynabi û yînî zî welat di yew ca waştinî. Xora mar û pîrî timî erdinî zon.

Eki wendişê Rocbîyni ra nêbîynî ma ka barê xo wîta ra wenî. Û derd û kullonê xo yê vîşon dekerî boxça dima zî xo qorra bestî û agêrî welatê xo ser di. Eki şima nêwazî ma peyser şîyerî dewî, ma kû Amedi di xo rê cabibî, biseterîyî, zerrîya xo vero bîyarî, xo zî û dormereyê xo zî bi zerrîya soti bixapeynî. Aqobetê xirabî ki seredê yînî ser di omeybî, yî metropolon ra aciznaybî. Koçerêyi û xerîbêyi zaf zirar pirûdabi, dek û dilavon mîyon vistibî, zerrîya gird û wirdîyon têdir veşnaybî. Hi bider bibi ki nêwatonî ki xeyalonê xo di ca biderdî. Rih û gonê yînî ha yew çetalrar di yo, zerrî ona biwaza zî ceraw nêkenî ki cayê xo ra bileqî. Gedeyî ki raro pîs di zeh bîybî derî şerme û xo di mendiş viraştibi. Çîyo kû derî zêdêr interîyaynî xûlqo kû welat di girewtibi raştêyi yînî vernaybî û çina ra ki hi yînî û hi zî ma ino xûlq goşpey kerdo? Heme cîrîyayonê mar û pîrdê xo ra, dew û dewijonê xo ra, ê welat û himwelatîyonê xo ra hagîdarîbî. Zonaynî ki şarê kurdî çina ra ezît diyo û çî semed ra welatê xo yê şîrînî ra raçerînî. Sey keyedê pîrdê yînî, zaf keyeyê belingaz û bêqomî xerepîyabî, zafî kulfetkî bi zar û zêçê xo na zîndonon di pîr û puçî bîyî. Zonaynî ki hergû yew ciwon, egît, cenîya cayili û zacloni ya bi kerdonê xirabon dima kişîyaybî û ya zî benasat bîybî. Mîyonê asar dejon di rapincîyaybî û tahmê cuwîyena tahl û tirşî ra hayigî bî. Heme tēmîyon di ino moj qewmîyayon rê ya şade bîybî û ya zî verînonê xo ra mirdîya gondê xo eşnawitbî. Gazinca mar û pîrî qey

înî gedeyê ma korî bî, kerr û lalî bî, gêj û tewşî bî, xo gureyonê nebaşon mîyon vist û ma zî xo ra pey milşikte verdayî? Çina ra ki peynîya cuwîyena ma di qesbaya ma bi destonê xo daxnayî? Ino dej û kullo bêdaru çi semed ma rê pirûnâ? Çina ra ayî şîretê bi hînzaronî ki eşnawitîbî birê bê binî di goşpey kerd û ma ona neçar vistî?

Ina xirabêya ki ma bîya, bi rîyo sipî ma nişîyenî vecî kuçe, ma nişîyenî çaredo tukerde yew cemat di ronîşî û qala xo zî vacî. Ne ma şîyenî mêmûnê (keybergêrê) yewî bî û ne zî yew ber ma rû akeno. Qey asar yew eşkence destê ewladî mar û pîrî beno? Sew yî rarê nomis û şerefi di, rarê xîretî di, raro kû heme himwelatîyon rê bibi çarenuş û bi ayo rar benasat bibîynî, ma ihînd nêinterîyaynî, ma ona xo vernêkewtinî, ihînd milê ma ma ver rû kewe nêbiynî. Wa ka qesbaya ma derî heyne zî bihelîya la çareyê ma tuckerde bîynî û wa ka cemat di zî qala ma pere bikero. Eki pûncini qala ma goşpey bikerdîni, desin zî aya qala ma goşere kerdîni û xo goşa kerdîni. Cindowo bêqom newerna omewo yew çatalrari. Tirî Rocbîynî zonayeca qezenc kena û nî wû nê? Eki qezenc bikera ma kû koncayî ser di bera? Sew Amedi bibo beno kû zî êro ra pey yew gedeyê ma zî raro xirab di nêbo la ki cawo xerîb bibo, ma kû îni wîrdîyonê bîynon senî û bi çi dabar û fêmi bipawî? Des û pûncês serrî ra ver ma hîna fêmdarî bî, ma wayerî hêz û taqetî bî. La roco êroyen ma hinî him hetê hêşîya û him zî hetê qowetê dest û polona apey şîyî. Eki Amedi nêbo tersê ma, ma kû îni mendon zî wêra di xerc bikerî û bi qehrê verînon û peyenon ma kû cî ra bişerredî, xo bi xo yemnû biraçarnî, şelpezeyê dinya û axîretî bikerî, bêheşmêya ewil û axîrî xo sereyî ser di bîyarî. Keye bi asar taketnaketon verba vacvêrê Rocbîynî şîynî. Aşma Puşberî omeya û çand rocî ra pey zî vacvêr o. Rocbîynî zaf xem nêkera zî la keye di heme bi ke-

legonî tēyagêrenî. Vacvêr ra zêdêr cayê qezencî derî bar û kar o. Çimkû cayê xerîbî yî zaf hewlwelaqon mîyon vistîbî. Şew û roc derî herom kerdîbi, bi tahma keye kerdiş, tēdir sofre di non werdiş, eklê werî ra tahm girewtiş, bi tahma mēmûn (keybergêr) pewjna-yiş ya zî mēmûnêyi (keyberêyi) şeyîş çewî bi zerrîya weşi nêdiybi. Gedon zî kurtîyi ra zafêr çiy nêşnawit, timî sebebê ina cuwîyena derd û kulon zî xerîbêyi nişon daynî. Kîşt û kinar di ki ewnîyaynî kek û ata xo ki nêdîynî, heme tēnê yîni ningonê peyenon sero pay warîştinî û seba şaş tēyagêrayîşî serehewanaynî. Cuwîyena bi riye, bi qirm û kokî yê kal û pîrona ki bi reng, bi kihinşurrêyi û ananêya welatî bî, roc bi roc heliyaybî, vilişiyaybî, jehr û ziqom gêraybî. Heme bendedê yew cuwîyena ki yîni ino ezît ra bixelesno û bi hêvîya kal û pîrona besto bi. Meraqê rocê vacvêrî zî hinî hêdî hêdî imrê xo dekeno, nizdî beno, bendedê vacvêrî di mendîş zî peynî bîynî. Ina aşma peyeni derî sey serri derg omeybî, hinî herunda aşmî û rocon di seaton omarenî. Peyena peynî Rocbîyni dekewena vacvêr û vacvêrê xo zî yê serkewtî nişon dona. Hinî hemin rê cayê qezenckerdişî mereq o. Cayê serkewtişî welat di beyîş milê hemini bi. Çimkû zaf xeyalî zî ino miradî ser nurnaybî. Keye bi asar taketnaketon verba vacvêrê Rocbîyni şîynî. Aşma Puşberi omeya û çand rocî ra pey zî vacvêr o. Rocbîyni zaf xem nêkero zî la keye di heme bi kelegonî tēyagêrenî. Vacvêr ra zêdêr cayê qezencî derî bar û kar o. Estanbol di teyna zon û romiteyê xo xo vîrî nêkerdîbi. Keyf, huy, ardim, heskerdiş, cemat pirûnayış, roşon gêrayiş û omarikkerdiş, mezelonê kal û pîronê xo ziyaretkerdiş, şîret eşnawitiş, pîze ra yemnû virarî kerdiş zî xo vîrî kerdîbi. Ayo imnon ninga Rocbîyni sazîyonê kurdon ra cînêbirîyaybî. Keye di mendîş ra teber heme waxtê xo wêrayon di vîyarnaynî. Pîrî rêça yayi romitîbî, zonnaynî ki ninga yayi ya yewi keye di ya û aya bîyni zî

sazîyonê welatparîzon di ya. Derî taketnaket viraş-tinî zî sew bi zerrî pewjnaynî. Çimkû kerdeyê wîrdî leyironê yînî yê girdon derî mergo pîl ronabi. Hilla ki tênonê xo dir ri bi ri mendinî, mîyonê yînî di şerro gird virazîyaynî. Toyini waştinî ki herûnda erjon di çiyîna bikewo rar. Vatinî ki ina dinya di teyna erjî çinî yî, sewbîna çiyî zî estî. Qey kî zî leyaqê keyedê weşî, maşîna weşî ya zî peredê zafî nîyî? Çina ra ki ma din-ya xo qorra besta? Dinya xo qorra bestiş, wa teyna bara ma toyini nêbo. Dinya dinyaya heme gonîyon a. Toyinin ki zî yî bêerj verdaybî bira nêwazenî ki sîya yînî tira biaso, vîrî erdişî caverdî, qet nêwazenî ki yew herunda ayî kerdonê xirabê xirabona monî. La zor zî kerdinî, tira lomeyî zî kerdinî û waştinî ki vacî gedeyê şîma mafdar bî û ca bidî kerdonê yînî yê xirabon û yînî meşrû binawnî. Înî têne bêwayerî kenî ki tede yew dilayêyi ronî la yew recfa ki heyonî êro pîrûnê-gûnaybî, pîrû gûnena û sey tura awi recefnena, hima cadi lezi lezi xo yeno. Toyinin zî rêça kekê Memo'yî vîrî vistinî. Vono kû Rocbîynî mafdar a ki şîyera ca-yonê bi şeref û nomisî. Eki ayî bîynî zî ewteyona bi-gêraynî çerray ez milşikte nêbîynî, çerray zî ma asar yew şermezarêyi rê ri bi ri nêmendinî. Erjonê welatî ver di daraxa şeref û nomisî ra hesebîyaynî û heyonî peyena cuwîyena xo ma ka çare tukerde bibî. Zaf ra toy ki ma ka çizîya estonê kal û pîrîonê xo biedelnî. Cayî ki Rocbîynî tagêrena yê heşm û nomisî. Cayê wijdon û vijînayon o, cayê heq û hiqûqî yo. Bi îni xe-yalon serkeweno û agêreno keye.

Aşma tebexî zî omeybî û vacvêr zî eşkerayî ver di bi. Heme kulfetkî verê televîzyoni di rêz bîybî, çe-her çimî ra hagîdariya vacvêrî pawitinî. Derî meraq ronîyabi, kom çi hind pûanon gîno û kom fakulteyî qezenc keno? Xora meraqo hîna gird peynîya vacvêrê Rocbîynî bi. Serekê mîyoncayê vacvêrê Zonayecayî ki hagîdariya xo qedînenî, Rocbîynî û pîrê xo zî rarê

dersxoneyî tepîşt. Dersxoneyî zî listeya peyena wendekaronê xo têkerdibî, senî ki Rocbîyni veynenî zerreyê çimonê yînî huweno. Keyfdê yînî ra fahm bîynî ki yayi yew cawo hewl qezenc kerda la kura wo û kom fakulte ya nêzonaynî. Yî ki het rêsenî heme mamoste û rardiberêya dersxoneyî yayi omarik kenî û tira vonî ki tu fakulteya Tortorêyi yê Cerrahpaşayî qezenc kerda. Keyfon ver pelî yayi ya nîyenî la pîy binêkîna bêkeyf o. Mamosteyon rê ino hal xerîb omebi, yî zî halê awerteyî sewma bestenî û derî normal veynenî. Çew ters û xewfê pîrdê Rocbîyni ra hagîdar nîyo. Çi zonî ki, çi tewir dejî diyî û çi tewir hewwelaqon di şerr kerdo? Çi zonî ki çand gedeyê xo rarê neyaron di vinî kerdî? Çew zî têserrûnêdono û çiyêkî zî nêpersenî. Yî zî ki ronîştişî ra aciz benî, desturê xo wazenî û hetê keyeya meşiyenî. Keyneka weş û delali yew vate nêdona tewşêya pîrdê xo, çîyo kû pîrî bêhuzir keno ya keyfon ver ser ra nîya. Wirdî zî omeyî papurê Îstiklalî, toyî şinasîyî vera kewenî, peyena vacvêrê Rocbîyni sewal kenî. Eki fakulteyê Tortorêyi yê Cerrahpaşayî eşnawenî pey keyf kenî la pîrî ino moj bi keyf nêveynenî. Ina fakulte serê heme fakulteya Tortorê ya û hîna verîna Tipon a. Tirî çina ra keyfê pîyî çinî bi? May û gedeyî ariziyêya asar cayî ra hagîdar la seki pîy nêwazo! Ino hal hemînî rê binêkî xerîb ome la geda bi keyf bî. Pîyo kû gedeyê yêyî bi keyf bî û teyna yû bêkeyf bibo acîbêkî yew çiy o! Tirî çina ra? Gelo tirî çina ra bi? Bi vatedar yemnû ra ewnînî, cî ra xatir wazenî û cîser kewenî. Dima ki Cindo û kulfetê xo keye resenî keyfon ver qîrrîya yînî cîronon kerr û lal kena. Şik fîynenî, gûmon di verdonî. Gorebê seatî ki waxt vîreno cîronî zî sebebê şayîya yînî sax kenî û bonder benî ki Rocbîynî fakulteya Tipa Cerrahpaşayî qezenc kerda.

Qala raştî heme şinasî û cîronî pey fakulte qezenckerdişê Rocbîyni şayî benî û seki pelî pabinîyî.

Çimkû hergû kesî zonaynî ki ayo keye serron reydir o kû şayî û keyf nêzona ki çina wo. Asar çiyî yînî û keyedê yînî ra durî bi. Ina gomi ra ver tebera pîy çî hind xemîn bi! Zerre di keyfon ver vengê qîrriya yêyî qabê bonî hewanona. Ino gosirmêt çina wo? Komî kû eşnawit verîcûyî Rocbîyni dima zî may û pîy omarik kerdinî û hemin rê rocaver di serkewtiş waştinî. Aya şewi mari gironêya dalamata xo ronayî û ca nêda xem û melulêyi. Pîy zî çiqas ki şewi aver şîyi bi hewayî ser ra bi û kulfetî rey vist. Kulfetkî heyonî destê nimacî ronîştî, telefoni telefoni sero abîyi û xebera weşi tedir bari biyi. Sey ina şewi Estanbol di yew şewi nêvîyarnaybî, dej û kulî ra zêdêr çiyîna tahm nêkerdibi. Ona asaynî ki eklê ina şewi yînî ki serron reydir ningon sero biedelno. Hinî destê nimacî yo, vengê azonî çewres û new şarçeyê Estanbolî ser kewtibi, bîybî qîrri û barrîya mallayon. Hemini yew ver destnimacê xo girewt û bi zerrîya weşi nimacê xo zî ki kerd, hima ca di xo cila xo ra pîşt. Bêsewtêyi yew hewi di keye radest girewtibi. Nimac ki bi, sîpare ki werîya, aswasonê Cindo'yî ca pînêda û eşkera hemin dir yew bi yewi bari kerd. Vono hewawo kû mi ra aseno şima vonî qey ez pey qezencê rinda xo şay nîyo, nê, nê, nê. Ê şima ra zêdêr nêbo zî kêmi qet nîyo. Ez zî qasî şima şay o la çiyî kû mi weswese di verdono cayê fakulte yo. Estanbol o. Ino Estanbolî kakûzurrê ma ronawo û ma heşm û erji ra zî kerdî. Eki ino ca Wan bibîynî, Riha bibîynî, Amedi ya zî Kurdiston yew ca bibîynî, keyfê mi çherpayî yê şima ser ra biynî. Xem û taketnaketê mi ino yo. Ayî kulbizikê ma, zerencê ma, kavirê ma yî ki wîta di vinî bîyi, heyonî ki dinya esta way û birayê yînî kû ewladê ewladonê xo dir ki bari bikerî û yî zî kû laneti ma rû bivarnî. Ina milşiktêyi ki yînî di zî sewm verdo, tede bidejî, ya zî ki ma ra lomeyî yû gazincê xo bikerî. Melulêya mi, xemê mi, keyfnêweşêya mi heme îni yî. Ma çî zonî ki îni torîne ma

yî ki mende yî ma yînî zî wîta di vinî nêkerî! Tirî çew yînî zî ason verdono, tirî xoser şîyenî xo talokon ra bipawî? Hilla ki hetê fêmî ya, hetê ewnîyayîş û veynayîşî ya ma temomî bî, ma raro xirabi di, di hebî cayilê xo ino şaristono serewerdî di vinî kerdî. Êro roc ma hinî sey verî temom zî nîyî, ma kû senî inî zar û zêçê xo yê mendon xap, dek û dolavonê metropolon ra bipawî? Bê zerrêya mi, xo apey girêwtîşê mi, neçarêya mi hema ina ya. Nî ki kom pîy pey tipa hewl û verîni, pey Tipa Cerrahpaşayi şay nêbeno? Ez nêvono hima şima vacî, delal û imbazê mi? Çew nişiyeno aya Tipi ver ra vîro û findiqa ma wîta qezenc kerda, senî ki pelî kî ya nêneyî? Himser û imbaza mi heme şîyarêya mi seba tu û yê mi nî. Êro ra pey gay ma wirdî zaf çeçî bî ki ma bişiyî cilî ki heyonî inkay ma nişiyayî awi ra vecî, balî ma êro ra pey vecî û ma inî zî gûlî yû çolîyi di nêkerî. Wa gedeyê ma rê nêbî sebebê şermî û yê bêheşmêyi. Eki yî nişiyî himwelatîyonê xo rê hewli bikerî, wa yînî ser ra yew nezîh zî himwelatîyonê ma nêreso. Bi inî tênonê aswason zerreyê yînî hêdî hêdî cayê xo yê ason mendişî rê verdono. Hinî rocê qeydî zî nîzdî bîyo, dişemeyo kû tira vero kulfetkî şonî qeydê Rocbîyni Fakulteya Tipi di virazenî.

Hi zîyaret û hi zî ticaret xo rê wendecayê şinga xo zî, delalîya xo zî veynenî. La goma kû rar kewenî tênonê neweyon leşa yînî di yew serebin viraşt, seki bombilerzî vîyarnî û sews pirûdo. Tersê serron newerna rar kewt, ereqo serdin yewver leşa yînî cor ra cêr qefelneno. Gulpîya zerrîda yînî yemnû şîynî, sey adirî toni tira veciyaynî. Qeyd ki virazîya hinî zona ki ha Estanbol di mende yî, hêş û aqilê yînî newerna têmîyon kewt. Têni ki yînî xeyalonê şik û gûmonî mîyon fiynenî bira nîzdîdê Rocbîyn ra nêvîrenî. Ya şîyar a û halê yînî ra zî weş fahm kerda. Agêrena ser di vona ki dayê û bawo nomeyê mi Rocbîyni nîyo? Wirdî têdir sereyê xo têşonenî, seki vateyê yayî eye bikerî û vonî

ki raşt a, delalî û nazîna ma. Hima vatişê xo sere nêberdibi ki ya tira vona ki qey hêvîya dapîr û bawkalonê ma roco bîyn nêbi? Û şima zî seba kû ina hêvîyigon û rih bigêra, bîra ca, nomeyê mi zî şima bi hêvîya yîni nome nêkerdibi? Çina ra ki şima xo xeyalonê nêweşon mîyon fiynenî? Şima çina ra melul î û çina ra ki xemîn î? Ino taketnaketê şima seba çina yo? Binêkî qadê rocê bîynî rê hayig bî, xo bîrî û zerrîya xo zî pêti bikerî. Hinî xirab fikîrayîşî ra xo durî bigîrî. Ez rîyê şima sîya nêveceno û çîyo kû şima qehr bikero, qewmê ma bidejno ez tede nêwardeno û nêronîşeno. Ez heşma şima serê heme çiyî veyneno, îni wîrdiyonê ma rê nêbeno hezeka xirabi, meraq mekerî! Ez se bikero gay tede şerme çinî bo, çare tuckerdebo û rîyê şima sipî bo, esteyê dapîr û bawkalonê ma tede nêcizo. Zerrîya xirçikini reydir şarî mîyona gêrayîş zî ez nêwazeno, rind bizonî! Goma ki şima kuçe vecîyayî, maxaza şîyî, karca şîyî, imbazon het şîyî paştîya şima pey mi wa pêti bo. Çimkû vindertiş û ewnîyayîşê bi şeref û nomisî ra teber çiyêkî nêvecîno şima ver û şima milşikte nêverdono. Ma bi weşeyî kar û xebata xo biromî. Têbeyêya wîrdiyonê ma hinkerî, wa yî zî kar û guredê xo rû sur bibî, wa xebata xo na yê serkewta ra canêmonî. Wa çikî zî vindertiş û ewnîyayîşê şima sero sewmo nebaş nêvirazo. Ma ewladî kom kal û pîron î û kom welatî ra yî! Gay ma êro ra pey heşma welatî yê heme kes û çiyon ra serêr veynî û xo zî, şima zî, imbazon zî bipawî!

Roc û aşmî ki wendeyî ser di vîrenî, poli û anfiyon di seba vateyê nomedê xo zaf muhatabê personê vatedaron monena. Imbaz û ge ge zî mamosteyê yayi bider persenî, vonî ki gelo vateyê nomedo tu ma rê xerîb ome û merdim şîyeno ino nomeyî tu senî fahm bikero? Çi semed ra ino nome tu ya nîyawo. Ya zî bi ûsila vateyê nomedê xo derî laya kena. Verînonê ma ewladonê xo ra vatibi ki kal û pîrê ino welatî seba kû

roc nêdiybi, hewlêyi û weşêyi nêdiybi, seba kû şerr ra sereyê xo hewanênabi, seba kû yew asonêyi nêdiybî xo rê, şarê xo rê yewîna roc hêvî kerdibî. Roco kû tede kîştîş, raçarnayîş, veyşonêyi di verdayîş, xela ser di erdiş çinî ko. Cuwîyeni di laq û zext viraştîş, welatîyon zonaye ra durî tepîştîş, bermi, sê û sêkur verdayîş, bê pîr û bê mari mendîş çinî yo, ayo roc xo rê hêvî kerdibi. Ino nome zî bawkalê mi ina hêvîyi verînonê yînî bin bigîro mi na nabi. Seba kû dapîr û bawkalê yînî xo nêhesiyî, seba kû xo rê wayer nêvecîyî, terkwelatê xo bibî û welatê tirkon mîyon di bivilişî derî çarenuş veynîyabi. Asar yew aqobet, asar yewi cuwîyeni, asar yew çarenuşî verîne yînî aciz kerdibî, teng kerdibî. Yînî zî waştinî ki kurdonî rê yewîna roc akewo, aqobet, çarenuş û cuwîyena yînî bibedelîyo. Bexçeyê netewon mîyon di cayê yînî zî bibo, bi heq û hiqûqa bicuwîyî. Cuka waşt ki nomeyê rinda xo, delalîya xo Rochîyni panî. Asar yew xeyal serdeston timî suc veynabi, taloke veynabi. Hilla ki imbaz û mamosteyê yayi wazenî vateyê nomedê yayi bonder bibî, vatiş û eşnawitişê dapîr û bawkalonê yayi û aqobeti ki dewleti erdîbî seredê yînî ser di yew bi yewi sey şerîta filmi çimonê yayi ver ra vîrenî. Hergû waxt veynena ki ha beyntaredê di koyon di, yan zî di layon di ya. Eki ez vateyê nomedê xo derî vaco îni ki çi tewir yew vertekî bidî? Tirî şîyenî aqobetê kal û pîronê ma fahm bikerî, cirîyayonê welatê ma bişinasnî û bihemilnî? Şîyenî terteleiyî ki şarê ma sero ronîyabi fêm bikerî? Terteleiyê qizilbaşon, arminîyon, êzîdiyon û yê suryanîyon yew bi yewî sax bikerî? Hîna aver di Romon, Bîzansîyon û Abbasîyon wîta di se kerdo sero cîgêrayîş virazî û heq bidî şarê ma û xo zî vero bîyerî? Sey heme gedonê bindeston verînonê xo ra eşnawitibi ki ina hinzar serra ki ino welat di çewî asonêyi nêdiya. Şerrê Oris û Osmanîyon di çik comîrdê welatî kû destê yînî çek tepîşt gîrîyaybî leşkerêyi û berdibî

şerrê Qirimî. Ayo şerr ra se di yew nêagêrabi, tertele dekewt comîrdon, kakûzurrê yînî ronîyeno, tira kêmi merdimî apey agêraybî.

Abbasiyon zî ki waşt kurdon bisilmone bikerî Kurdiston seraser rijna. Riha ra heyonî Sêrt vîst hîzar merdim seba kû nîşteçayon rê hezeka ters û xewfî biba mihînon rû diya, welat wêron kerd, tertele devîst, kakûzurrê gonîyon erdbî. Kerra kerra sero nêverdaybî. Vatişon gore dewa bawkalê Rocbîyni 550 keye bi û tira pûncas keye verdabi. Eki aya bi omari-tedê ayo roc biromîyaynî wa ka êro tira yew şariston bivirazîyo. Rocbîyni hilla ki nêt kena kû vateyê nomedê xo derî vaco gay yî zî îni beyonê verînon yew bi yewî tira bieşnawî. Nî ki vatişê nomedê yayi serê xo nêgîno, nêreseno xayeldê xo yê raştkinî. Eki gorebê serronê xo naşîyî zî biasa cirîyayeyê welatî, ya lezi asar dejon di pewjnaybî, pîl kerdibî, komili kerdibî û wayerê cerebon verdaybî. Pey qayili nîya ki tewşikî vateyê nomedê xo derî vaco. Wazena kû imbaz û mamosteyê vatişê yayi rê hemil bikerî, persgirêya welatidê yayi bişinasnî û dima nomeyê yayi yeno çî vate bonder bibî. Ino semed ra teqeza nêkena, ge ge zî person bê verapers, bê tazîl verdona. La bahdîcûyî fahm kena ki îni persî gay verapers bibî ki yî zî bişîyî yayi û welatiyonê yayi bişinasnî ki çî hal di yî. Ino halo awerte zaf nêromîno û birr dona kû derî hêdî hêdî berê toyî çîyon akera.

Rocêkî imbazêkî newerna persê, nomedê yayi keno. Yû ki yayi bêveng veyneno, şono ser û zaf ra toy çîy tira teber keno. Yî ki ona bêsebir benî ya zî hinî teqena. Vona ki ez ka rewîna vateyê nomedê xo şima dir bari bikera, la belê merdimî ki yemnû nêşinasna û çîyo kû wazîno bonder bibo, eki weşbê komî kû nêşi, mijjê yêyî ya ki nîyome, vate ra tewir bi tewir mahnayon veceno û sey lastikî kom heta ki waşt onceno. Seba kû ma yemnû bişinasnî û şaş fahm nêkerî mi bi zonaye binêkî erê vist. La ez kû êro ra pey personê şima verapers bikera, tazîlê nêt xirabon çi tewir hewcî kerd ez ki ayo moj bida, gorebê zerrîya çewî nê, raştêyî çina ya sew ez ayayi şima ra vaca. Hewawo kû şima zonî ez Amedi ra ya. Amedi se di ra pûncasê yayi ko wo. Dewa mi zî koyon mîyon di ya. Verînonê dewi vatinî ki bê veşnayış û vengkerdişê peyenî hîrîna hewê bîynî zî ino moj çarenuş ina dewi di cuwîyayo. Hîrî hewon ra yê verîni hetê Îskenderê Girdî'ya veng bîya û veşnaya, ê dîyini Romaya Rocwelatî yena û ya zî cerebonê Îskenderî rar fiynena, hima hima kerra kerra sero nêverdona. Heme qûl û şeqalî benî gorrê merdeyon. Asar yew qûli bi nomeyê Qûla Romonijon dewa ma di esta. Hewa hîrîni zî Abbasî wazenî olê bisilmonê vila bikerî, bider bipewjnî, yî zî ayî verînon ra xirabêr zilom rononî û hima hima kakûzurrê yîni onî. Ayo mehel dewi 550 keye ya, dewi di yew qetil, yew xirabşonêyî ronîyena ki gunî leşon bena. Ser û binê yayi wêron kenî, erdnigarîya yayi seraser veşnenî, ayo kû kişîno, ayo kû benasat beno, ayo kû qûlikon di veşnîno, ayo kû tirmê yêyî tebera moneno û vergî tede mezek veyndonî, ayo kû welat ra raçerîno. La bahdî pûncas keye dewi ser di agêreno û dewi newerna şên kenî. Ayî keyeyê 500'yinî sera

şonî, çi aqobet yîni sereyî ser di yeno, çew tira hağî-
dar nêbeno. Dormereyê dewi dekerde mezel î. Vîrdê
pîronê ma di yew mezel (gor) di çand tenî wederîyay-
nî. Wa hima xismê cî bî, wa destnimacê yîni yemnû
ra nîşikîyo bes bi. Ino tewir meyît wedertiş heyonî
1970 zî romit. Ez hima wirdîk bo, ma zî dewi ra newe
vecîyaybî û omeybî Estanbol, dewi 1993 di hewa çe-
herini veşnîna û veng bena. Hettâ şonenê dewi ra yew
hewta û yew serre, ayo bîyn zî vîst û hewt serre bî,
kişîyayî, hincaron reydir terş û dewarê dewi zî mîyon
di çand rayonî zî bi astoron û kutikonê xo na kişîni.
Ma hima wirdî bî la ma şîyaynî xo ra bipersî, gelo yew
dewleti çina ra ki dewon veng bikera û himwelatîyonê
xo dinya ra çirçîbelayî bikera, ya zî bikişa û ya zî vinî
bikera, benasat bikero? Çina ra ki yîni hetê yew ça-
renusê neçarêya nuski bido? Çina ra ki yîni mişequet
verdo û veyşonêyi û wehîrêyi rê ri bi ri verdo? Ma
ki hewa peyeni rê şadeyêyi kerdî, ma hinî ayî hewî
verîni zî fahm kerdî ki gelo çina ra dewi veşaya û veng
bîya! Hinî vate bider wenayiş zaf zî ma rê zehmet nî-
yoma, sebebê ina hewa peyeni çina bi sew yê verînon
zî ayo bi. Çîyo kû hikmdaron tira waştî û pawito sey
yîni nêbibî, vero vecîyaybî, tedir şerr kerdîbi, xovero-
dabi û hilla ki xoverodayişî serê xo nêgirewt yîni zî
hêrsê xo dewi veşnayişê ser ra, dewij kîştîşî ser ra,
nêbi dewi raçarnayişî ser ra teber kerdîbi. Hinî çikî
aqobetê xirabî bîybî yew bi yewi dewijon sereyî ser di
onî. Hetê vengbeyişê verînon ra vatiş û eşnawitiş ra
teber derheqê yew belge dewijon dest di çinî bi ya zî
nêmendîbi heyonî rocê êroyenî. La oldaronê kurdon
vatîni kî şerrê Abbasîyon di çikî belge û tarîxê ma bîyî
Hz. Imerî û tayfaya yêyi heme veşnaybî.

Wîta kî veynenî ki teyna dewî nê, aîdê yîni çik
mendeyî (kalıntı) zî bîyî, çik cayê mîtolojîkî ki bîyî
heme verî kifş bîyî û dima zî talon û wêron bîyî. Cuka
ki êro Erebb, Faris û Tirk Kurdî nêşinasnenî û yew

formê xo hesebnenî, derî zuron û filomon têrêz kenî. Cuka ki çew rew rew kurdî nêpewjneno û millet ra zî nêhesebnenno. Hi bîyo kû 40-50 mîlyon yew şarî çew toynetewi ra zî nêhesebnenno. Mafê firrê hîrîni ki heme dinya di omeybî şinasnayış û heme şaron rê rewa veynîyayî, kurdon rê beno semedê kîştîş û raçarnayışî, beno semedê dewi veşnayış û veng kerdişî. Ez tu rê yew çarenusê pîrdê dewijê ma ra behs bikero. Ez vono qey ningê tu erd ra monî û ti ki ayo waxt binêkîna ma fahm bikerî. Pîrê mi fekê bawkalê xo ra eşnawitbi: Dewijêkî yînî hewt birayî benî, tira yew bi imrê Homayî mereno, yû zî nêmcet bi, yew polê yêyî çinî bi. Cuka ka dinya ra mendibi la mendişê yêyî merdiş ra xirabêr bi. Çimkû derdê şeş birayon û tewir bi tewir ra mertewalonê yînî, barê şeş keyon û zar û zêçê yînî heme derî xela verdaybî. Serehewanayêdê Şêx Seîdî di yû keya beno û serleşkerê Cumhuriyetî Delî Fikrî ki erzeno dewi ser, dewijon di şik û gûmonî pirûnîyenî. Tersê qirriyi, tertele ronîyayişi yînî di virazîno, ayî ki sey yêyî nêmcet, extîyar û cenîyonê neçaron ra teber heme kes rarê koyî xo feka keno. Serleşker ki dewi reseno hemini pîser keno û tira Şêx û kulfetê Şêxî û mirîdon wazeno. Belingaz û bêqomî ki pîserkerde yî tira vonî ki ma ne yû dîyo û ne zî ma pey zonî ki komî ha reydir o û ha konca yî. Aya gomi Delî Fikrî xora deli bi, hinî zirr deli beno û dewijon ra şerredîno. Heyetê dewi û comîrdî ki hazir di yî yew bi yewî daronê mijmewlona besteno, rocon reydir teyşon û veyşon aya tînci û talaya beste verdonno. Cenîyon zî pisîngon dekeno timnonê yînî û leşker mîyonê faqonê cenîyon cêr ra paşkilî keno kû, wa pisîngî faqonê yînî ser bikewî û leşa yînî pincirikon ver biriznî. Cenîyonê maxdurî yê ayo rocon vatinî ki şerme çinî bîynî, ma ka timnonê xo acêr bidî û şima ka halê faqonê ma xo rê veynî! Eki şima nêtweş bibî, îni aqobetî ki mi şima rê laya kerdî seba fahm kerdişî bes î û zêdî zî. Baw-

kalê mi zî seba kû Kurdî hinî asar çarenuson nêveynî nomeyê mi roco bîyn yanî Rocbîyn'î panaya. Hinî roco kû Kurdî welatê xo di rapincîyenî, tede seterînî, tede bê aswas û takaetnaket deberînî, tede merdiş yan zî tede wederîyayiş nasibê der bibo hêvî kenî. Wa tahda, zext, kîştîş, xizon û belingaz verdayiş û raçarnayiş ra durî bimonî. Ino semed ra hêviya bawkalonê ma roco aqobetxirabî ra teber yew roc bibo. Eki merdim bi nêtê bêhetî vateyê nomedê mi sero bifikriyo derî ansîklopediyî ki qêm nêkerî. Belê Imbazê mi no delal û erjeye ez ina ya! Ez inayi zî vaco, çiyoyê kû mi şima rê akerd lê lê yo, la lo lo zî hima ha mende yo! Ina teyna bismîlla ya la ayî ki sey qoniti dima rêz benî, mi tira behs nêkerd. Çimkû ne waxtê ma qêm keno û ne zî şima sebir kenî. Êro ra pey ma kû waxtî mîyon di asar pêkewton yemnû dir virazî û ez wazeno kû bê mahna, bê lufî, bê qest û qerezî, bê hûkon ma yemnû fahm bikerî, bişinasnî, halê yemnû cî dir bari bikerî. Çimkû seki tirkî di nêvacîna "Urfaliyiz, emekçiyiz, hep bir halliyiz." vona û wardenî keyonê xo ra şerredînî. Înî vateyê delali aya şewî virê çewî ra nêvecînî. Hi ayîninî ki weşeyî sero fahm kerdîbî û hi zî ayî yê nêtxirabon heyonî destê nimacî têverna û rijnabi. Çina ra ina hînzar serrî ya ki Kurd û Tirk têdir cuwîyenî û serdeston mafê birarêyî Kurdon rê leyaq nêdiyo? Rardiber ya zî Tirko ki fekê yêyî abeno, vono kû ma Çanakale di pîya şehîd kewtî û welat zî welatê ma hemin o la kurdon heyonî êro roc veyşonêyî, xizonêyî, zext, tahda û raçarnayiş ra teber cay yew heq zî nêdî. Heyna fekê kom kurdî yo ki abeno, vono kû Tirkon ridê ma ra Romayîjî wîta ra wekerdî, ridê ma ra Şah İsmail edelna, ridê himkarêda ma ra Cumhuriyet awon kerd. Şerrê Romen Dyojenî di kurdon 10-15 hînzar peye erşawitbi paştîya Tirkon û 1071 di Romen Dyojen yesîr girewt, radestê Selçûk Begî kerdîbî. Pirûnayışê Cumhuriyetî di zî Kurdon paştîya

Tirkon rê teksîr nêkerd û heme tewir ra ardim dabi bider. Û vonî ki biewnî halê ma û heqê ma zî ha werte di yo. Ino moj fikron rocon reydir imbaz û mamostê Rochbîyni ason nêedelnayî û hewlwelaqon mîyon vistî. Eki îni zur î, eki nege yî, eki boton î, yan zî sey rocê êroyenî raşta ya, wa heme çiy veciyî werte, ma zî sey bawkalonê xo xedir Kurdon nêkerî. La heme zî ona nêfîkrînî. Toyî îni vaton zuri, nege û bahcon ra hesebenenî. Û vonî ki îni herron ser ra komo kû cuwîyeno, eki Tirk zî nêbo, ma ki şerr kerd û welat xo dest vist, yî zî sey yew koyî, rûyî, layi yan zî dar û berî hinî heme bîyî yê ma. Hinî ha binê mahîyetê ma di yî. Wayerê hergû tewir ra heqî yî û yew niheqêyi zî çewî nêbîya û nêbena zî. Kom biwazo sew wekîl zî, wezîr zî, serekwezîr zî û serekkomar zî şîyeno bibo!

Wesar omewo, xoza ya zî xoristi zî gonî bîya. Dormere zergûn o, heme gonîyo kû qalik û qûla xo di nêseterîyawo, yew xilxilewo bêhimta ronawo kû niyna vatiş. Hergû gonî bi xozada xo di, bi reng û fasala xo di tēyagêreno. Cor di asmîn cêr di gonîyê ridê erdon cadê xo di nêvindenî. Ayo kû risqê xo rû pelekno, ayo kû wazeno cisê xo bizêdno, xo cisê xo na biresno û xem û xeyalonê xo ca bîyero. Xilxilewo kû heyvonon kewto des taq merdimon kewte wo. Yî zî seba risqê xo ko şeqnayış zî mîyon di çi gurewo kû biro ver kerdişî semed şaristonon ra şerredîyayî. Heyna seba kû xo himcisê xo na biresno kindiron bîle qerefneno. Seba waştekonê xo mergî zî heyf nêveyneno. Wesarî sewmê xo Rochbîyni sero zî viraşto û sey kulbizikon abîya, hewlêyi û rindêya xo di zerrîya imbazon di text pirûnabi. Vatiş û eşnawitişê yayi hemin ra hi nemrik, hi weş, hi zî nazik û him zî vatedar o. Cerga imbazon û mamosteyon tede balheyî berdinî. Werreki kû yayi di beno bêhimta û salixî zî nêdiyeno. Wendoxê pola yayi yê raştgirî zî ki fikir û ewnîyayışê yayi di nîyî zî daye û girewtedê yayi ra razî yî û weş î. Zarê yayi hemin rê

weş omeynî.

Rocêkî raştgirêkî heyonî destê nimacî yew kirta hewnî zî çimonê yêyî nêkewena û nimac ki beno tewşikî keye ra teber keweno. Çiyo kû yerê ra heyonî destê nimacî yû bêhewn verdabi, sews mezgê yêyî rû dabi, seba kû yew bi yewî tedir bari bikero rarê wendecayî tepîşeno. Zaf rew şibi la qala raşti wazeno kû ya zî xo şaş bikera û binêkî aver bîra. Onâ nêbi la verê waneyî xo imbaza gulzerrîni resneno. Merhaba û hal û xatir persayîş ra pey ververnono çiyêkî aya şawi yû cili di ason nêedelnabi, mezgê yêyî di xilxile ronabi, hinzar tewir ra aswason mîyon vistibi, yew firti di ono zon. Ya zî zona ki nêto xirab di nîyo la imbazê yayi kal û pîronê yêyî ra bigîri heyonî nurri-durra yêyî heme bi bawerêya kihinperesti û netewperesti di meleqîyayî. Duza netewperesti heme jehrna yî û hêş û aqil ra kerdî. Zonaye û wijdon ra durî edelnayî. Hewawo kû yû tuj o, ya cîrek a. Hewawo kû yû xezaba fikrîno ya bi aqil û zonaye nîzdî bena. Hewawo kû yû çiyê eşnawitî ra behs keno, ya çiyô kû hergû roc her km'yê welatê yayi di cîrîyeno derî yew bi yewî bi belge laye kena. Qet yew çiyô afaqî zî nîyona zon. Çiyô kû cirîyawo, belgeye yêyî zî verbaçim o û yêyî û himwelatîyonê yêyî sewm kenî, senî ki verapey bîyî, meqlub bîyî yew bi yewî vona. Vona ki Kurd û Tirk birayê cî yî nê? Çina ra ez bi zonê xo nê, bi zona tu vacîna? Çina ra ki şima wendecawo verîn ra heyonî Unîversîte pey zonê marda xo vacêr (perwerde) veynenî û ez zî pey zonê marda Farisî, Ereb û Tirkî veynena? Hima ino heqo verîn di cay ma seycî yî? Yew seyciyêyî wîta di esta sew ti vaci ez zî eye bikera? Çina ra ki ez dewi, şariston û welatê xo bi nomedê yîni yo kû bi hinzar serrona ki panîyawo nişiyeno nome bikera? Çina ra dewleti çi nomewo kû peynomewo kû maya nawo ma yêyî gurînenî? Qey yew romiteyê ino zonî zî, ina netewî zî cinî yo? Çina ra ki nomeyê dewi, şarçe û şaristononê

ma bedelîyayî? Çina ra ki Kurdo qizilbaş, êzîdî, şafi nişiyeno serbest şert û şurtê bawerêya xo bîyero ca? Çina ra hergû şaristonê şima di paloka bi paloka sero virazîna yê ma di herunda yînî di qereqol bi qereqolî sero virazîno? Nêweşê ma, çina ra ki îhînd şariston ser di vîrî bîrî Estanbol, Onqara, Îzmîr, Edena û yê ma di zî hetê tenduristîya yew averkewte nêvirazîyo? Çina ra ki êro roc zî himwelatîyê ma bi heron awi kirîşenî keyon û yê şima di keye di awi çirron ra şirri şirri kena? Çina ra ki ma awa kerm û kêzini şimenî û yê şima cayonê perzûnkerdon ra keyon resana? Ma asar awon ra bi hinzar tewir ra firingzehmetî vecenî û pey zerd û zerdmilîq benî û şima zî pey benî sey xirmizî? Çina ra ki nomeyê erdnîgarîya ma dewleti kerdo “Doğu ve Güneydoğu”? Çina ra ki Kurdiston vatişê ma qedexe yo? Çina ra ki ma ra vonî şiyerî dewa xo di zonê xo qalî bikerî, şaristonon û sazîyonê dewleti di yasax o û şima hergû goma Tirkîye di bi Tirkî vacînî û nusenî? Cay şima Tirkî tira hagîdarî ina çand hewîya erdnîgarîya ma di demografî bedelîyawo? Ge Çerkez, ge Ereb, ge zî Afgan tede cayî kerdo? Înî person ma şiyenî hima zafinî zî têrêz bikerî la ez vono qey seba kû merdim bişîyo birarê xo fahm bikero bes o! Eki raştî ma birayî sew? Hilla ki ridê imbazê xo ra ewnîna veynena ki bîyo sey pizotedê adirî. Hindo kû raştêya welatî û şarê xo imbazdê xo nawitbi, pey bermî ra xirabêr bibi. Bi veynaye û eşnawitedê 20-25 serron yû serebin bibi û mar û pîrdê xo vera, cîron û himwelatîyonê xo vera hi şermaye hi şermaye ki mil vero kewte moneno. Hind veynenî ki seata waneyî omeya hima yew firtî di xo têkenî û imbazonê xo na resenî.

Waxta kû imbazî yînî pîya veynenî hewtay hebi deli hêş û zerrîya yînî têmîyon fiynena. Ayo wane di çew nişîya raşt ra raşt xo fahm û şekerdişî rê bihederno. Rocbîni ki zî eyomê poli veynena, xo di vacîna, vona ki hinî têr kemonî ra vecîyawo. Ez çiqas ki halê

keyeyî dima bo û veco aver zî, ina raştêyi kom şiyeno binimno, kom şiyeno xo tira bipawo kû ez xo bipawo? Gay ya merdim wayer vecîyo û ya zî mildê xo rû bido, xo teres bikero, kerr û lal bikero, xo korê dinya û axî-retî bikero. Xora vîrdê yayi di bi, çand firrî ki şerr di qewîyenî. Bawkalê bawkaldê yayi ra heyonî inkayî ha şerr di yî. Bawkalê pîrdê yayi serehewanayedê Şêxî di tolaz bi, bawkalê bawkaldê yayi zî şerrê Qirim û Osmanîyon di tolaz bi û gîrîya binê çek, yû zî ayo şerr ra gonî nêagêrabi. Bawkalê yayi zî 1925 di pêçek bi, pîy û maya yayi zî hewlwelaqê serehewanayedê vîstê newin di meleqîyayî. Senî ki goşonê xo pada û çimonê xo zî degîra? Hergû şahna yayi di herunda îni dejon jon keno, eki biwazo zî nişiyena xo tira pûnk biestera. Komî kû waşt xo biestero yû esterîya, gêj bi, har bi, xo vinî kerd. Ya zî yew wendox a, cenîka roşndar a, senî ki xo asar raştan ra bipawa, peme xo goşona bina û xo mehtê veynayîşî bikera! Wayer vecîyayîş, xoverodayîş bedelê yêyî zî derî giron bîro, heyne zî rarê raştî veynena. Hinî birrê xo asar yew rarî di birrîna. Têmîyon kewtişê keyeyî şerro niheq o kû welatî di romîno wêra ra yeno û yayi zî ino halo nêweşî hewl fahm kena. Ino moj tahlîl kena û çaredê yêyî zî sero fikrîna. Ona yew mişguleyî ver di xo durî girewtîş karê wijdonî nêveynena.

Hewawo kû zelal asaynî şeş-hewt firrî ino çare nus di çelqezîyaybî. Weş zonaynî ki raştêya xo ra remayiş, temeşe kerdiş mergê xo, ya zî yê himwelatîyonê xo waştîş hesabnaynî. Raştêya welatî hi verbaçim bi ki nimitişê raştêyi mezêlê xo kendiş hesebnaynî. Cuka ki tik vindertiş û pêt rar ra şeyiş xo rê vijînawo. Weş veynaynî ki barê yayi zî giron bîyo. Ge keyeyî vera veşaynî, ge nezonêya welatî vera veşaynî, ge xo vera û ge zî imbazonê wendixon vera veşaynî. Rocêki kafeterya di ronîšta bena û di tolazî zî verba yayi di ronîşte yî û hergû xotêdayişê yayi objektifonê qameraya xo ra vîyarnaynî. Wirdînon cor ra cêr sencena û şiko kû pey berdo wirdî zî sey yayi kurd î. La cawo kû ha tede xizmet kenî hi yîni rê û hi zî himwelatîyî ki xo rê wayer î, derî dişmenêyi romenî. Belingazî bira bê qomê û nezonêya xo ra zî hagîdar nîyî. Bi eşq û zewq mi sero omeybî guredar kerdiş. Bi ewnîyayiş û têyagêrê xo mi terson sero pernenî, çimon serra mi ra ewnîyaynî. Seki ina se serra ki asar fahlî bira nîyomeybî cerebnayiş û bira sey yîni hinzaron reydir ciwonon xo nêcerebnabi. Bira sey mi bi hinzaron reydir ciwon, cenî, comîrd kal û pîr bi fahlonê yîni xirabî û sîxurêya yîni benasat nêbibî? Eki asar kerdon serê xo bigirewtinî wa ka hinzaron reydir nuştox, roşndar, romanhes, şanoger fek rarê xo ra verrado, wa ka zaf pênusî hiş bibî, wa ka nêzono serehewanayeyê çandin zî bira nêcirîyo. Tofalî bira çare nusê xo ra zî hêşdar nîyî û ayî ki sey mi wazenî şarê xo rê, ê bîndestî rê xizmet bikerî derî tengone pirûnonî û dek û dilavon seredê yîni ser di erdişî meydon wazenî. Heyf! Bi hinzar hewî heyf! Heyf ki nêzonî kom î û çi yî, çikare yî? Kom çi zono kû ayî qewmîyayonê verînon di bawkalonê yîni ra zî toyî sey mi, hetê toyin kurdon ra nîyomeybî taqîbbeyîş? Bi

ewnîyayiş û vindertişê merdimonê asarînon yî terson ser di nêpernîyaybî? Beno kû zî bîyî semedê welat ra raçerîyişî, ya zî benasat beyîşî û erdon ser ra wederî-yayişî la pey çikî zî hal nêbîyo. Eki bi asar kerdon bibîynî wa ka Kurd vîst û new hewî serê nêwewero. Bi îni tèn û fikron wardena, hetê pola xo na wîrdi wîrdi kîştôn sero leqîna, ge xorîn xorîn hesiron oncena û ge zî pey îni kerdon huyê yayî yêno. Xora demeyê vacvêron o, eki vacvêrê yayî bi serkewte bivîrî, pola xo bê qeda bivîyarna, nêtê keyeyî ino imnonî serêkî bidî welatî rû. Rocbîynî zî mîyon di wazenî imserr betlone wêra di vîyarnî. Cuka ki waneyonê xo rû sur bîya, bi xazê peyenî karê xo romena.

Keye di dehkeraya welatî şeyîşî ki abena ya zî nêtê xo yê şeyîşî mar û pîrdê xo dir bari kena. Mayî bêveng monena la pîy şertê vacvêr ra vîyartişî vernono û ya zî pewjnena. Peynîya aşma puşberî (hezîron) di heme vacvêrî eşkera bîynî, keye zî çeher çimî ra aya peynîyî paweno la têbeyîşê xo ra zî apey nêmonenî. Peynî ki yena puşberî û ki vacvêrî zî eşkera benî, veynenî ki Rocbîynî heme dersonê xo ra vîyarta. Seba kû têbeyîşê xo no yê şeyîşî temom bikerî, çand kemoneyê xo zî newerna xo çim ra vîyarnayî. Germê temuzî ververnîyeno û yî zî kulfetkî rayonê Amedî benî. Veynda taxsiyêki donî, verîcûyî kelmelê xo û dima zî yî suwarê der benî. Nêmseatî ra pey otogar resenî û kelmelê xo baxaj di ca bider donî. Hilla ki suwarê otobusi benî, verê yîni ki tadîyeno welat heme têdir kelgirîni benî. Yew het ra zî taketnaket û aswason helqa bide girewta. Çimkû welat ra ki omeybî hal û wezîte yîni, nifusê yîni, dej û kulê yîni ona giron nêbi. Çimkû nifus temom bi. Çew rê çewî semed yew tewir ra zî hesab dayîşê yîni zî çinî bi. La êro sey vizêrî nîyo, tewir bi tewir ra derd, tewir bi tewir ra hesabî ver di mende yî. Hesabê di cayilon ver di mendewo. Mezg û zerrîya yîni ciqliqî kena, gunîya ningonê yîni vazdê

mezgidê yîni kena, hêş û aqilê yîni têmîyon keweno, zerrî têsêr di qelebîna, cîf peysîno, hesr û çilonta yîni têmîyon bena, xo pîze di waywelikon veyndonî. Vengê waywelikonê bêvengon dêsonê otobusi pulisîno hey-na yîni ser di agêreno. Bira şeyîş û vindertişê otobusi ra hagîdar niyî, yî oncax ciriyayeyê leşa xo ra hagîdar î. Hergû yew gorebê serronê xo, gorebê kaşkerde û fêmê xo, gorebê fikir û ewnîyayîşê xo hûkonê çare-nusê xo na gêrenî. Estanbol ra heyonî Ameda rengîni yew firta hewnî zî çimonê yewî zî nêkewena. Hilla ki otobusi mabenê nonî dawo zî, hindo kû xo rû mijul bî, çew bira pey nêaqilîyawo. Nono kû girewtibi xo het, heyonî Amedi tira yew piron zî tahm nêkerdibi.

May û pîy hilla ki dewi ra bar kenî gedeyê ki dest û polê yîni bî, şîybî birê bêbinî. Çi heyf ki ayî gedeyî serewerdeyê Estanolî êro yîni dir niyî, derî zaf zaf interînî. Xo di monenî, cayilêya yîni rê biinterî nî kû yê raro xirabo kû tira şîybî û yî benasatê dinya û axi-retî kerdibî derî biinterî. Pîsêya welatê xomî û gedeyê ki wêra di vinî kerdibî, hilla ki vîrî kewenî goştê yîni cor ra cêr rizneno. Eki hayaya may û pîyî û gedon cî ra çinî ya zî sew, xilxileyê mezgidê yîni yew bi. Ters û xewfê Memo'yî yew hewi di çukê yîni, yîni bin di şikitibî. Vonî ki eki Memo dewi di raştê ma biro û m ara perse war û birardê xo bikero, ma kû çi hesab biderdî? Ma kû vacî, way û birayê tu se bîyî? Ma kû se vacî û çi tewir zuron pîbîyerî? Leqerdî û galagala dewijon ki ma senî verapers bikerî? Hilla kû Amedi resenî se di şêşt-hewtay poşmon benî ki omeyî. La ki ino fikrê hemini zî bibo çew çewî dir çîy bari nêkerdo, bira kerdî fekê çewêkî zî nêakena. Kerdî yewî rê bigû-no çilka gunî çewî ra nêherrekîna. Hewawo kû rêziki yew mêwi ya zî perçinî qefelnena, weswesî zî ayo moj leşa yîni seraser qefelnaya. Hindo kû dejê leşa yîni giron bîyo, hindo kû leşa yîni homtayi menda, hindo kû neçar î, sey milçiki mendî. Çewî di keyf, tawûtaqet

û qom zî nêmendibi, xo ino tewir keyedê merdimonê
 xo resnenî. Merdimê yîni, sereomeyedê gedonê yîni
 ra hağîdar nîyî. Yîni zî nêwaştinî ki çew ayî dehke-
 rayon akero. Hewawo kû xo hedernabi, eki yew bi-
 perso ma kû bi verapersonê remokon verapersê yîni
 bidî bi. Aya şewi seba gedonê vinîbeyon persî nêbîyî
 û yîni şewi bi ax û waxê xo di vîyarnayî. La heyonî
 nêmedê şewi heme hûkonê dewîya gêraybî. Heyonî
 ki şîybî cili merde û gonîyê dewi, dabar û şîlikê dewi,
 cirîyaye û qewmîyayedê dewi ra vîşêr çîyêkî nîyome
 sofredê qalonê yîni. Hilla ki omeynî bider ki Cindo
 û têsêra xo bihuyî gedeyî vîrî kewtinî û xo huyê xiltî
 ra apey kaş kerdinî. Çimkû mezgi û qesba di çîyîna
 xilxile kerdinî, nişîyaynî pîze ra merdimonê xo reyfiy-
 nî, seycî bihuyî. Şewi ki dijîya bîyi, nevînî ki rafînî-
 yayî, mêmônî (keybergêrî) yew wede di, wayerê keyeyî
 yewîna wede di kewtî cila xo û heyonî destê nimacî
 xeyalonê xo dir imbazêyi kerdi. Şewa dîyîna ki têsêrî
 yew zî hewnê çimon xo çim di nêveynenî. Yeno vîr ki
 verînon asar tengonon di vatinî ki “hima kura wo,
 Kîdagi cor ra menda ya”. Esas boça nayeli dewi di
 Memo ki raştê yîni bîro qerefîna. Ters, xewf, intereyîş,
 bê hesab mendîş, xo ver kewtiş, takîşbeyîş hima ha
 cadê xo di yo. Bi tênonê xemî şefaqî xo di onî, sipare
 ki werîya rarê maşîna dewi tepîşenî. Maşîni taştêre
 ra pey seat hîrî di warîştinî. Yîni ki zî xo rê toyî teftalê
 dewi û zerzewat ki erîna dongaya (guherra) maşîni di
 cîf girewt. Wêra di raştê toyî dewijon û imbazon yenî.
 Pers û sewalî dima ca donî kelmelê xo, kenî ki pay ra
 hesreta da-vîst serron vecî. Seata rar kewtişî di heme
 suwarê maşîna xo benî û verba dewa Zafxiraba rar
 dewesnenî. Maşîni di himsêra Cindo’yî xeyalonê tirş
 û tahlon yê zîndonî mîyon kewena. Tahdaya ki îni
 raron di ontibî û laco ki bi şeye û omeyedê zîndonî
 şîyarê xo û welatê xo bibi û qilba xo bi ko vijînaybî
 vîrê yayî kewt, hinî hesron ca pînêda û newalonê leşa

yayi ya zerrîn û nazîn rû war kerdibi binê ningon. Ayî tēnon mîyon kewtişî dima gule zî biwerdinî xo di tēn nêkerdinî. Xora çand dewijon persê yayi kerd la ya xeyalonê xorînon mîyon kewta bî û verapersê yîni zî nêdiyabi. Yayi koyon ver ra rayer dewesnaynî, derd û kulê koyon zî yayi vera leqaynî. Zext, zordarêyi, veyşonêya koyon ya newal bi newal, gemi bi gemi, dol bi doli çarnayi, çerray yew deye ya zî helusîyi nêverdabi bin ra gêraybî. Gêraybî ki binêkî halê cayilê xo, paling û egîtê xo bonderbiba. Çimkû zaf hewî Memoyê xo binê îni deyon, helusîyon, lem û daron di lawnabi, gongulayî ki viraştîbî tede bi deyr û waywelikon lornabi û hewna kerdibi. Goma lawnayîşî di delaliyê yayi senî ki çicikonê yayi dir kaykerdinî virî keweno la xeyalon di raştê der bîro zî sew raştîkî ne raştê yêyî ûne zî yê imbazonê yêyî nîyna. Cadi leşa yayi homtayi bena, yew hewi di rusîlîna û sey xêşa têqerêfîna, xo ver di turincîna. Hewar û gazîyi Zenge-loni, Gorse û Bonîya Îson kena, sewt ki tira nêvecîya bêhivî monena û bermî reydir deyiron veyndona la ina hewi bi deyironê derd û kulon lornena. Xeyalon mîyon di şewi bider yena, tarî yû zelamati ronîyena, vergî ververnonî wezûrenî û ewewikî sey kutikon gala dormereyî kenî, yî pîzedê veyşonî rê wezûrenî, ya zî derdê Memo û cayilonê bênomeyon rê nalena.

Hind veynena ki Cindo'yî dekuto bider, wîta dew a, hê haya bi, vono. Ya zî takîşkî tira vona ki qey se bîyo tu? Vono kû ti weş û war rar kewta û inkay ti mergî ra xirabêr bîya? Ho tu rê awî, binêkî dest û rîyê xo bişo, wa hêş tu sere bikewo. Dest û rîyî şitiş ra pey hêş ki dekeweno, dewi serebin çimon ver ra vîyarnena û yew hesra xorîni oncena. Veynena ki dewi di kerrayaki têsero mendabî, êro yewi zî aya bîyni sero nêedelîyaya, bonê verîni yew zî pay ra nîyî, bi hinzaron reydir çuwe, estuni û mundikê ayî bonon heme veşî vero sîya û sotî bîyî, hergû setara newaya

ki virazîyaya zî sey setara aşikon asena. Vomîrî, tu-
 yerî, qizbinêrî, xerebêrî, dirrikêrî, qoçkêrî, murîyerî,
 mehşlêrî, kirra qali yewi rašta raşti pay ra nêmen-
 da. Ayîyî ki zî bi hinzar derdon ver, qeda û belayon
 ver, derd û kulon ver, zext û zôrdarêyi ver xo pay
 ra verodawo zî sew gilûgilamura yînî têzerre bîya û
 merdim bira yew dari zî cîra nêvecono, nêşinasno.
 Xora ki dewa yayi nêbîynî, wa ka ne dewi û ne zî erdê
 yayi bişinasno. Hîndo kû welato şêrîn û nazîn bêwa-
 yer mendibi, hewayê merdimê kalî, kelxûtî bedeliya-
 bi. Kî vatinî qey serê erdonê welatî sey yê merdimê
 kalî çiqurîyawo, hergû cadê yêyî tewir tewir ra belekî
 virazîyayî. Zordarêyi û talonê neyarî nê la bê wayer
 verdişê nişteçayon yû hal ra vistibi. Hergû roc teqîn
 û bombebeyîşî ver, her cayê yêyî qûl û paceyî bîybî zî,
 xo radestê neyarî kerdiş xo rê mergê mergon dîynî.
 Eki merdim tedir kewtinî qalî, lomê û gazincê xo bi
 bahcon ver daynî ridê kî rû. Vatinî ki şîma terkê mi
 nêkerdinî sew, ez ona tewş û homta nêverdaynî sew,
 bê gul û rîhon edelnaynî sew, senî ki mi vîst û hêşt
 serehewanayon di cayîyê xo heme şerton di bêwayer
 nêverdaybî, pelê xo ser ra girewtbî, senî ki mi heme
 hewi cayîyê xo pistinê xo di hewînaybî û seternaybî,
 ez ka ina hewi zî heyna ayo moj têyabigêra û her-
 gû yew xafîli bîyera neyarî sereyî ser di wa ka vîr û
 gomonê çewî pey çinî bo! Yew vincewa mi çinî ka ki
 rocon û aşmon reydir teqîn û guleyî pirûnêvarnîyayî.
 Biewnî mîyonê çimonê mi ra, eki şîma heme mi sero
 bibî, eki ez sey very zî nêbo, ez kû verî ra weşêr xo
 têvirazo, newe bikero û verî ra zî zengîner bikero. La
 ki şîma mi sey verî nêveynenî sew poxdê şîma ra yo.
 Şîma wesîtê verînonê xo goşpey kerd, yînî timî şîret
 ronaynî û vatinî ki, eki erdê kî este wo sew şîma zî
 goşt î. "Ne este bê goşt û ne zî goşt bê este beno."
 gêjînî! Eki wayer çinî bo, wirdî zî binê ningon di rizînî
 û zeh benî. Şîma ino vîr û aqilê kal û pîron ters û

xewfi ver goşpey kerd, eki şima ningê xo erdê xo rû bişeynî, ne halê şima ino hal bîynî û ne zî halê mi no xozayî ona bîynî? Mi heyna xoveroda, gonîyo kû mi sero mend, mi yû zerrîya xo di cawo tewr arizî û awzel di seterna, deberna û êro rocîya resna. Şima se kerd? Hê mi rê vacî; roco kû şima tehtilfiraş bîyî, raçeriyî, şima çina dîy? Û çina ome şima şereyî ser di? Goma ki şima wîta ra bar kerd, şima çand nifisî bî û şima êro çand nifus î? Ca di tēnonê yayi ca pēnēda û çîyo kû welatê xerîbon di omebi yîni şereyî ser di yew bi yewî laya kena. Heme tēdir xo di mukir kenî, vonî ki roco kû ma ti caverdaya, ayo roc û ino roc ma ha vinî kenî. Hima wa ina hurmi û imbazê xo vacî: yew xort û keynaya xo guredê bê xiretêyi di vinî kerdî. Gedeyî ki zî estî, yîni zî zon û romiteyê xo êştō adaşt, ê serdest û neyarê xo erdo naşt.

Merdimî ki zonê xo adaşt da, reydir bawerêya xo, heşma xo, erjonê xo, wijdonê xo, ewnîyayiş û vinder-tişê xo, xoza û rengê xo, heskerdiş û intereyîşê xo zî zonî dir adaşt dono. Merdim bê înin zitûzulot mone-no, bone moneno. Xora remokî zî bone yî, yî xo ra nê-yasenî la heme çîy yîni di veynîno. Hetkarêya welatî heyonî yew ca ya, himwelatî ki egît nêbi, xoveronêdî teyna welat ki se bikero? Ino mehel di veynenî ki toyî merdimê yîni ha vera yenî. Dewon di waxtê verî di yew xûlqo erjeye bi, hilla ki yew dost, merdim ya zî mēmûnê yîni cayo xerîb ra, durî ra biomeynî, vera şîynî, pî ki persaynî teftalê yîni, barê yîni tira girew-tinî û verba qeymeyê setara xo meşîyaynî. Ê yîni zî ino moj bi. Halo kû mezgê yîni, zerrîya yîni, leşa yîni tede ya, qet salixî nêdîyeno, hergû şehna leşa yîni dejî zaft kerda, bindest kerda. Qehr û bahconê serron ver hergû wesla yîni xo ver ra jon kena, çizena. Sereyê xo ki hetê mezêlê verînona ki hewanonî veynenî ki yew qifleyê risipîyon, hergû yewî dest di yew çongalo vendêrin û bi meşo wîrdi hetê yîni ya leqenî. Têvera

ki kewtî heme çongalonê xo erd rû donî. Cindo hilla ki ino halî veyneno, waxtê kirîşeyîşî di ino moj toyî meyitonê yîni vernî bider girewtibî keweno vîr û wîrdî himserî têreydir yew hesra neçari xorînêya qesbada xo ra oncenî. Seki heme bawkalê ma çongalonê xo nê palokayinon erd rû bidî û vacî gêjo; qey ma ti ayo hind hêşar kerdî û xemê tu nêbi? Heme talikoyê welatê xerîbî ma tu rê têrêz kerdî û tu senî asar feleketî erdî ayî cayilon sereyî ser di? Qey ma tu ra nê va ki, ti kû bi ino remayîşî çina çareser bikerî? Ti kû kom glemşeyê xo û çi moj hal bikerî? Xora çîyo kû neyar tu ra paweno terkê welatî beyîş nîyo? Terkê welatî beyîşî bi destê xo raçereyîş nîyo? Cawo kû ti wazenî şîyerî û tede bideberî, cay ti pey zonî ki çina yeno tu sereyî ser di? Tu sereyî ser di çina ono? Cay ti inî talokon ra hagîdar î? Ti zonî ki çîyo kû ti ver remenî, tira hîna xirabêr, hîna têmîyonekêr û girdêr nêvecîyo tu ver û tu neçarê ewil û axirî nêkero? Ti kû zar û zêçê wîrdîyî wêra di binpay bikerî û yî ki bibî alefê neyarî. Derdê tu yê yewî ti kû bikerî yê seyî. Qey bira tu ma verînon ra nêşnawitibi “dari ki kewti, çew nêzono gil kom hetîya şono.” Ti ki hew welat ra qerefîyayî, ti nêzonî ki ti kura di û çi tewir hewlwelaqon rû ri bi ri bimonî.

Heme waxt ma şîma vîrî vîstinî, yew gedeyî rê mayî çina ya sew yew nişteçayî rê zî welat ayo yo. Mayî senî ki gedonê xo awki û adirî ra, qeda û belayon ra pawena, ruwena û şowena, mird kena û piraydona, debernena û seternena sew welat zî bi ino moj nişteçayonê xo yew tengone di zî nêverdono û hergû şerti di derî wayer vecîno. Cayîyê xo bi romite û dîrokê xo, bi mertewal û estonokonê xo, rih û bawerîya xo, reng û fasala xo xemelneno. Çerray kî bê wayer, bê hêvîyî, bê paştî werton di belingaz, xizon û neçar nêverdono. Şîma ra ver kal û pîron çand serehewanayeyî vîyarnayî la çi heyf ki çewî sey tu, sey şîma inkayenon ona raro erjon nêvîjînawo. Goşt û esteyê yîni inî koyon

û kerrona mendibî, tirmê yînî rocon û aşmon reydir
erd di mendibî, teyr û vergon rê alef bîybî la heyna zî
nêwaşt ki xo neyarî rê alef bikerî, mehtacê yînî bikerî!
Hemini derd bi derdî ser ra dîy, tengone bi tengoneyî
sero ont, eşkence bi eşkenceyî sero wetd, zîndon bi
zîndonî sero kewt, hergû yewi xela û xeza vîyarnayi ki
la heyna zî erdê xo no qadîm û kevnar nêtereKnabi.
Çi belawo kû omebi yînî sereyî ser di zî bi îmkanonê
xo, xo ser ra dehf kerdibi, qewernabi, sey tu û imba-
zonê tu zî xo neçar û belingaz nêvistibi. Seba kû ti
ewladonê xo destê neyarî di alef nêverdî, tu welat ra
barê xo wena la ma veynenî ki tu di ewladê xo neyarî
dest di alef verdayî. Tu waşt ki saxlem bimonî, konca
mend saxlemêya tu? Ina nezonêyi sero tu di ewladê
xo zeh kerdî, hergû yew yew leteyê qesbada şima bi.
Şima kû ino hesabî senî bidî, lome û gazincê xo ona
têrêz kerdî û yew vista wîrdîyi di werton ra vinî bîyî.

16

Gedonê mendon zî ino laqa mendişê pîrdê xo vate bider nêwena la yînî zî hêş tēmîyon vistibi. Hilla ki waşt fahm bikerî runguzê pîrdê yînî êştbi, yî zaf xûl-çikonê tēnonê bi vatedaron mîyôn ra çarnaybî. Heme weslê yînî rap bîybî, tîk bîybî antenê xo bel kerdi-bi, peynî di dîy ki tēnê yînî ningonê peyî sero warîştî payî. Qîrrîyi û barrîya yînî asmînê hewtina resaynî, ino halî çewî di ne qesba û ne zî zerrî verdaybî. Çîyo kû vîr û vacêrdê yînî di ca nêgirewtibi û mar û pîrî zî zêdî tira behs nêkerdibi, wîta di, welato qedîm di, dewa Zafxiraba di, dewa yê derd û kulon di eşnawit. Hemin bin di ningî qerefîyaybî, çand mîtroiyî rar nêqedîyaynî, hêş û aqilê yînî takêş bi, seki mezgê yînî gunî bigêro, goşî kerr, çimî zî kor, zon zî fek di lal bibi. Zor çî belayî xo keye resna, ayo kû vacor biynî zî bêhimt bi, çina wo kû vatinî goşonê yînî nêeşnawitinî. Keye di pîrû ser ra bîyî ki halê yînî kû vîşêr hetê xirabêya şîro. Nurri û durri ra zîyaretkerdoxî ki yenî, ser ra benî ki yî bi terkê welatbeyîşî şaş bîyî, derî rindêyi û hewlêyi nêerda. Gedeyî sey nehon tehtilfiraş bîyî û ayî ki zî mende yî timî yew wesla xo kêm veynenî. Dej û jono kû kewto qesbada yînî çerray kû tira nêvecîyo.

Xirabşonêyi ki mezgî di, qesba di û zerrî di ronîyaya, heyonî hilla mergî reydir bena. Rocê imnonî derg î, eki zerre di acîzîni vecîni teber. Erdê kal û pîron, cayê şêron û egîton, cayê hewt zîyareton, cayê şehîdon gom bi gomi temeşe kenî, çimon ver ra vîyarnenî. Seredejî ki ina se serra peyeni di qewmîyayî yew bi yew yenî vîrê Cindo û Siltoni. Wirdî turinc donî, ayî ki verînon derî nişon daybî û ayî ki seredê yînî ser di vîyertibî heme têrêz kewenî. Qesba sot beyîşî ra bigî heyonî ko kewtiş, heme tedir vacîni. Vonî ki derd çiqas giron beno wa bibo, eki merdim eşnawi-

tox bibo, şîretê risipîyon heme derdon rê daru beno. Gironêya derdî merdimî nêkişena la goşpey kerdişê şîretî merdimî kîştîş ra xirabêr verdona. Goma ki xirba bawkalê xo ser resenî hilpîyi bider gûnena, xînt benî, sîyi ser ra şona, leşa yîni yew ver çizena, hesrî ca pînêdonî û şilp û şilpa hesronê yîni bena, bi yîni mezel zî, xirbi zî awi dîyena. Dapîr û bawkalî, may û pîrî û yêyî û cenîka xo ina xirba se serron di toy keye nêkerdibi. Heme hewt gedeyî ina xirbi di rapincîyaybî. Nêmeyê imrê xo wîta di vîyarnabi. Teyşonêyi û veyşonêyi dîybi, şayî û roşon dîybi, kay û kaykerî dîybi, weşî û nêweşî dîybi, dew û dewijon di barkerdiş dîybi, intereyîş û heskerdiş dîybi la xirbî heme têzerre yî û wêron î. Inkay zî yew koyeyê kerron, çuwon û mirdîyaqon menda yo. Binê ina xirbi di çi gonîyo delal û hewl puç bibi çi nêbibî, çi xeyalê zerrînî puç bîybî çi nêbîybî. Hilla ki puçêya ayî derd û kulon vîrî kewenî, serehewanayêyê şêxî, vengkerdişê hîrî hewon û seki Çoban Silo nêva 28 serehewanayeyê bîynî zî çimonê yîni ver di têrêz kewenî. Çina omebi ontîş, çina erdibi bawkalon sereyî ser di, kom çi tewir yew aqobet tahm kerdibi hemini xo yêyî û delalîya yêyî vîrî vist. Ino tên ki zon yeno û keno kû vernî ra heyonî rocê raçereyîşî hemini laya bikero, imbaza yêyî halê xirabî veynena û destê yêyî rû bena hewanona. Hilla ki wardeno xo çûkon rû dono, gazincîno û vono kû qey ez hêvîya bawkaolon yê rocê bîynîya beste nêmendo? Qey ez ayî cematî ki tede warîşt û ronîştto heme mi ra nêvacîyaybî? Qey hergû serehewanaye di çina wo kû cirîyabi yew bi yew ma rê laya nêkerdibî? Verînon timî ma rê qala hinzar serrîya ki hewlwelaqon di mendeybî nêkerdibî? Vatîni ki hinzar serrî ya ki îni herron ser ra tengone, xela, xeza, kîştîş, bermi, qesbaya xo tepîştîş, ciwonê xo vinîkerdiş, pîl û şinik raçernayîş, kal û pîrî rayeron ra vinîkerdiş çerray kêmi nêbibî û hima zî ha romîno.

Verînon ra heyonî êro erdê xo tereknayiş yew bêxîretêya pîli veynîyaya, sey qeda û belayê gird veynîyawo û zonîyawo. Gay nîştecaşîyî ino halî rê yew çare biveynî, terkkerdiş heyonî konca şono? Komî kû welat terekna û berd bêhimtêya bêst, veynîno kû dîrokî nawito yû terekîya û yû vinî bi şî. Vatişê verînon gore hewa peyeni dewî 550 keye bena tira on-cax 50 keye moneno, ayî bîynî ya kerdî binê erdon ya raşonayî û yan zî hewawo kû ma cor di va “welat teraknayiş welat ra estereyîş o” ona asar yew aqobet tahm kerdo. Cayê çewî zî heyonî inkay nêzonîyawo, heyonî roco inkayen zî çew pey nêzonawo kû kom, kom şerr di û kom hetîya şîyo? Tira pey heyonî 1990'yî çewî dewî ra bar nêkerd, teyna veyşonêyi ki zorê toyini berd bar kerd la zafini cawo xerîb nêvijîna. Meletî, Xerpêt, Amedi û Edene di seterîyayî. Kurdî ki zî şaristono kû sey Sêwaz, Meletî, Mereş di deberîyaynî, eki dewleta Osmanîyon sero zext bironaynî wêra ra hetê rocawonê Tirkîye ra nêşîynî, yî zî hetê Xerpêti, Amedi, Mereşî, Semsûr û Riha ya omeynî. La ayêyî ki xo şaş kerd, xo tewş kerd û barê xo wena hetê şaristonê xerîbon sey Bursa, Estanbol, Muxla û İzmirî ra şîyî, yîni zî bahdî zon û romiteyê xo, fahm û bawerêya hinzar serron vinî kerdi, heme şaş û fehşî bîyî. Cuka verînon firronê peyeron ra wesî kerdinî ki welat ra wenayiş, welatî tereknayiş mergê mergon o, mergo sur bi xo yo. Merdim ayo moj heme tewir ra qeda û belayon veyneno. Ma zî êro veynenî ki Cindo'yî raro şaş vijîyawo û xo dawo şaristonê xerîbî ser, şaristonê derd û kulon ser. Ziraro kû zî dîyo, xerîbêya ki kaş kerda, derdo kû barê yêyî kewto, derî qalî qêm nêkenî ki merdim yîni bi qalon bîyero zon.

Înî gazinecon ra pey verê yêyî pey, peyê yêyî zî ver beno û takêş kî mil xo ver rû fiyneno û keyewo kû tede mêmûn o, agêreno wêrayî ser di. Hinî leşa yêyî di ta, zerrîya yêyî di cayê weşeyî û hamilkerdişî nêmen-

dibi. Halo kû tede wo nurri û durri di fahm bi la çare nêmendibi. Hinî tewir bi tewir ra dej û derdon tahm kerdiş ra teber zî rar çinî yo. Keye di ters û xewfê toyî hesabon ver leşa yêyî sewsîyayi, fecir pirûgûnayişî ra xirabêr verdayi, zon fek di nêgêra. Eki kerdî pirûbigûnaynî çilka gunî sernêkewtinî, newe şekeno kû welat tereknayiş xaflet o, lexerê ya, serê heme derdon o. Newe fahm keno kû netewî çina ra seba xo şerr kenî û bi hinzaron ya zî bi milyonon tenî sero merenî. Fahm keno kû veyşonêyi ya zî xelayî ki ronîyenî, ronîyayî çina ra oncînî. Newe fahm kerdo kû pîçekî ki yew zînciya goştî ya, marda xo ra benî yew zî rašta raşti bi yew çilka şitî zî gojî nêdîyenî û çina ra bila heq û bila sebeb merenî. Newe fahm kerdo kû seba welatî çek hewanayiş mahfo rewa wo. Newe fahm kerdo kû şerrê neteweyîn di zar û zêç bêmar û pîy mendiş yeno çî vate. Newe vate mergî wenawo. Newe welatî sero merdiş fahm kerdo. Newe seba welatî xo fedakerdiş yeno çî vate. Çina ra ciwon, keyna, cenî û comîrdî welatê yêyî ser goştê yêyî lemon û kerrona moneno? Hinî zono kû komo kû seba erdê xo devirîyayiş bido hi rewa wo û sey şitê mari heq o. Wîta di fahm keno kû şeyîşê Memo'yî bi vate yo. Hima newe cawo arizî seba Memo'yî abirnewo. Wazeno kû bi yew hewayî raştê lacê egîtî birî û ina neçarêyi ra mar û pirê xo bixelesno. Nî ki hinî ayo kû halê yêyî çareser bikero nêmendo. Çeher çimî ra bendedê lacî di monenî, çî hind wazenî hêvîya ki kerda wa bin tepîşo, omî bigêro û raştê delalîdê xo birî. Şewa dîyina ki kutikê dewi nêlawenî, hes û besê şarê teberî çinî yo. Xom î, çand serrî ya ki welat ra dur î, nêwazenî ki rašta raşti dehkera defîynî û persê şarê teberî bikero. La vêrê terkêwelatî ra zonaynî ki waxtê yînî key o. Eki tarîyêya şonî ki derîyena û rayonî ki nîzdîyê dewi ra vîyertînî kutikon gala kerdinî, vengê lawayîşê yînî erd û asmîn şeqnaynî. Ge ge vacîyaynî ki îni bêweyî wa-

zenî ki îxbarê komî bikerî, çina wo? Vengê ewtîda yînî ewteyon ser kewto, qey xeyr o? Eki wazenî bipawî wa ka bêveng dima şîyerî, heyonî ki dewi ra durî fiynî. Nê ki çina ra wazenî dinya bider bihesnî û dişmenî tira hagîdar bikerî?

Demserr imnon o û dewon di heme kes vecîyawo bonon ser. Mîyonê rocî di ezîto kû dîyo wazenî bi hewnikêya serê bonon werte ra rakerî. Çew çewî dir eşkera çiy bari nêkeno la keyeyê Cindo'yî heme bendedê delalîdê xo di yî. Şewa çeherini di yew veng berî ver di yeno, şon newe derîyabi, mallayê eşayî zî hima nêveyndabi. Vengo kû bider yeno "rarê ma durî yo" û hinî tira pey çikî zî nêşnawitibi. Yî ki rarê xo romenî, Cindo wayerê keyeyî ra perseno; vono kû ayo veng xeyr bi, kom bi? Qey çew nîyome zerre? Yû bê zerrîya waştîşî vono kû dayzayî bî û rarê yînî durî bi, kirra yêyî birrneno. La mi ra persayî, va ki seki şima zafî biasî? Mi zî seba kû şima bişîyî yew têkilêyî virazî, va ki mêmûnê ma estî û Estanbol ra omeyî. Mi ra va ki xeyr omeyî û derî silomî bikerî, ma ki bi xeyrî sero agêrayî, ma kû yînî veynî. Ayo mehel mêmûnon çî hind zerrî kerdi ki persê lacê xo tira bikerî! Pîl û şinik têdir yew hesra xorîni oncenî la wayerê keyeyî vateyê hesra hemini xo rê xerîb nêveyneno. Çimkû ina hesri zafîni ontibî û yû zî derî şade bibi. Aya gomi veyneno ki hesron xo cor di war kerdo keşa yînî. Dayzayê yêyî xo di nêtebetneno û vono kû zaf xo medejnî, meqehernî. Homayî vaco sew şima kû verê şeyîşî egîtê xo ki veynî. Ma şima ra nêvatibi la hewawo kû vacîyaynî ha wîtayon ra wo. Eki ina hewi cay çew ome ez tu hagîdar keno. Bermi qirriko pulîsîno, cadî wardeno hetê cila xo na raymoneno.

Ayi şewi heyonî ki asteron sukerd yû asteron ra astereyî zî yêyî ra ewnîyayî. Ha asmîn di yo û mêmûnê yînî yo, cî dir vacînî. Zerrîya teresi ki yew feraset di serê erdon di netewon ra ewnîna, halê serdeston û

bindeston hîna weş weynena. Kom ha kura di yo, kom erdî sero yo û kom komî virîyeno, temeşeyê heq û neheqêyi kena, newerna rêça yînî romena. Hilla ki verapersî ser di agêrena, zaf zelalkî tira vonî ki eki ti heq û heqîqet gêrena, xo weş kifş bikeri. Heme çîy tu di qedîyeno. Dermono kû tu di yo, çewîna di çinî yo, çarewo kû ti weyna yewîna nişîyeno weyno. Heme xelasi, heme çare mezgê wayerdê tu di yô. Eki tu yew zelalêyi xo di biviraştinî, wa ka ino çare nus berê tu nêkuwo, wa ka îni derdon ra yew zî tu sereyî ser di nêro. Yû hind weyneno kû astereyî asmîn ra estereyî û dusere ronîyawo, eki mallayê şefaqî zî ha weyndono. Eşheda xo onô, fatîhaya xo waneno û wirdî destonê xo ridê xo rû keno, hetê çirri ra rayer keweno kû destnimacê xo bigîro. Dima zî biro nimacê xo bikero û pîze ra Homaydê xo dir bilebîyo û çik diayî ki vîrî yenî hemini têrêz bikero. Destnimac ki qedîna ome cila xo ver di suzdeyê xo rakerd, qilbi ra ewnîya û raşt ki diyi nêtê xo erd. Nimac ki qedîna, dia bi dia sero kû rêz kerdî destê xo newerna ridê xo ra kerdî û ewnîya ki hima rew o, xo binê cila xo ra kerd. Leheyf heyonî katika xo ont û lezi reydir çimê xo pîranayî. Tînci ki akewti, rocî ki germinêya xo ronayi, yî zî kulfetkî warîştî, hergû yewî cila xo tîrapîştî, ûsilî reydir berdi komi di ronayi. Dima çimonê yemnû ra ewnîyayî, têdir bêhewnin asayî, Cindo'yî waşt ki çîy vaco la Rocbîyni qali feki di birrnayî û va ki ez vono qey ma heme heyonî destê nimacî hahayîbî. Hemini heyona têdir sereyê xo leqna û vatişê yayî eye kerd, "Siltoni zî qey qedêrê ma zî ino yo" va û bon rû war omeyîşê xo hêdî hêdî gomî kerd. Ridê qijondê yînî ra asaynî ki hîna xemîn û xeyalgi ronî bî. Goma ki dewi ra barê xo wenabi toyî tira hima zaf wirdîyî bî, zaf çîy fahm nêkerdibi la belê êro xo zî, dormereyê xo zî, qewmîyayonê welatî zî weş şinasnenî û vate bider wenonî. Ge ge yeno vîr ki mar û pîrdê xo ra lomeyî bikerî la ca û waxtî semed taxirnenî. Zerre

ra vîyertinî ki çina ra may û piyê ma wîta nêdeberî-yaybî? Çina ra ma mecburê metropolonê Tirkon ver-daybî? Çina ra ki sey dewijon û mirdimonê ma erdê xo sero nêvindertibî? Çina ra ki rayerê xoverodayişî nêvijînabi û yê remayişî dima kewtibî? Ino bedelo kû dewijon xo çimî ver girewtibi çina ra yînî zî nêgirewti-bi û ma way û birayê xo bêlaheq û bêla semed qirbon dayî? Sew asar lomeyî û gazincoñê xo rêz bikerî rocon reydir nêqedîyenî, cayê xo seresibe nêdîy û çewî zî va-tiş eşkera nêkerd. Hemini zerrîya xo di nimit û caver-dayî rocdê seresibî rê. Yînî zonaynî ki may û piy seba yew miradî omevî û nêwaşt ki mirad nêmcet mono, zerrîya xo zî ino moj vero erdi û derd û kulo kû çand firrî pey nalenî bineyna erê vist, taxirna.

Rocbîyni rocê pûncini dormereyê dewi ko bi ko, newal bi newal, gem bi gemi, doli bi doli gêrayi, verê yew bi yewî deyeyî, helusîyi, kerreyî seheyne. Hergû goma ki êştinî kal û pîronê yayi û way û birarê yayi vernî bider girewtinî. Aqobetî ki welat di cirîyaybî û himwelatîyon ser di omevî, seki herunda hemini ayî cayon ra veyno. Aqobetî ki yew tewir ra heme dejnay-bî, waştî ki pîrûni fahm bikera, sereyê xo deyeyêka na û xorîn xorîn tefekuriyayi. Pize di zerrî kelgiriyi bîyi, nusikê bermîyî qirriko pulisîyayî, hesronê nazikon û germinon cor di xo verrada memikonê tujikon mîyon û xo zerre di ververna waywelîkî va. Lomeyî û gazincê xo zî newerna pêpeya nayî. Çina ra waxto kû şerr çûwa, turzi, kalme, qirmeyî reydir hal bîynî kal û pîronê ma gureyê xo ca nêerd? Çina ra ki ino vîst û hêşt serehewanayon di yemnû dir nêgirewt û şarê xo Faris, Ereb û Tirkî ra nêxelsna û derî xelaq verda? Çina ra şaristonêya ki dinya ra vila bîya û erdê yînî sero û hetê verînonê yînî ra xelegîyaybî û yînî tira yew havili nêgirewti? Çina ra şarî ina şaristonêyi tira tirawiti û verba yînî gurînayî? Çina ra ki ino welato kevnar û qedîmî rê wayer nêvecîyayî û ma kerdî bin-

destê se serron? Çina ra? Çina ra? Hesir û çilonta ki tēmîyon bîya hêdî hêdî esterdi û sereyê xo qeyme kerd û waşt ki toyî gazinconê xo zî Homeyê azîmşonî ra bikera. Hêrsî reydir destê xo akerdî û va hêêêê Homay, Homay, qey ma îni erdon sero zêd î? Îni netewî heme tu nêxelaqnayî? Çina ra tu toyî serdest û wayerê mafê bêsîndurî kerdî û ma rê zî heme tahda û zilom rew a dîyi? Eki yî qûlê tu yî, cay ma kulê tu yî? Heme çehar kitabonê tu heq û heqîqet nêvetbi aver? Çina ra ki ino heqî ra çîy ma rê zî nêkewt? Ayînî ki vateyê tu ca nênerd, çi semed ra tu ferasetê yîni ver di laqî nêviraştî? Ino çarenusê derdê gironî kura ra û çi semed ra tu nasîbê ma Kurdon kerd? Serdeston hilla ki rarê heq û heqîqetî semedê nahfda xo gurîna, gede û turnê ma bêmar û bêpîr verdayî, çina ra tu derdê xo zerrîya yîni di nêtewernayî? Goma ki cenîyê zaclonî awki di kerdî û bi sungîyonê xo piçekî pîzedê maron ra vetî, lete lete kerdî, poxdê çinayî rê tu qeda û belayê xo yîni sereyî ser di nêerdî? Çina ra tu yî tewş û bê hêş nêverdayî? Çina ra û çi hesab ra tu derî dewernawo? Bawkal û dapîronê ma hêvîya rocê bîynîya ki tu di berdinî qey heyonî êro nîyomeya ca? Mîlyonon reydir yew netewî poxdê çinayî ra sey yew qirşî zî erjeya nêveynîna?

Rocbîyn bi ino moj tēnonê xo ona zon û delonkî erdê dewa kevnari gomî kena. Hind veynena ki yere bider omewo, waxtê şomî yo û ya zî hima ha yabona ya, bi hêvîya kekê Memo ya menda ya. La çi heyef ki aya şewî zî zerrîya çewî hewnik nêbena û heyna zî rar ra mendîşê çimon dum keno. Keye resaybî la bahcon ver pîze pirû masabi. Hi bibi bider ki veyşonêyi ver ningî ra kewtibî la belê bi ino pîzedo masaye çikî zî qirrika yayî rû nêşîynî. Qehir ne yew o û ne zî yew tewirîn o. Hinzar tewir ra qehiron mezg û zerrîya yayî di aswas û weswese viraştinî. Vona ki ez komî dir û çi moj devirîyaye bido? Bi zorê wayerê keyeyî çand

pironî ki qirrika xo di kerd, xo dona wet û şona bonî ser, xo cili ser ra derg kena. Çimî asmîn ra biewnî zî hêş û aqilê yayî ha kutikon sero yo kû bibî omîdê birîna yînî, cay derî yew mizgîna xeyrîni biersawî. Miradê vîst serron ca bîro û egîte zerrîda xo veynî ki wa kerbizikê yînî zî yew ver birîşî. Vîst roc ino moj bendedê hêvîya xo na mendî la vengi bi, heme miradî bêverapers mendî.

Hinî hesabê tēbeyîşê xo veynenî. Welato kû qesbaya yînî lete lete kerdibî, welato kû dejê dejon bider nawitibi, welato kû heşma yînî binpay kerdibî, welato kû raro xirab di tira di gedeyê yînî girewtibî, welato kû yî zerrîşikte verdayîbî, zerrîya yînî derdon di kujilnaybî, welato kû mil yînî ver rû vistbi, welato kû yî kal û pîr kerdibî, welato kû hinî mecbur mendî ki ser di agêrî tēbestîşê xo, tēbeyîşê zo zî qedînabi û hinî rayon î. Hinî çî heyf ki destveng verê xo tadabi welatê merdîmwerî. La hilla raymendişî îni vîst rocî derî sey vîst seaton zî nê, sey vîst deqîqeyon omebi. Çimkû xayleyê omeyişî ca nîyomebi, Memo nêdîybi, derdê xo derî nêvatibi, delalî derî rar nêronabi. Cuka ki mendîş derî yew het ra derg û heto bîyn ra zî kîrr omebi. Têni ki mezg û zerrî di tēya resaybî tēnê tēmîyonekî bî, leşa yînî di tēver rû warîşteyî bî. Tirmo kû erd di moneno, kerm û kêzi dekweno, teyr û vergî xalqa bidernonî, hergû yew xo ver ra seki leşa yînî bikuco. Ayî tēni ino tewir seki leşa yînî berqelaş verdî, esteyê yînî zit û zilut bikerî û bê hêvî xo tēkerd, merdimonê xo ra ki xatir waşt, meyitonê xo zî ser ra gêrayî, halê çilontinî reydir fatîhayêki derî wendi û dima zî xatir waşt, newerna terkê yînî û welatî bîyî. Eki yenî maşîni ver, xo di nêbenî, sey tirmêkî mendibî, ca ki zî da kelmeldê xo ronîştca ra vila benî. Mezgê Rocbîynî di sey mar û pîrî toyî tēnonê tēmîyonekon xilxile viraştîbî zî, esas tewirîna tēnon helqa bidernaybî. Raro kû şarê yayî hûnqif bigîro, raro kû şarê yayî dinya

rê dono şinasnayiş, raro kû mafê şarê yayi paweno, ayo rar hîna zêdî xo hetê zelalêya aver berdo. Xo di vacîyaynî rarvistêya ki dest di zope, çûwa, çek, ters, xewf, zor û zordarêyi esta senî ki yê bê çekî bieşnawo û hûnqif biveyna. Rarvistêya ki serdestî rar di bena heyonî êro şarê bêhêvî rê, bindest rê, neçar rê, xizon rê, belingaz û bêmahfî rê çina pêşnîyaz kerdo? Kom olî rê, kom toynetewî rê, kom çini rê çina leyaq dîyo? Asar têni mezgi di yewîna moj bî, zerrî di yewîna moj. Mezgi di raştêya şarê yayi û zerrî di zî raştêya may û pîrdê yayi, ê way û birarondê yayi pêkewte yî. “Toyini verbirijnaynî zî, toyini rar ververnaynî. Heyonî ki şarê tu hûnqif nîro girewtiş, heyonî ki dînya yîni sero konferans bi konferansî sero nêvirazo, heyonî ki serdestê şardê yayi rê tengone û zext nîro pirûnayiş, heyonî ki şarê yayi û serdest nîrî tê ri, heyonî ki mişguleyê şarê yayi sero serdeston têneaqilnî, heyonî ki vatiş û eşnawitiş yîni miyon di aver nêvecîyo, çewî rê zî asonêyi çini ya, tu rê zî asonêyi çini ya” vonî. Û toyin zî sey verî kihinperestêya xo romitinî, xo serdestî rê xelaq dîynî, înkareyi dima kewtinî. La zonaynî ki ona nêbena, gay hergû merdim xo bido barî ver, gorebê xo zî barê xo wegîro. Nê ki vindertiş û temeşe kerdiş rocê bîynî rê rar nêakeno, nêki şarê yayi bêhêvî, neçar verdono û Faris, Ereb û Tirkî miyon di vilîşneno û serê erdon ra zî wederneno. Hinî ino rarî zelal nawito kû temeşekerdiş, durîmendîş, merg o, vinîbeyiş o.

Eki bê xeyalkerdîşî cay çew çiy xo di şibi ya zî nê-şibi, hind veynenî ki Estanbol resayî û cadi kelmelê xo onî war, taxsîyêki wenonî û bider suwar benî, xo wareyê derd û kulonê bargirononî zerre fiynenî. Keye di hêş dekeweno, yemnû dir barî kenî, tirî ma çina ra şiyî dewi? Dewi şeyîş çi derdê ma daru kerd? Derdo kû newerna ma di tewirna çina yo? Ma kû heyonî konca îni derdon wegîrî? Derdo kû bi kulfetê keyedê ma çareser bo kom o? Ayînî ki derdê yîni ra tahm kerdîbi û neçar mendîbî, şew û roc xeyal kerdinî. Wirdîyê keyeyî dewi di gorebê fahmdê xo toyî çiyon ser ra bîybî, zaf zî interîyaynî. La hilla ki gedonê xo ra ewnîyaynî, vatiş û eşnawitişê yîni ki şîrove kerdinî, nêmekînaynî fikrê xo bîyerî zon yan zî çiyêki persî. Abeyîşê wendecayon zî nîzdî bibi û hemini têkerdêya xo na yê hac û hucê wendeyî kerdinî. Xora wendecayî zî heme têdir abîynî. Gedon mîyon di Rocbîyni may û pîy hemin ra zêdêr aswas û wesweseyon mîyon vistinî. Yîni ino hal dewi di tèn kerd la aqobetonê Estanbolî ver neçar û bêveng mendî. Abeyîşê wendecayon reydir Cindo'yî zî ver bi karî verna. Heyonî şeşê mijdari heme kes bê teşqele mijulê xo rû sur bi la 6'ê mijdari di keye kewtbi yew hewlwelaqo neweyî mîyon. Aqobetê Cindo'yî yê vîst serri ra ver ome Rocbîyni sereyî ser di û gîrîna binê çimî. Çand seaton ra pey imbazonê yayi keye hagîdar kerd û imbaza xo zî teyna canêverdayi, derî pawitox (aboqat) zî tepîştbi. Binê çimî di veynayış yew mişgule bi û heyonî di-hîrî rocî çew nişîya biveyno. Rocê çeherini pawitoxî (aboqatî) newerna xo cerebna û Rocbîyna zêrrîni eki fizikê yayi zext û tahda ver têriznabi zî, ya bi taûtaqet, bi keyf û miruz, bi hêş û aqil dîybî. Şew û roc zext sernabi, tahdaya fizikî bider kerdîbî, bêhewn verdaybî, sere û sirût pirû masnabi.

La heyna zî weş xoverodabi, neyarê bawkalon bêhêvî vistibî, cerebê yînî veng di vetibi. Xora bêgoma ma, hom û toma ma zî bêgune bî, çerray yew kerdeyê yayi yê bêqanûnî çinî bi, sereyê yayi ser di yew serebut zî nêvîyertibi. Teyna Kurdi bî, bira koya bi; pîy kewtibi binê çimî, darezîyabi û ceza zî nêwerdibî, Amediji bî. Sewbîna hinda misqala zerretin yew gune û sucê yayi çinî bi. Rocê şîyesini vetibî dadca û darizîyayi. Bahdî duzgerî tahlîye waştî û dadgeron zî verradayi, duzi tebera romitinî. Aya seat ra pey ayo keye di, çimonê may û pîyî di çikî zî sey imnonî nêmeşîyaynî. Zerrîya yînî di teşqelewî kû ca girewtibi newerna keyeyî defînenî hewlwelaqon mîyon. Newerna keyeyî sero yew zext ronîyeno, yew zî ason nêedelnîno. Keynaka zarweşi, bejni barîyi, çimqerqaşi taketnaket di ya. Çîyo kû wendibi, eşnawitibi, dew û dormere di veynabi heme ki omeynî têhet û yew veyneyo gird ki viraşt, Rocbîyni aqobetê xo zî tede dîynî. La zaf zî bi hêvî nêyasaynî. Tewir bi tewir ra şik û gûmonon mîyon vistinî. Çi hind veyne ra ewnîyaynî ferqê wendiş û nêwendîşo kû weron ra hewaniyeno aqobetê yêyî zî weş nêdîynî. Xo di vacîyayi, gelo eki cuwîyeni ino moj biromîyo imserri nêbo zî serrîna ez heyna ha binê çimî di yo. Çimkû çîyo kû binê çimî di dîybi û çîyo kû tebera cirîyeno yayi şik û gûmonî ser fiyneno. Ne ki ya xişn kena, imbazî ki tira ver verba aqobetê nedîyarî şîybî yayi dîybî û derî şade bîybî. Ayo semed ra yê xo zî hewl nêveynena. Zonaynî ki yê daraxida yayi komo kû feraset dest di bi xo êştibi Ewropa, ya zî ko şî û ayî ki zî derî feraset nêmendibi erzîyayî peyberon û serron reydir ceza bîybî. Hi bibi bider ki Rocbîyni sey verî wendeyî rû sur nîya la heyna zî çewî ra camenda nîya. Wesar zî nîzdî yo, germinêyi û gonîyêya ki tira ver a komî rê çina ona sey hakî çimonê yînî ver ra gêraynî. Roco hewlo kû ina gomi ra pey derî akewo zor aseno. Wendaca di tacîz bîynî la yê keyeyî ra ha-

gîdar nêbî, bahdî ser ra bena ki kulfetê keyeyî heme tacîz benî la terson ver yemnû ra bari nêkenî. Hergû yew merdimo xom û xerîb nurri û durrida yînî di gêreno kû virûgûmonê çewî pey nêbeno. Hergû yew montere çimon ser ra tira ewnîno kû tewir bi tewir ra tersonî rê ri bi ri verdono, salixê ino tersî û xewfî zon erdiş zî zehmet o. Halê keyeyî ki weynena yê xo zî yînî ra nimnena, nêwazena ki derî hina zêdî xeyal pirûbiniyo. Raşt ra raşt keye di huzir nêmendo la ayo kû zî bi nome esto, wa ma dest ra nêşiyero. "La ters nişiyeno verê erjeli bigîro." verînonê yayi vatibi û yayi zî sey goşerîyî xo goşa kerdibî. Newrozi zî nîzdî bîya, him welat di û him zî metropolonê Tirkîye di kuçeyî germinî bîynî. Cenî, comêrd, tolaz, ciwon, zonaye, naşî heme pustedê xo di canêgîretînî. Roc çinî yo kû kuçonê şaristonon di çeqêyî nêbî. Bi yew riho newe kuçeyî têdir keliyaynî. Adiro kû ayî cayon di têkewto zafini veşneno. Heq zî, niheq zî, dost zî, neyar zî tede wo, çew çiyêkî ra zî xom nîyo. Yew xebata pîli ronîyaya ki heme rar û papurî teneya duyê tekeron vero sîya û sot bîybî. Bi duyî hergû yew ko ya zî laqî virazîyena ki kî bizonî neyar çî tira eciz o? Şaristonî, şarçeyî û dewi duy di meleqîyaybî. Vengê azadîyêyî û demokrasîyî erd û asmîn lernaynî, ko, newal, dar û ber têdir şîyar kerdinî. Ino vengî merdimo kû xo demokrasî rê, xo heq û hiqûqî rê, xo azadîyêyî rê kerr û lal kerdinî yû zî hêşar kerdinî. Yew het ra zext o û heto bîyn ra zî ino vengo kû zordarî tira xuy kerdinî, xewf kerdinî, terson ver hêş û aqilî têmîyon vistinî derî adali çinî bî û şariston bi şariston ra vila bîynî. Hewteyêkî mendo Newrozi omarik biba, polison êşt keyedê Cindo'yî ser. Şewî şîybî nêmeyê şewon bi, xafla berê yînî kuwîno. Hima çewî xo ber nêresnabi, bi gurzon berî keseki di fors kenî û ber di dekewenî zerre. Cadi hemini erd di rafinenî û yew bi yewî sey tirmon têver ra derg kenî. Cindo inî wazeno kû cay çiy vaco, hind weyneno pos-

tal vek rû gonawo û gunî sey laserî herrekîna. Qîrriya cenîk û gedon bena la heme nifusê keyeyî nesîbê xo ina gizmêyi ra gîno. Keye di çik teftalo kû esto têzerre kenî û erzenî werton. Xora sebebê keyeyî sero êştişî zî tira nêvonî, keye sehenayîş ra pey Cindo'yî gîni binê çimî. Hilla ki zî berd gedon ra ewnîya zerreyê çimonê yêyi wesîtê yêyi erdîbi zon. Hewa çandina ki keye ona teşqeleyon mîyon fiynîno, derî hewlîwelaq pirûnîyeno. Kulfetê keyeyî pîlî ra şinîkî heme dest û polê yîni têzerre benî, milê yîni melulkî ver rû keweno û hesr û çilonta yîni zî têmîyon benî. Metropol sey birê bêbinî yo, komo kû dekewo bider hinî xo ra xêr veynayîşê zî yew siûd beno.

Cindo keye ra ki vecino bi inî tēnon keweno maşina polison û yew firti di çimon ver ra vinî beno. Imbazi û gedeyê Cindo'yî newerna dekewenî mişguleyonê bêser û bêbinon mîyon. Dormêre zî yê yîni nîyo û nişiyenî çewî ra zî paştî biwazî û zonî ki zî çare teyna xoverodayiş o. Ya komil biya la gedeyî hima naşî yî. Xomê şaristononê xerîbon î, bêqewm û bêqom î. Ino zî yîni neçarêya girdi mîyon fiyneno. Zonaya û girda gedon zî tortora porrkeji, sînepehti, paştîverini, beşndergi û çimqerqaş û çimlîli a. Ya zî barê xo yê marda xo zî ver ra ya. Marda xo ya hêş tēmîyonkewta rê maxduronê azadîyêyi û demokrasîyî yew bi yewî rêz kena û aqobetonê yîni tedir bar kena. Zerrî dona bider û ristê yayî zî bider nawnena û vona ki ti xo sist bikera ma çem û çem şonî. Gay ti zerrî bida ma hemini. Ti estuna keyedê ma ya, ti pîli û pêşenga ma ya. Ti miruz û şayîya keyedê ma ya. Eki ti xo veronêda ma kû heme binê payon di şîyerî. Qet hêş û aqilê xirabêyi, nêweşîyi û kemonî ser di ti nêşîra. Binêkî zerrîya xo pêti tepîşi, xo çeç bikeri, şek bikeri ki, wa ma tu ra paştî bigîrî û neyar zî pey bibahcî yo û wa pey biteqo. Eki ino mojî reydir ma xo nêpawî, ma kû yemnû bivirî û weron ra vinî bibî, sey hewa verîni newerna tehtilfiraş bî, heme hewa ra qeda û belayon mîyon bikewî. Vindertiş û ewnîyayîşê tu ma pîrûnî rê beno zerrî, beno paştî. Ayo semed ra ez vono kû binêkî pişikê xo verradi, ason bi û seba kû ma senî ino halî xo ser ra dehî kenî, ma sero bifikrî, rar veynî. Bi inî tēnon yere bider yeno, hima loxmeyêk wer qîrîka çewî rû war nêşîyo. La tortornamzeti vîrî fiynena ki seba xoverodayîşî hewcî keno kû, wa çew werê xo apey nêdo û tēmîyon di ma bişîyî gureyê xo cabîyerî. Roco bîyn zerrîtenika keyeyî pîrdê xo ser ra gêrena,

aqobetê yêyî sax kena, hetê şonîya derî xeberi yena ki çiyê tersî çinî ko. Cindo'yî vato kû wa kulfetê mi, mi xo rê derd nêkeru, çiydo nêweş peyda nêbîyo. Seba kû Newrozi sist vîro seyon reydir merdim gîrîyawo binê çimî. Pîr, ciwon, cenîyî nêverdaya erdî dekerdî, ca çinî ko merdim ninga xo bierzî! Çew bira ridê ma ra nêewnîno, bêlû wo kû Newrozi wîta di vîrena û tira pey ma pîrûn bê îfade teber kenî. Qet xo meqehernî, çina wo xirabo kû ma dîy, keye di sindurin mend. Bi ina xebera weşi Rocbîynî û imbazê xo agêrenî keye, keye di ki ina xebera weşi bari bîyi kulfetkî yew cîfo xorîn gîrîno, pişikê hemini têdir nîşeno û keyfê keyeyî yê Newrozî mîyon beno. Roşonê Newrozi ki mîyonê yînî di bi coş omarik nêbibi ina xeberi ra pey bi keyfê omarikkerdişî keye zî derî qêm nêkerd û herrekîyayî kuçe. Newroz ra pey Cindo sey imbazon nêersawîya dadca û ewleca ra verradiya. Eyomê keyeyî binêkîna normal bi, hewlwelaqo kû keye di virazîyabi cayê xo asonêyi rê caverda. Wendekarê keyeyî hîna bêaswas û bêweswese dersonê xo rû sur bîyî. La keye sey waxtê binê çimî nêbo zî heyna seki xo telîyon sero veyno. Çimkû tebera zext, tahda, binçimkerdiş, zîndonêştîş çeherpay romîno. Mêştî çewî çewî ra nêasen, ne keye di û ne zî tebera xarantîya çewî çinî ya. La mecbur î ki xo vero bîyerî, raştêya verînonê xo ra ders bigîrî, xo bonder bikerî. Xoverodayiş sey ê kal û pîron nêbo zî, çiyî kû mêştê yînî, rocaverê yînî bedelno tira nêaseno. Ayo samed ra binê xarantîyi veng o.

Asar rocon tengî rê devirîyayiş hewcî keno, rardîberêyi hewcî kena, saf girêdayiş hewcî keno. Seba kû sey ê verînon goşt û esteyê yînî kerron û lemona nêmonî zî derî xoverodayiş û devirîyayiş sey nonî û awi ferz o. Cindo'yî zî ina newe newe şekerda, hêdî hêdî rih û mezgê xo di ca biderdono, goşt û este çarneno. Kerdeyê yêyî yê verîni xo rê çare gêrayiş bi, cuka ki welat ra rema, cuka ki vateyê kal û pîron war di ver-

da, cuka ki herra qadim û verini terk kerdî. Hewawo kû xo dabi bawerkerdiş, eki xo metropolêka biresno sew hinî zext, zordarêyi û tahda ra xelesîno, ez ki leyronê xo çirax veco, girîşonê xo awi ra veco, gedonê xo merdimêkî bikero û wayerê kar û dabari bikero. La bahdî veyneno kû xeyalê asarîni bêmîraz î û kal î. Çiyoy asarîni teyna hewnêki yo. Çiyoy kû welat di weynabi, dest qat yêyi wita di weyneno û macîrêyi zî derî non û pîyoz monena. Yû hinî wazeno kû pîze ra tewbe û îstîfarê xo bîyero la deji ki diybî apey nêagêraynî û hinî erê kewtibi. Çatalrara ki tede wo nêverdona ki muvi xo di bileqno. Yew het ra gedeyî ha wendecayon di yi û heto bîyn ra zî dabara nêmxenaqi vîyeyê yêyi tepîştî û binê nêredê asîninî ra kerdo. Ge ge wazeno kû agêro welat û wazenî wa fatura hinzar qat bo la mertewala Zerrîweşî û Şayda vernî bider gîna. Hergû hilla ki keye ra teber keweno hêvi keno ki yerêyi cay cayî ra vecî û bîrî, zerrîya ki tira durî kewtî xo bierzî qûl û qûlçikonê yayi. Hêvidarêya yîni heyonî inkay zî cay ne yew xebera xirabi û ne zî tirmê yîni dest kewtibi. Eki îni tênonê xo kulfetê keyeyî dir bari nêkero zî sew mertewala gedonê vinîbeyon destê şafaqi ra heyonî yerêyi çimonê yêyi ver ra çengeleki kena. Ayo semed ra mertewala îni gedon yêyi Estanbola girêdaye verdona. Nê ki hemilê yêyi hinî yew roc zî cayê xerîbî rê nêmendo. Hinî wesîtê bawkalono kû roco bîyn bi, xo di weş fahm kerdo kû ayo rocî rê xebati wazîna. Fahm kerdo ki hergû bindest û arizî zî hergû Kurd gay yew rardiberêyi di ca bigîro. Eki devirîyayişê têdestî nêbo sew ê ferdî merdimî cayêka nêresneno. Devirîyayişê têdestî merdim şîyeno xo zî, kulfetê xo zî, dormere û dostonê xo zî xeta hewl û raşti di biedelno. Kî bi ino devirîyayişi şîyenî xo pîsêyi ra zî bipawo, bi zonaye xovero zî bidî û xeyalonê xo tewir bi tewir ra bixemelnî û fiynî rar zî. Ters û xewfo kû sey cilê herî qorrde yêyi wenaye bi hêdî hêdî tira ronîyaynî. Seki

hîna ason bibo, seki hîna keyfê yêyî bider biro. Tira
 pey miruzê û ringuzê yêyî akerde verba heme gureyî
 tahmî reydir têtayêreno. Kar û gure di hîna fêmdar
 û çeç têtayêreno. Hinî weş fahm kerdo kû bi ters û
 xewf têtayêrayiş neyarî hêvîdar û kî zî bêhêvî keno.
 Ayo tewir neyar har beno û oncîno merdimî ser. Dîy-
 bi, teresêya ki xo di erdibî, ziraro pîl rû dabi. Cuka
 ki yewîna rar vijînayiş û hewcîyonê ayo rarî caerdiş
 raşt veyneno. Daxîlbeyîşê rardiberêyi ino semed ra
 sey aw û nonî zarurî veyneno. Eki rarê wendişî reydir
 zî fahm nêkerdo la yê piratîkî veyneno kû hergû rar-
 diberêyi rarê yayî vecîno yê xelasi û alefê neyarî beyiş
 zî xeyal ra vîşêr çiy nêbeno, vernî zî bide gîrîna. Ona
 ki fikrîno yew axo xorîn onceno. Vono kû mi ona zêdî
 ters û xewf xo di aver nêvetinî, wa ka êro ayî wirdî le-
 yirê ma ka zî keyedê xo di û binê destê ma di bî. Ters
 û xewf cilê herî yê bêhavlî yo, hetta yê zirarî yo, ê çe-
 her qat vinî kerdişî yo. Ino moj yew xoralomeyî vece-
 no aver û imbazî ki sendîqa di xebati virazenî yîni dir
 hîna zaf dono û gîno. Kerdeyê sendîqa yew het ra sey
 imbazon yêyî miqat kenî, sey yew zirxê yû pawitinî,
 gure dîynî û heto bîyn ra zî zîhno kû tersî puç keno
 newerna tede xelege erzeno, narbe dono. Inayi ki ser
 ra beno ewnîyayiş û vindertişê xo zî reydir bedelne-
 no. Hilla ki veng mend, kar ra ki ome naşt û başt ra
 nêgêraynî. Cadi sendîqa di cîf girewtinî û imbazonê
 xo reydir xebati rû mijul bîynî. Yêyî ki xebata xo ya
 yê heq, hiqûqî ki aver veti, keye di zî yew xobawerêyi
 hasil bîyi. Keye di ewnîyayişê kihinî cayê xo yê neweyî
 rê caverda. Siltoni zî mîyon di girdê keyeyî sazîyonê
 sîvîlon di gurîyaynî. Çiqas ki xo aver berd, çiqas ki
 zêdî sîflêyi werdi dîy ki ayo hind zî pawînî. Pey bawer
 bîyî ki sey verî teyna nîyî, veynenî ki hêvî hîna vîşî
 bîya, dost û cîronî zî bi erj nîzdî benî, derd û kul zî
 cayê xo cuwîyena zerrîweşî rê caverdawo.

Waxto kû îni sazîyon di renci benî fahm kenî ki

asar cayon di beyîş teyna mendişî kişeno, bêwayer mendîşî werte ra hewanono, yew mişgule ki virazîya ayî heme merdimî rê perçîn benî. Teyna mendişî heyonî inkay yî mişguleyon di xenaqnaybî, derûniya keyeyî zî xerepnaybî. Ziraro pîllo kî teynayêyi pirûdabi, erê zonîya ki erê ser ra bîyî. Inayi kokê xo terkêwelat beyîşî ra girewtibi. Xeribêyi û xomêyi ki zî sernîyayi yew hewi di puste di têtternîyaybî. Xora pergale kapîtalîstmodernîteyî zî merdimî duza xo ra durî fiy-neno, têkelîya merdimî têdir birrneneno, dormere ra raçarneno, ters û xewf kî pîze fiy-neno, merdimî îtaetî kerdişî ver di virazeno, mantiqê dewernayîşî tede aver veceno. Merdimî dest û polon ra keno û tuk û teyna verdono kû neçar bibo. Peyena merdimî ki ona bîyi kapîtalîzm û dostê yêyi gorebê reçetedê xo kî binê çimon di tepîşenî, zext û zordarêya xo merdimî ser ra kêrnêkenî. Çiyo kû zî omebi Cindoyî sereyî ser di zî ino bi xo bi. Xap û dekê pergali nêşinasnaybî, vatini qey ez şiyeno bi rayerê feodalîzmî xo pîşeyî û gemara pergale serdeston ra, kapîtalîston ra, emperyalon ra bipawo û miqat bikero! Fîrrê bawkalon zaf feodal bi, apey bi, teng veynaye bi. La sew xo ayo firriya nênabi zî gorebê duza newa zî nêşiyabi xo bedelno, xo têvirazo û gorebê pergale kapîtalîstmodernîteyî zî hewcîyonê xo cabîyero. Ona ki zî nêbi, metropolon di xap û dekê ki bindeston rê peleknenî lezi merdimî oncenî xo ser. Wîta di merdim veyneno kû Cindo zaf ason dekewto îni dek û dolavon mîyon, hima hima kakûzurê yêyi ronîyaynî. Pergal rew rew merdimî rê musade nêkeno, cawo kû tede wo asonêyi reydir, keyf û weşeyî reydir, bi pergale rarvisteyî reydir cuwîyena xo biromo. Tona ki asar cayon di neçarî germin kena, wayerê hêz û fahmî kena hesabê pergaliya nîyna. Ta û taqetê kû îni sazîyon ra girewtibi, kerdinî ki deyndarêya xo hillîna aver nê kû apey bido la bahdî pey aqilîno kû deyn dayîşî dima bikewo sew çerray zî

deyn nêdiyeno. Ina hewi gureyê xo caerdişî avzel vey-
 neno û veyneno kû raşti zî ina ya. Xora vateyê nome-
 dê keynarda yêyî zî wîta di binê yêyî debeno û mezg û
 xeyalon di ca dono ina raştêyi. Veyneno ki rocê bîynî
 sero xebata kulfetkî nêbo sew çew kî rê 'sînîya zêrrîni
 sero takdîm nêkeno, sey yew xelayi kî rê destonê xo
 reydir nêyono ningonê kî ver. Derî sero gêrayiş hew-
 cî keno, derî wayer vetiş hewcî keno, derî cemat bi
 cematî sero pirûnayış lazim o. Gay merdim xovero-
 bido kû wayerê rocê bîynî bo. Gay cawo kû pergalê
 zextî û zordarêyi pey apey keweno, bêhêvî moneno,
 ta û taqetê yêyî kemîneno, merdim wêra di safi girêdo
 kû pergal bibedelîyo û kî zî rocê bîynî veynî. Nî ki bi
 keyf, bi riza, bi waştîş ino pergal ne zext ra, ne zorî
 ra, ne zilmî ra, ne ereqê çareyî rû pelekneyişî ra û
 ne zî sey kerjeyî gunî wespawitiş ra fek verranêdo-
 no. Çiyo kû pergalî bêhêvî keno û kerdonê xirabon
 ra apey gomi êştîş dono devirîyaye dayiş o, saf bestiş
 û safi girr kerdiş o. Cindo hi hêz gêrawo kû teyna xo
 vera nê, qesbaya letebeya zî vera şew û roc şixûlî-
 no. Hinî nêmeyê 1990 serron o, welati di kerra kerra
 sero nêmanda. Hinzaron reydir merdim seba kû xo-
 verodawo, devirîyaye di cagirewto, kerdonê pergalî rê
 riza nêawita, bi monîkî gîrewo binê çimî, ya benasat
 kerdo û ya zî kîştîş êştîş yew dalde. Hinzaron reydir
 dewî ya veşnayî, veng kerdî û ya zî tahdaya bêhimtayî
 ronayî û dewijon ino zorî ver dewon ra wena, zextî yî
 tehtilfiraş kerdî, metropolon ra vila kerdî. Pergalî ker-
 dibî ki hergû merdim bibi kupa muşguleyon û cayêkî
 di zî nêseterîyo. Ino halî serron reydir romit, pergalê
 dabar û şîlikî xo vinî kerd û heme yewver neçarî vistî.
 Tewir bi tewir ra mertewalî himwelatîyon miyon di
 gon û rih gêrayî. Demewo kû kî xeyalê xo îni mer-
 tewalon sernaynî qesbaya merdimî derî kujilîyaynî,
 sîya û sot bîynî, ningonê kî ra ta vecîyaynî û sey tura
 awi recefîyaynî, muyî kî sere di teli bîynî, çimê kî bel-

diqiyaynî, goş kerr î, fek zûwa, zon zî lal bîynî. Cindo ki asar mertewalon eşnaweno yê xo erzeno kîştî û derdî zî bêdermonî nêveyneno. Heme yew dawa sero tahda veynenî, kişînî, benasat benî û welatonê xerîbon ra şerredînî.

Payizê serra newayê hewtî şeşê mijdari yo û heme zonecayon di protestoyê “YÖK”î ververnîyawo. Estantbol di ino protestoyî hîna zêdî vecîyaybî aver. Ê Rocbîynî zî serra peyen a û întorn a, tortorbeyîşe yayi zî nizdî yo. Eki bê qeda û bê bela bibo imnono kû tira ver o qedînena û bena yew bijjka nazîni. Ayo hindo kû xo aver berdo bi gîştan nawnîna. Hetê beşn û balaya zî çimonê merdimî villiknena. Xorto kû tede balheyi nêbeno çinî ko. La ti înin caverdî ya yew seati nê, yew deqîqa zî keyf û zewqî rû, zewac û keye pişrûnayaşî rû mijul nîya. Çerray asar çiy nêyomebi vîrî û xeyalonê xo di zî canêdabi bider. Xora eki ciwonî biomeynî têhet zî qala zewacî nîyomeynî rocev û zewac zî sey yew deka pergalî diynî. Xo miyon di vaciyaynî, komo kû zewacî rû bipelekno tede wijdon çinî yo, merhemet çinî yo, merdim nîyo. Halo kû welat û himwelatîyî miyon di yî, zewacî meşru nêveyneno. Çimkû hergû roc, hergû seati ya yew dewi veşena û ya zî maşîni gulon feka bena, tede gede, cenî ya zî comîrdî kişînî. Yew seata merdimî yê keyfî çinî ka ki merdim vaco ez xo rê zewac vijînenno û wayerê keye û kulfetî beno. Zewac deki diynî û zafîni xo tira pawitînî. Rocbîynî zî seba kû heqê nomedê xo bido hîna zude vindertînî û bi dalamati ewnîyaynî persgirêya netewa xo ra. Vatinî heyonî ki netewa ma bindest a, mexdurê zext û zordarê ya ez zewacî xo rê herom veyneno. Rocê protestoyê şeşê mijdari zaf bi girse vîreno, polis zî ason nêvîndeno. Naşt û başt ra zext zêdnawo û keno kû girseyî bişeqno tira toyîni bimçim bikero. Ona zî bi, zaf tortorê neweyî girînî binê çimî la ya miyon di nêbena. Eki bi zonaye ona bi ya zî nêdîybî, ina hewi Rocbîynî tebe-

ra mendibi. Rocê binêçimî ki debenî, tira çand tenon tewqîf kenî, ayî biynon verradonî. Rocê homayî çinî yo ki Zonayecayon di, karcayon di, kuçon di zaftîyon zextê xo zêdî nêkerdo. Zaftîyî zextê xo ra, Rocbîn'î zî guredê xo ra apey nêmonenî. Çiyê kû.yayi di riyê êšto, ina dewleti rew rew bi keyf û ason nêverdona ki merdim gureyê xo zerrîba xo cabîyero bi. Hewawo kû weynîno êro nêbo zî mêšt ra bîrrô ya zî ha rardê imbazonê xo di ya. La wendişê xo misqala zerretin apey nêfîynena, dumnena. Imbazî ki girewtibî zerre toyî tira çand aşmon ra pey verradîyayî, toyinon zî cezaya gironi werdî. Hinî peynîya serri ya û rocê Tipi qedînayîşî zî omarite yî. Peynîya aşma puşberi di wendeyê yayi temom beno. Nizdî ra bena tortori, hi keye di û hi zî imbazon mîyon di yew keyfo nêmxenaq qerqere çarneno. Pey ne wesfinî û ne zî temomî xemîn î. Rocbîyni zerredê xo di yewîna adirî ya monena. Adiro kû zerredê yayi di têkewto tona yêyî zerredê xo d nimnena. Çimkû çimê zafin hi sero yo ki hi sero yo ki nîyno salixî dayiş!

Qewmîyayêyî ki dormire ra cirîyenî têtayêrêya zerredê Rocbîyni girr kenî. Ayî ki dormeredê yayi ra yî ino hêş û aqilî ra zaf hagîdar î la çew yew vatewo xom bider nêwenono û nêmekenîno tira çîy perso. Seba kû imbazon ceza werda xemîn weynenî û yewîna vateyî dima nêkewenî. Zonayeca di seba qedînayîşî yew şewa şayîyî virazîna û qedînayoxî yew bi yew vecîno diki ser tênon û fikrê xo ono zon. Zafê qalîkerdaxon nîşonê xebata seba şarî yê weşêyî donî la Rocbîyni qalonê xo di seki dormereyî ra xatir biwazo, vernî ra heyonî peynîyî zorêya devirîyayîşî ra behs kena. Qet weşêyî û xebata tortorêya xo ra behs nêkena, seki yayi Tipi nêqedînaya, seki bira imbaza ayînîn ki behsê tortorêda xo kerdibî yê yînî nîya. Rocbîn'î ki welat û romiteyê xo hesîyena tede yew şoreşo gird virazîno. Ewmnîyayîş û weynayîşê yayi di zî yew sewmo xidar

este û goşt gêreno. Çiyî ki dormere di qewmîyenî sey
 yew şoreşgerî şîrove kena û xo peron rû sur nêveyne-
 na. Derî pere û cuwîyena pereyî sey yew deki yena.
 Derî xapa ki pereyî merdimî rê şêrîn kena, erjonê
 welatî derî tahl û tirş kena û gonê yayi ra çarnena
 sey asar yewi xapi yena. Hilla ki şiybî dewî û wêra
 di toyî raştêya welatî ki dîyî, serebin xo newa kerdişî
 rû, bedelnayişî rû sur kena. Vêynena ki cuwîyena ki
 bindest tede azad nîyo, cuwîyena ki Kurd tede azad
 nîyo, cuwîyena ki erjê merdimêyi binpay î, cuwîyena
 ki ol û mezhebon vecena aver, hetkaron xapon mîyon
 fiynena, yemnû rê dişmen kena, cuwîyena ki serdes-
 ton rê xelaq peyda kena mijîjê yayi kaş nêkena. Çiqas
 ki maben dekeweno beyntare asar xapon hîna vîşî şe
 kena û wazena ki yînî ser di xo tado. Cuka ki ya zî sey
 imbazon ne weşêyi rû û ne zî xebata tortoron rû sur
 nîya. Rocbîynî raştêya ki şarî mîyon di ya, raştêya ki
 gironeyê merdimî gîna û pereyî zêdêr çiyîna merdimî
 vîrî nêfiynena nêwazena kû pirûsur biba. Ayayi tahl
 û tirş weynena û wazena kû yew xebatkar zî, tortor zî,
 karmend zî, karker zî, kirra qali yew merdim zî xo ina
 cuwîyeni mîyon nêfiyno, wa timî xo tira durî bigîro
 û xo tira bipawo. Hêvî kena ki heme xeyalonê xo bi
 miradê bawkalon bixemelna, safa rocê biynî mîyon di
 ca bigîra, xebati bikera. Rocê biynî durî zî weyna hinî
 pey aqilîyaya û seba kû gorebê xo nîzdî bikera, seba
 kû hillîna aver nê ki apey nasîbê şarê yayi zî bibo,
 seba kû ayo rocî weyno û tede bicuwîyo xo kerdonê
 cuwîyena şaşi ra pawena. Adiro kû zerredê yayi di
 têkewto bêlû yo kû verê yayi, qibla yayi tadono koyon
 ser. La çiyî kû yayi şeyîşê koyî ra hağidar bikero ya
 zî ya pey bizono çinî ko. Hewawo kû kerga serebirr-
 nayaya ki tewşikî nurri û durra xo di perrena, ya zî
 ayo moj qewqizîna la rayerî ra fahm nêkena. Yew de-
 mewo şidînaye korfêmkî gêrena. Dima ki rayerî bon-
 der bena hi kena ki yew qûlê Homayî zî şik pey nêbe-

ro û şeyîşê xo zî puç nêvecî qasidî têtayêrena. Hima hima imnonê xo ino gureyî sero vîyarnenena. Rocêkî gorebê çand rocon tebera mendişî semed têtçîynayeyê xo veynena û seba kû mar û pîrî vîşî xemîn nêkera zerredê xo di, zerrîya xo di xeyalkî xatir wazena û keye ra teber kewena. Ayo şeyîşî dima yew hewte vîyert rocêkî telefona pîrdê yayî cenîyayi. Cindo kû telefoni akeno û beno goşidê xo, hima nêvato alooo, daşta vengê nazîna yêyî, vengê torina yêyî ome goş û va bawooo, ti se keni? Ti weş î, may, wayê û birayê mi se kenî, şima heme têdir weş î? Ez weş û war cadê xo resawo. Mi meraq mekerî û pey medejî, hinî telefoni hewa verîn û peyeni padîyena. Cindo çî hind zî vengî dima keweno zî bêhavl bi, hinî hewî sewt birîya. Rocbîyni seba rocê bîynî xo xemelnabi, heme xeml û xêza yayî seba hêvîya kal û pîron bi. Rocbîyni hinî veyveka û bûka kurdon a, hinî galurê serê koyon a, gul û villika wesarî ya!

1872

1873

.....

Rocobîyn; bi vate yewîna roc, roco kû rocê
êroyenî rê, derd û kulê kurdonî rê, xem û dejê
kurdonî rê, aqobetê nedîyarî rê beno daru û
xelasi. Tede dej, kul, ezît, zext, zor, zordarêyi,
tahda, veyşonêyi, teyşonêyi, raçernayiş, kutiş û
kîştîş çinî yo. Rocobîyn, xeyalê ayo rocî yo.

.....

